

ENT



1236 2







SEBASTIANI WIRDIG/

Med. D. & PP.

NOVA

MEDICINA SPIRITUUM:

CURIOSA

*Scientia & doctrina, unanimiter hucusq;
neglecta, & à nemine meritò excolta, Medicis
tamen & Physicis utilissima.*

In quâ

Primo SPIRITUUM naturalis
Constitutio, Vita, Sanitas, Temperamenta,
Ingenia, Calidum innatum, Phantasia vires,
Ideæ, Astorum influentia, Μετεμψύχωσις,
rerum Magnetissimi, Sympathia & Antipathia,
Qualitates hætenus occultæ, sensibus tamen
manifestæ, aliæq; cæteroquin abstrusa
& Paradoxa;

Dehinc SPIRITUUM præterna-
turalis seu morbosa Dispositio, Causæ,
Curationes per Naturam, per Dietam, per Arcana
majora, Palingenesiam, Magnetissimum seu Sym-
patheismum, Transplantationes, Amuleta,
ingenuè & dilucidè demon-
strantur.


Ad Regiam Societatem Londinensem.


HAMBURGI,

Ex Officina GOTHOFREDI SCHULZEN,
Prostant & Amsterodami

Apud Johannem Janssonium à
Waesberge.

M D C L X X I I I.







*Consummatissima doctrina ,
acerrimo judicio, incomparabili
experientia & rerum usu*

ILLUSTRIBUS ,
SOCIETATIS
REGIÆ

Londini , ad Naturalem
Cognitionem promovenda
instituta ,

STATORIBUS.

Venerabili

DN. PRÆSIDI
ac SENIORI ,
Cæterisque

Gravissimis Collegii Curiosorum

DNN. ASSESSO-
RIBUS ,
FAUTORIBUS SUI
Singulariter honorandis

S. P.

Serenissimus
REX CAROLUS
Potentissimus
Magnæ Britanniae Mo-
narcha, Sapientissimus
PRINCEPS, intelligens,
quibus utilitatibus & e-
molumenis, intimior
rerum naturalium Co-
gnitio, Vitas, Fortunas,
Rem & Salutem subdi-
torum publicam ditaret,
secundaret, sacratissima
Ejus Majestas maturo
Consilio Regiam Ve-
stram Societatem, ad co-
gnitionem Naturalem
promovendam pruden-
tissi-

tissimè instituit, fundavit, firmavit, sanxit.

Quas utilitates omni seculo Naturalis Cognitio communi vitæ peperit, toti orbi magis quàm notorium est.

Unicum hac vice Magnetem nomino, quæ quæso commoditates & lucra ex illius naturali cognitione in omne vitæ genus cumulatissime retundarunt, florentissimæ docent in remotissimas mundi plagas susceptæ navigationes, expeditissima omnium po-

pulorum, gentium & nationum mutua commercia, ex his florentissimus subditorum status, quarumcunque rerum, & exoticarum etiam mercium abundantia.

Naturali Cognitione ditescere posse homines, luculento testimonio olim demonstravit Philosophus Thales Milesius, qui scientia suâ copiosam olearum præfagiens ubertatem, omnia conduxit Chiorum ac Milesiorum trapeta, & non exiguas sibi ex emolumentis

mentis corrasit divitias.
Naturali cognitione civium & subditorum vitas conservari, non docuit solum Hippocrates, verum etiam reapse multis experimentis comprobavit, præstitit.

Vos itaque, quos Naturali Scientiæ promovendæ Sacratissima præfecit Majestas, in tam sublimi statione collocati, Civium Vestrorum Hospitatores estis, statores, pararii, quorum curâ, industria, vigilantia, dexterritate, tot commoda in

) (s rem-

republicam & vitas
subditorum, imò in uni-
versum mundum cu-
mulatissimè effundun-
tur, derivantur, retun-
dant.

Et eo nomine Vobis,
meritò celebratissimis
Naturarum, artium &
scientiarum abditarum
Instauratoribus, Asserto-
ribus, Vindicatoribus,
HANC SPIRITUM ME-
DICINAM, aliqualem Na-
turalis cognitionis parti-
culam, exiguam meam
opellam, devoti erga Vos
animi tesseram officiose
offero. Ad

Ad stateram , quæso,
exquisitissimarum Ve-
strarum observationum
MEDICINAM HANC judicii
Vestri acritudine & dex-
teritate examine , ad
normam infallibilium
Vestrarum demonstra-
tionum illustri Vestro in-
genio, revocate, dirigite.

Quod si feceritis , Se-
renissimæ Majestatis Re-
giæ jussui & mandato
inorigeri parebitis , de
Naturali rerum scientia,
præclarè merebimini ,
immortale Societati Ve-
stræ, laudabili hoc vestro

cognitionem naturalem
promovendi studio, no-
men, decus & famam
conciliabitis.

Ego autem singularem
hanc vestram in me be-
nevolentiam, grato ani-
mo æternum venerabor,
& quovis officiorum ge-
nere demereri pro virili
nullo non tempore an-
nitar. Valete.

Regiæ Societati

*Rostochii, Calend.
Septembr. 1672.*

devotissimus.

SEBASTIANUS Birbig/
Torgâ-Misnicus, Med.
D. Prof. & Medicus Du-
calis.

Erudito

Erudito CENSORI,
veritatem! Candido LECTO-

R I Pacem & Salutem p.



IBI BENEVOLE
LECTOR, ceu Ex-
perientissimo, judi-
cioso Naturæ-Con-
sulto, TUÆq; doctissimæ Cen-
suræMEDICINAM SPIRI-
TUUM, incultam hucusque, &
unanimiter neglectam trado,
committo: TIBI, inquā, TUO-
que Candori, hanc SPIRITU-
UM DOCTRINAM, QUI
intima NATURÆ penetraſti,
examinandam, corrigendam
exhibeo, expono: Quæ monen-
da sunt, moneas quæſo, non ſar-
caſticè, non mimosè, non inju-
riandi animo, ſed laudabili po-
tius, & fovorabili veritatis ſcru-
tandæ, eruendæ gratiâ & inten-
tione. Tentabimus, ſi placet,

num conjunctis viribus veritatem puteo immerfam, in gratiam proximi extrahere valeam⁹. Ex ipsa Natura Naturam eruamus. Natura se ipsam nudam nobis exhibet, semetipsam simplicem explicat. Ex ipsa Natura rectius informatus meliora substitutam & veriora. Vox T U A, ô A M I C E , erit mihi vox D E I ; venerabor monita T U A, eâ quâ par est observantia & devotione, corrigamque corrigenda. H O M O sum, humanitus errare nihil à me alienum, cōvictus ab Experientissimò Phisico per demonstrationes in errore non perseverabo. Non unâ vice excolitur, ne dum exhauritur scientia, & ars quædam sensibus obvia; non mirum, in abstractissima SPIRITUUM MEDICINA, me homi-

hominem hallucinari, humani-
tus aliquoties cespitasse, dormi-
tasse interdum. Restat & suc-
cessoribus meis in E A D E M
M E D I C I N A experiunda
multa, monenda, excolenda.
T U U M itaque, C A N D I D E
L E C T O R, per Gloriosissimum
Naturarum Conditorum obte-
stor candorem! ut candidè me-
cum, qui ratione & experientia
utor, & cum NATURA, com-
muni nostra, & omnium rerum
Matre, non injuriosè, non ca-
lumniosè agas. Hippocrates l.
Præcept. Medicum, inquit, ra-
tione utentem, alterum nun-
quam invidiosè calumniatu-
rum, sic enim animi impoten-
tiam prodet. Sciorum, aut
opinionibus præoccupatorum,
& præsumptuosorum non moror,
ne dum admitto censuras, & a-
nima

nimadvertiones, qui hactenus
28. annorum (absit arrogantia)
Chymix sum & Medicinæ Pra-
cticus, & huc usque in diversis
Academiis Professor Publicus.
Pares itaque, aut me superiores
desidero in Natura & rerum
naturalium observationibus me
magis versatos exercitados, sa-
gaciores, perspicaciores, Philo-
sophos, Medicos, Chymicos,
veneror Censores, quorum ho-
nesta intentio & desiderabile
desiderium mecum in indagan-
da veritate & naturali cognitio-
ne promovenda pari passu am-
bulat. Vale Benevole LE-
CTOR! Deum ama! verita-
tem cole! TUOQVE fave

SEBASTIANO Birdig.

VIRI NOBILISSIMI ET EXPE-
RIENTISSIMI,

SEBASTIANI
WIRDIGI,

Med. D. & Prof. in Acad. Ro-
stoch. Celeberrimi,

Collega quondam amicissimi,

NOVAM SPIRITUUM
MEDICINAM,

Illustri Societati Regiæ
apud Anglos inscriptam.

N On liberos quæ duxit olim Spi-
ritus

Doctrina rerum & ars medendi lu-
brica

Inter tot atræ stultæ bilis somnia,

Tot qualitatum disputatas nævias

Scholasticas febres & hei ! meros
logos,

Logos logorum quotque nascun-
tur logis

Logos

Logos ab illis redditos suis logis ,
Tot tinnula hei ! opinionum cym-
bala ,

Tot regularum dogmatumque tot
fabros ,

Tot verbi fumi nugivendulos ,
Vaporum aluminos & tot humorum
coquos ,

Actos in orbem tot rotis ixiones ,
Interque tot voluta saxa Sisyphus.
Illa , illa , cui præclusus olim vin-
culis

Per colla jactis penè Spiritus fuit ,
Novos resumit arbitro te , Spiritus ,
Qui transmarinos æmulatus Her-
cules ,

Rerum parentis excitatos vindices ,
Propinquiore corporum causas
notas ,

Docesque docto , docte WIRDI-
GI , libro :

Qua plurimus se Spiritus roret viâ ,
Magnus cerebri , magnus hospes
sanguinis ,

Artusque segnes nervulosque vel-
lices :

Doces

Doces, ut ille ſæpè cognatis potens
Armetur aſtris atque miſtus ætheri
Radio curuli ſiderum vectas bibat
Mergatque vires corporum reſeſ-

ſibus,
Quæ pingat ille mentibus phantaſ-

mata:
Ut ſtringat arcto corda amoris fa-

ſcino
Verus Cupido, vera fingens vulnera.
Affectuumque promicondus om-

nium.
Morumque temperator atque ſen-

ſuum:
Fœcundus ut ſit ille morborum pa-

rens,
Cum perduelles hinc & illinc mu-

tuis
Senſim Quirites provocantur præ-

liis,
Venæque lenis uſtulantur ignibus:

Quo putris adſet Spiritus contagio
Viciniore; queis feratur motibus

In res remotas, quasque mirus ex-

erat
Vertumnus artes imputatas ſæpius
Infa-

Morhof's Carmen.

Infamibus Ditis maligni fraudibus,
Hæc eruditis differis tu paginis,
Qui quicquid errorum est, vapo-
rum, nubium

Diffles vel uno dissipetque Spiritu.
Conspirat ecce! tot tibi suffragiis
Natura rerum, cujus augustissimus.
Cœptis Senatus, ut puto, plau-
det tuis.

Qui gloriosum Regis auspiciis sui
Sophies tribunal inter Anglos erigit.
Nâ fallor Ipsa nunc Tibi se man-
cipat.

Hygeia totam statque legibus tuis.
Cui Spiritus dum reddis, ac istos sibi,
Omnen ipse vestigalem habebis
Spiritus,

Istique jungent Spiritus sese tuis,
Ut integros haurire semper, vividos,
Agiles, perennes, nec remissus
viribus

Tot inter exspirare Spiritus queas.

*Deproperat inter plurima
negotia*

Daniel Georgius Morhofius.
U. J. D. & in Illustri Kiloniensi
Acad. Prof. *Emble.*

Emblematum analysis.

FAbulæ Poëtarum, non sunt levia
quædam, & frugis expertia oti-
olorum hominum commenta, imo
sub eis velut involucris atque inte-
guimentis, omnis doctrinae elegans,
omnis ingenuo homine digna co-
gnitio, omnis deniq; sapientia con-
tinetur. Ingeniosi Poëtarum fin-
gunt Jovem mortalibus ex indigna-
tione ignem denegasse: Vel Deuca-
lionem ex animis ex lapidibus, vel
potius ex terra & elementis homines
generasse, Promethea Minervæ con-
silio & auxilio cœlos conscendisse,
ignemque pro animandis mortali-
bus clam sustulisse.

Prometheus fuit vir quidam;
Philosophiæ naturalis primi seculi
peritissimus, ille consilio Minervæ,
hoc est, ingenii acumine, cœlos con-
scendit, hoc est, indagavit cœlorum
&

& astrorum virtutes & influentias, transulitque ignem ex Sole, distribuitque eum inter mortales, exanimisque vivificavit; hoc est docuit & demonstravit homines ex elementis seu humo natos, vivere ex igne, & Spiritibus astralibus. Propterea in priori emblemate Solari Prometheus introducitur tradere lampade ignem cœlestem solarem sublunaribus, Cupidini præprimis, qui ignem seu Spiritus geniales, vivificantes, multiplicabiles Deucalion & ejusdem uxori Pyrrha, pro animandis, ex saxis & lapidibus natis infantibus; nec non Diis & Deabus terrestribus; Veneri pro prolificandis hominum seminibus; Pani pro fœcundandis animalibus brutis; Floræ, pro vegetandis vegetabilibus calidis; Cereri & Baccho pro maturandis frugibus & vino: Vulcano, pro reliquis usibus humanis reddit & suppeditat.

*In posteriori Emblemate Lunari,
hyberno*

Analysis emblematum.

hyberno & nocturno, itidem intro-
ducitur idem Prometheus subsidio
Minervæ ex Luna surripere ignem
ex Luna Lunarem frigidum seu spi-
ritus Lunares frigidos, eosdemque
Mercurio (qui juxta Chymicos
principium rerum naturalium) tra-
dere, qui eundem ignem frigidum
Saturno frigido, seu plumbo, me-
tallorum primo, auro leproso, reli-
quisque metallis; Neptuno, pro
mari, aquis & aquatilibus; Floræ,
pro vegetabilibus frigidis, opiatis,
papaverinis, cichoraceis; Hyemi,
pro congelandiis rebus; Seni,
mortem desideranti, pro fugan-
dis Spiritibus calidis; ipsi Morti,
pro vita & Spirituum igneorum
radiatione extinguenda,
offert, infi-
nuat.

)(:)(

Bona

Bono cum Deo!

IN MEDICINAM
SPIRITUUM.

Proëmium.

Spiritus esse sanitatis &
morborum subiectum.

Summaria.

1. Medicina ars longa. 2. Medicus perfectus.
3. Methodus docendi & discendi Medicinam. 4. Desiderium auctoris. 5. Institutistarum laus. 6. Omnis morbus unico curatur medicamento. 7. Vita, sanitas, morbus, consistit in Spiritibus. 8. Spiritus, medicinæ subiectum. 9. Sanitatis causa & morborum, sunt Spiritus. 10. Sanitatis formalitas est potentia, 11. Potentia in est Spiritibus. 12. Spirituum affectiones naturales. 13. Præternaturalis Spirituum constitutio consistit in tribus. 14. Medicinæ Spirituum præstantia. 15. Spiritus sunt mundus invisibilis. 16. Methodus agendarum & Elenchus.

1. **A**Rtem Medicam longam
esse & satis prolixam, olim
ex

ex publica cathedra in prælectionibus Methodi medendi prolixè demonstravi.

A perfecto enim hujus seculi Medico requiritur non superficialis duntaxat sanitatis, morborum & medicamentorum cognitio, sed amplissima insuper variarum rerum scientia.

2. Perfectus Medicus unà debet esse Logicus, ut habeat ratiocinandi, & unum ex alio colligendi habitum. Metaphysicus, ut sciat communes terminos. Astronomus, ut calleat temporum mutationes, vicissitudines & revolutiones. Astrologus, ut præsciat siderum influxus. Physicus, cùm, ubi desinit Physicus, Medicus incipiat. Artem nostram Medicam longam esse satis & prolixam, affirmant omnes unanimiter uno ore Medici. Hippocratis aphoristes inquit: *Ars longa.*

3. Cum primis autem ii qui Methodum docendi & discendi Medicinam præ aliis scripserunt, inter

quos etiam est Kyperus, qui integro volumine operosè ostendit, quæ discenda sunt omnia studioso & Medicinæ Candidato, priusquam nomen veri Medici mereatur.

4. Ego autem 28. hæctenus, & quod excurrit, ab hinc annis anxie desideravi; annon in compendium quoddam redigi possit universa nostra adeo operosa, & ex tot Medicorum voluminibus coagmentata Medicina?

5. Tentarunt illud, & quidem haut infelicitè Institutistæ, qui universam Medicinam in gratiam tyronum in compendium quoddam redegerunt, & in quinque partes dividerunt.

6. Ego verò hac Institutistarum industria nunquam satis laudanda nondum contentus, cœpi cogitare, annon in unicum aphorismum universa Medicina cogi possit & compingi? Legi enim & expertus sum, omnem morbum non rarò solâ natura, à nonnullis unico tantummodo

do medicamento amputari ; obripuit itaque mihi suspicio , omnem morbum in præternaturali constitutione unius entis consistere.

7. Re vel centies, pensius citro retroque considerata , pronunciavi tandem , sanitatem pariter & morbum, ipsam etiam vitam & mortem consistere in SPIRITIBUS, omnemque Medicinam unicè occupatam esse circa spiritus.

S P I R I T U S

8. Subiectum sunt Medicinæ, Spiritus subiectum sunt & causa efficiens sanitatis & morborum.

Institutistæ communiter subiectum Medicinæ statuunt corpus humanum , quatenus sanitate præditum est, & morbis obnoxium. Corpus autem humanum sanum nec dici, nec esse potest sine spiritibus, cum sine spiritibus (præsentem etiam animam) sit quasi merum cadaver, ut ex seqq. patebit.

9. Subiectum itaque & sanitatis causa efficiens sunt spiritus.

10. Sanitas ab Institutistis describitur ; quod sit potentia actiones exercendi. Sanitatis itaque formalitas est potentia naturales actiones exercendi : illa autem ipsa potentia non potest esse aut dici de corpore sanitate prædito, nisi spirituum præsidio, subsidio, beneficio. Spiritus enim sunt illi ipsi, qui in corpore animalium exercent illam ipsam potentiam : Spiritus sunt subjectum & causa efficiens principalis sanitatis, positis spiritibus radiantibus, ponitur vita, Sanitas & Morbus, amissis & extinctis, ponitur Mors.

11. Potentia, ut notum, est qualitas tantum & accidens : Illa autem potentia necesse est insit subjecto viventi, spiritibus nimirum, qui eam exercent. Morbus tanquam impotentia, necesse est, dicatur de subjecto quodam aliàs activo, nimirum spiritibus : Sanitas est in ente vivo, sanitatis subjectum sunt partes corporis viventis, partes autem corporis

ris

ris sine spiritibus viventes esse non possunt, quod apparet in membro sphacelo correpto, quod spiritibus destitutum Medicinæ non amplius capax est, sed tanquam cadaver & immedicabile vulnus ense recidendum est.

12. Sanitatis itaque subjectum sunt Spiritus. Affectiones Spirituum naturales sunt.

1. Vita seu vividitas, vigor, sensatio; vis generandi, vegetandi, sese multiplicandi in infinitum, creandi Ideas.

2. Subtilitas, tenuitas, teneritudo, penetrabilitas, pernicitas, homogeneitas, simplicitas, puritas, serenitas.

3. Caliditas, igneitas, lumen, luminositas, pelluciditas, claritas, radiatio, illuminatio.

4. Mobilitas, levitas, circulatio, irradiatio, velocitas, influxus, extensio, robur, activitas.

5. Humiditas, dulcedo.

De his fasius c. 18. libri hujus primi.

Ipsi autem morbi & symptomata sunt impotentia actiones naturales exercendi, à præternaturali Spirituum constitutione proveniens.

13. Præternaturalis autem Spirituum constitutio consistit

1. In qualitate; & quidem in densitate, spissitudine, crassitie, nigrore, obscuritate, tenebricositate, partim in impuritate & aciditate.

2. In quantitate aucta, seu copia; partim imminuta, seu defectu. 3. In motu concitato & imminuto; motu orgastico, intumescentiæ, iracundiæ; motu enormotico, & tandem motu trepidationis, vibrationis, convulsionis.

Hanc Spirituum p. n. constitutionem enucleabit uberius l. 2. c. 1.

14. Spirituum cognitio & doctrina exhaurit omnem Physices & Medicinarum scientiam & abyssum, nullius enim actionis naturalis & præternaturalis solida & genuina reddi potest causa, nisi ex Spirituum essentia, naturali & præternaturali
eorun-

eorundē constitutione , eoque nomine doctrinam hanc Medicis æque ac Physicis pronunciaui utilissimam.

Utramque ita paginam absolvent spiritus , in Medicina quicquid imposterum dicturi , in Physica & tota rerum natura autores semper spiritus allegabimus.

15. Cum videamus, mundū visibilem utrobique regi , gubernari & conservari ab invisibili.

Non memini doctrinam hanc à quopiam autore meritò esse tractatam. Sennertus aliquot paginis absoluit eam , Walæus aliquot paragraphis ; Bakius planè rejecit spiritus : Scitu tamen Medico cumprimis admodum necessariam scientiam hanc judicavi , cū , ut jam dictum , in naturali eorundem constitutione ipsa vita consistat ac sanitas ; in præternaturali autem morbus.

16. Priusquam autem ulterius pergamus, instituti nostri intentionem, methodum breviter, tractandorum delineabimus & exhibebi-

mus Elenchum, ut quid in posterum
in nova nostra & curiosa Spirituum
Medicina expectandum sit, maturè
norint Dnn. Studiosi Philiatrì.

Primò in prolegomenis agemus
de Spiritibus propriè ita dictis.
DEUS enim est, & dicitur Spiritus:
Genii sunt Spiritus; anima humana
est Spiritus.

LIBRO PRIMO, DE SPIRI-
TIBUS, corporibus subtilissimis,
tenuissimis acturi XII. capitibus
prioribus; 12. proponemus parado-
xa, & quidem

CAPITE I. PARADOXON
PRIMUM, *Brutorum formas
sen animas esse Spiritus materiales.*

CAP. II. Paradoxon 2. *Animas
vegetabiles esse Spiritus.*

CAP. III. Paradoxon 3. *Cælum esse
Spiritum.*

CAP. IV. Paradoxon 4. *Astra esse
Spiritus.*

CAP. V. Paradoxon 5. *Aerem esse
Spiritum.*

CAP. VI. Paradoxon 6. *Aerem a-
grotare.*

CAP.

CAP. VII. Paradoxon 7. *Ignem, lucem, lumen esse Spiritus.*

CAP. VIII. Paradoxon 8. *Omnia corpora coagulata esse ex Spiritibus.*

CAP. IX. Paradoxon 9. *Frigus esse Spiritum.*

CAP. X. Paradoxon 10. *Lunam esse frigoris fontem.*

CAP. XI. Paradoxon 11. *Tenebras esse Spiritus.*

CAP. XII. Paradoxon 12. *Ideas esse Spiritus.*

In sequentibus, de Spiritibus corporis humani, & eorundem Naturali constitutione cum primis & ex instituto acturi, & quidem

CAP. XIII. *De eorundem existentia.*

CAP. XIV. *De differentiis inter animam & Spiritus.*

CAP. XV. *De accidentalibus spirituum differentiis.*

CAP. XVI. *De definitione spiritus.*

CAP. XVII. *De Vita.*

CAP. XVIII. *De Sanitate, & naturali spirituum constitutione.*

Elencbus capitum.

CAP. XIX. *De Natura.*

CAP. XX. *De Temperamentis.*

CAP. XXI. *De Nutritione & Metempsychosi.*

CAP. XXII. *De sensibus externis.*

CAP. XXIII. *De generatione.*

CAP. XXIV. *De viribus Phantasiae & Ideis.*

CAP. XXV. *De moribus, Ingenio, Memoria, Indole, Sapientia, Iudicio, prudentia, eruditione.*

CAP. XXVI. *De Caeli & astrorum influentiis, nec non de spiritu universi.*

CAP. XXVII. *De Magnetismo & sympathismo.*

CAP. XXVIII. *De qualitatibus occultis, ceteroquin manifestis.*

CAP. XXIX. *De Fermentatione.*

CAP. XXX. *De Fascinatione.*

LIBER SECUNDUS

Morbidam seu p. n. Spirituum dispositionem, causas, curationes, & eorum ad naturalem statum reductionem exhibebit.

CAP.

Elenchus capitum.

- CAP. I. *Et seqq. agent. de praternaturali spirituum constitutione.*
- CAP. II. *Præponet Paradoxon unum; Aciditatem omnium morborum esse causam.*
- CAP. III. *Febres esse morbos spirituum.*
- CAP. IV. *De causis naturalis Et præternaturalis spirituum cōstitutionis.*
- CAP. V. *De Assumptis, vermibus, flatibus.*
- CAP. VI. *De Humoribus.*
- CAP. VII. *De Symptomacibus.*
- CAP. VIII. *De signis naturalis Et præternaturalis spirituum constitutionis.*
- CAP. IX. *De curationibus spirituum Et Indicationibus.*
- CAP. X. *recenset primum Remedium, NATURAM.*
- CAP. XI. *De Medico.*
- CAP. XII. *De dieta.*
- CAP. XIII. *De Inedia.*
- CAP. XIV. *De aeris mutatione.*
- CAP. XV. *De Balneis.*
- CAP. XVI. *De Externis.*

Elenchus capitum.

CAP. XVII. *De Vena sectione, purgatione, vomitione.*

CAP. XVIII. *De sudatione.*

CAP. XIX. *De Medicamentis & eorum requisitis.*

CAP. XX. *De genuina spirituum Medicina.*

CAP. XXI. *De Arcanis maioribus.*

CAP. XXII. *De Lapide Philosophorum.*

CAP. XXIII. *De Liquore Alkabel.*

CAP. XXIV. *De medicamentis radicaliter solutis, Corollato & auro potabili.*

CAP. XXV. *De Tinctura antimoni, sale Tartari volatili, & resuscitatione plantarum.*

CAP. XXVI. *De curatione spirituum diastatica.*

CAP. XXVII. *De curatione spirituum per Transplantationem.*

CAP. XXVIII. *De Amuletis.*

CAP. XXIX. *De vita longa & Palingenesias remediis.*

CAP. XXX. & Epilogus. *De morte hominis & mundi interitu.*

PRO-

PROLEGOMENA

agunt

DE SPIRITIBUS

propriè ita dictis.

1. Differentia Spirituum. 2. Deus est Spiritus. 3. Genii sunt Spiritus. 4. Geniorum lux & radiatio. 5. Dæmonum natura tenebricosa est. 6. Genii sunt in creaturarum serie. 7. Anima humana est Spiritus. 8. Deum habet parentem, & immortalis est. 9. Hinc magnetismus & animæ ad Deum desiderium. 10. Affectiones & idiomata à Deo quas habeat adhuc superstites. 11. Affectus humani brutales sunt, & animæ sensitivæ seu Spirituum actus. 12. Anima qualitatibus manifestis obnoxia non est, nec astrorum influentiis. 13. Cum corpore conjungitur mediatè. 14. Corpus est animæ habitaculum. 15. Status animæ separatae. 16. Ejus & geniorum loquela. 17. Radiat. 18. Conclusio & recapitulatio

προλεγόμενων.

1. **S**piritus sumitur tripliciter 1. pro eo, quod planè immutabile est, ut Deus. 2. pro eo, quod materiæ expers est, ut Angelus. 3. pro corpore tenui & subtilissimo.

2. Et primò quidem Spiritus est
& vo-

Genii sunt Spiritus.

& vocatur Deus, & quidem propriè, est enim Spiritus & essentia simplicissima, Spirituum Conditor; Hinc dicitur Pater luminum, Lux, Lumen inaccessibile, ignis consumens, què nemo videre potest, propter igneam vim consumtivam, quam exigua Spirituum nostrorum flammula perferre non potest.

3. II. Genii Spiritus sunt, à Deo, vel verbo vel nutu ex nihilo, aut ex certâ quadam materia maximè simplici, spirituali, lucida, ignea creati, hinc ob nimiam simplicitatem & subtilitatem non conspiciuntur, non secus ac aër, cœlum & ignis rarefactus invisibiles sunt.

4. Geniorum tamen lux concentrata & hinc visibilis adeo violentæ radiationis est, activitatis & penetrantiæ, ut Daniel sanctus Prophetâ conspectum Angeli perferre non potuerit, sed in animi deliquium ceciderit.

5. Lucida ea Geniorum natura post eorum lapsum maxima ex parte amissa

amissa est, & in tenebricosam, obscuram, horribilem, abominabilem, propter divinæ illuminationis privationem mutata. Non secus ac aër, licet lumen sit, in loco subterraneo aut camera obscura non illuminatus, fit tenebricosus; ita Dæmones post lapsum, ex privatione illuminationis divinæ quasi tenebre facti, seu tenebriones & tenebricolæ facti.

6. Genii qualescunque sint, cum sint in creaturarum & naturæ censu, supranaturalia patrare non possunt, sed naturalia tantum.

7. III. Anima revera est Spiritus, DEUS enim animam soli homini inspiravit;

8. Cum itaque DEUM habeat immediatè parentem, immortalis est, & in DEUM redit, à quo venit; propterea Adam dicitur filius DEI, eoque nomine etiam omnes homines hinc inde in sacris filii DEI dicuntur.

9. Hinc naturalis ille animæ immortalis

mortalis appetitus, desiderium, magnetismus , motus & tractus ad DEUM, à quo inspirata illa est , & infusa homini. In rebus quibuscunque caducis , sibi dissimilibus quietem reperire non potest, quiescit autem in solo DEO, autore, parente, productore suo, non secus ac ignis ob identitatem desiderat & tendit ad ignem , terra ad terram, flumina ad mare , aër ad aërem; ita naturali quasi instinctu, ductu , tractu, raptu, desiderio , divinæ particula auræ desiderat DEUM, & trahitur ad autorem suum, à quo creata est, & corpori inspirata. Corpus autem hominis terrestre , suo desiderio, appetitu & magnetismo terram , Spiritus aërem appetunt & astra.

10. Unà cum anima , tanquam divinæ auræ particula inspirata , inspiratum est homini lumen , bonitas, amor, charitas, misericordia, justitia generositas, imperium, creatio , præscientia, immortalitas. Quæ reliquæ

Anima est Spiritus.

reliquiæ adhuc sūt divinæ imaginis. Post lapsum enim amisso maximam partem, extincto, excellentissimo animæ lumine & splendore, amissæ unà sunt divinæ dotes, justitia originalis, notitia DEI certior, corporis immortalitas.

11. Affectus libidinis, iracundiæ, vindictæ, actus sunt merè brutales, fructus & producta Spirituum, seu animæ sensitivæ. Spiritus enim & eorum affectiones nobis cum brutis communes sunt.

12. Anima injuriis qualitatum elementarium obnoxia non est, hinc nec senescit, nec attenuatur aut imminuitur more Spirituum animantium: Nec astrorum influentiis, cum sit Spiritus immaterialis, afficitur, eæ enim non ingrediuntur constitutionem animæ, cum sit diviniore originis, & propterea nec symbolisatio est inter animam & astrorum influentias seu Spiritus.

13. Cum corpore conjungitur, non immediatè, sed mediantibus
Spiri-

Spiritibus , corpusculis minutissimis ; mediam naturam inter animam & corpus habentibus. Immediatè cum corpore non potest conjungi , cùm maxima sit latitudo inter animam , tanquam Spiritum immaterialem & inter corpus.

14. Corpus est animæ habitaculum , tabernaculum tenebricosum , laterna opaca , carcer tenebricolus : Ita Erasmus. *Corpus vestis est anima : Ipse Dominus IESUS suum corpus Templum appellat. Et Petrus Apostolus suum corpus tabernaculum. Nec defuerunt , qui corpus dixerunt animæ sepulcrum ; alii carcerem mentis appellarunt , nonnulli presidium velut arcem munitam , &c. Tu es anima corpus circumferens.*

15. Corpore soluta , liberè sine nebula , intuitivè DEUM intuetur omnipræsentem , Angelos , Dæmones , Genios videt , intelligit ad modum Geniorum , est in vel potius supra intelligentiarum & angelorum censum & conditionem , eâdem cum

cum Geniis , vel meliore , cum sublimioris sit originis , conditione gaudet.

16. Loquela Geniorum & animarum separatarum est cogitatio tantùm, idearum revolutio, fluctuatio rerum olim visarum, auditarum, quas ideas fluctuantes angeli & animæ mutuò intuentur : non secus ac somnians ideas, olim sibi impressas videt , cum iisdemque interloquitur.

17. Anima cùm sit lumen spirituale, non mirum, si in pathematibus & forti phantasia in instanti & perniciosissimè radiis radiat , & quasi fulgurat, & forti sua radiatione mirabilia sæpe patrat. Bartholinus in tr. de luce animalium p. 266. *Nec anima lucem inficiamur , sed à nostra luce mortali , mortalibusque aliis communi distinctam , diviniore originis & supra substantiarum sortem ferè evectam ; ab hac enim homines dicimur , ut parte altera principe.*


18. Scimus itaque DEUM homini inspirasse animam, hinc animam divinæ auræ particulam & divinam imaginem statuimus, & ratione divinæ originis immortalem esse, divinas habere dotes, quales sunt facultas creandi, id est, sese multiplicandi, quam communiter vocant generandi; habetque facultatem Ideas rerum & pathematum creandi, sibi que metipsi, Spiritibus & corpori, rebus etiam extra se positis easdem imprimendi, imò mirabilia multa, & penè divina alia, cum ea ipsa divina sit, patrandi.



E R R A T A.

In Titulo, pro magnetissimi lege magnetismi.

LIBRO PRIMO.

p.3.l.7. pro speciebus, lege spiritibus l.18. ante Metēps. pone, de p.4.l.1. pro Medicinale, l. Medicinalia, l.7. pro mercescētibus, l. marcescentibus. p.7.l.18. pro probatus, l. probatur. p.14. l.4. pro centratem l. centralem l.5. pro cosmapolita l. cosmopolita, p.15. dele tit. frontalem, & substitue, omnia corpora esse spirituosā. p.16.l.13. pro fulgines l. fuligines. p.19.20 & 21. numerus paragraphorū bis positus, semel deleatur. p.24 l.12. pro intemperatas, l. intemperatos. p.33.l.ult. pro cicuravia, l. cicutaria. p.45. §.6. pro eū, l. cūm. p.49.l.20. pro constititionem, l. constitutionem. l. seq. pro sapientia l. sapientia p.52.l.ult. pro tacti l. tactu p.53 l.7. pro falsi l. falsi l.14. pro enormantici l. enormontici. p.54 l.20. pro  pone ?. p.60.l.20. pro equestrant l. sequestrant p.71.l.14 pro saltantis l. saltantes. p.86.l.13. pro ἀσφοζία l. ἀσφουζία. p.87 l.10. pro fæti l. forti. p.104.l.11. dele & r. p.107 l. penult. pro loqui, l. coqui. p.100 l.12. post &, pone appetitus. p. eādē l. ult. pro capescendi, l. capeßendi. p.111.l.17. pro fontis, l. fortis. p.121.l.2. pro vegativam, l. vegetativā. p.140.l.16. pro validos lege rabidos. l.20. pro Catus, l. Canis. p.141.l.1. pro Thedo, l. Rhedo. p.154. l. penult. pro spiritus, l. spiritibus. p.155. l. antepenult. pro memorosi, l. memoriosi. p.174.l.16. pro clementa, l. elemento. p.178.l.4. post ut. pone, &. p.197.l.12. pro charitatem, l. claritatem. p.208.l.13 post Spiritus, pone Occasorum. p.213, l. antepenult. pro cardialgium, l.

cardialgiam. p. 219. l. 2. pro fugativi, l. fugitivi. p. 231. l. 16. pro alius l. aliis. p. 232. l. 9. pro foetioribus l. fortioribus. p. 236 l. 5. pro inter, lege intra.


LIBRO SECVNDO.

Pag. 6. l. 2. pro $\delta\iota\acute{\alpha}\delta\epsilon\sigma\iota\nu$ l. $\delta\iota\acute{\alpha}\theta\epsilon\sigma\iota\nu$. p. 10. l. 6. pro alidis, l. acidis. p. 14. l. 13. pro imminuta l. imminuti. ibid. l. 18. pro $\alpha\sigma\phi\iota\zeta\iota\alpha$ l. $\alpha\sigma\phi\upsilon\zeta\iota\alpha$. p. 19. l. 19. pro solivatores l. salivatores. p. 26. l. 16. pro actuum l. artuum. eadem l. antepenult. pro metam, l. metū. p. p. 45. l. 1. pro sacificationes, l. scarificationes, p. 47. l. 5. post sunt, pone, & p. 57. l. 12. pro copiosos, l. copiosas. pro qui lege quæ. p. 99. l. 5. dele, tu p. 102. l. antepen. pro citrei, l. citrini. p. 104. l. 1. pro cotripitur l. corrigitur. p. 114. l. 16. pro Hic, l. Sui. p. 127. In fronte, pro Media l. Inedia. p. 136. l. 17. pro rationes l. nationes. p. 158. l. 4. pro dotabit, l. dotavit. p. 160. l. 6. pro hyposcyamus, l. hyoscyamus. p. 166. l. 3. pro ærvinum, l. cervinum. p. 186. l. 21. pro vornicis l. vomicis. p. 191. l. ult. pro transibile, l. tangibile. p. 39. l. ult. pro connubii, l. connubia. p. 199. l. antepen. pro dissolubile, l. indissolubile. p. 203. l. 6. pro illa, l. ulla. p. eadem, l. 15. pro donat, l. domat. p. 210. l. 17. pro saxifragarum, l. saxifragorum. p. 222. pro Diuceltatossou, l. Diuceltatessou. p. 224. l. 2. pro radicatiōnis, l. radiationis. p. 225. l. 7. pro Elixivis, l. Elixiris. p. 229. l. 20. pro mistis, l. multis. p. 231. l. antepen. pro Non, l. Nos. p. 235. l. 11. pro ab, l. ob. p. 248. l. 2. pro indictum, l. indutum. p. eadē, l. 14. post hosce, pone, morbosos & p. 255. l. 20. pro turbas, l. herbas. p. 263. l. 13. pro \odot is, pone \ominus is. p. 264. l. ult. pro sufficatus, l. suffocatus. p. 274. l. 5. pro Becani l. Decani. p. 276. l. 17. post viperarum, pone, caro. p. 282. l. antepen. pro Luna, l. Lunæ.

IN INDICE.

Lit. A. lin. 1. pro 3. pone 9. A. lin. 18. pro 62. pone 26. lin. 31. pro 17. pone 15. F. lin. 8. pro 16. pone ibid. l. l. 3. pro 17. pone 12. M. l. 7. pro c. pone & l. 30. dele 16. O. l. 2. l. c. 22. §. 10. P. l. 2. pro c. 28. l. 29. Q. l. 1. pro c. 21. pone 28. R. l. 4. pro 1. pone 28, &c.

F I N I S.



LIBER PRIMVS.

DE SPIRITIBUS,
CORPORIBUS SUB-
TILISSIMIS, TENUIS-
SIMIS.

C A P U T I.

Paradoxon primum.

*Animam sensitivam esse Spiritum
materialelem.*

1. Anima sensitiva mortalis est. 2. Omnes
actiones animæ sensitivæ sunt à Spiriti-
bus. 3. Agunt pro organorum dispositio-
ne. 4. Facultates sublimiores habet à re-
rum Creatore. 5. Anima sensitiva seu Spi-
ritus sunt in sanguine. 6. Est merus ignis.

I.



Nimalia ex terracrea-
ta sunt, hinc anima
sensitiva materialis
est, & mortalis; nihil
aliud est, quàm Spiri-

tus, aut Spirituum congeries, cujus
beneficio animal vivit, sentit, mo-
vetur, omnesque reliquæ facultates

A

in

in animalibus per organa naturaliter disposita & constituta perficiuntur.

2. Omnes actiones naturales, vitales, animales, sensitivæ, à Spiritibus peraguntur, per organorum dispositiones. Hinc in harum actionum læsionibus & symptomatibus omnes curationes & remedia rectè adhibentur Spiritibus, & si culpa sit in organo, organis.

3. Spiritus, si habent organa robusta, qualia sunt in Leone, tauro, equo, animosum faciunt, & generosum reddunt animal; sin exigua, debilia, inermia, meticulosum, qualia in mure, lepore, vermiculis, sin organa habeant armata, qualia habent animalia unguibus, cornibus, dentibus, aculeis instructa, bellicosa sunt, audacia, ferocia, pugnacia.

4. Facultatem generandi, sese multiplicandi, animale corpus artificiosè formandi, originaliter habent à conditore, ex benedictione creationis.

5. Deus vesci prohibuit sanguine
ani-

animalium, cum anima, hoc est, Spiritus sint in sanguine; ubi per animam Spiritus eorum intelliguntur, qui confertim & in copia in sanguine generantur. Ratio prohibitionis forsan est, quod mortis formido & idea speciebus impressa, Spiritus vescentium trepidantes reddat, meticulosos & convulsivos. De luce animantium (quæ lux ex eorum radiat Spiritibus) curiosum lege tractatum Ingeniosi Bartholini & Vossii, qui doctrinam, quam in libro suo de lumine docuit, defendit, & monstrat, animalium animam non esse nisi ignem.

6. Plura de anima sensitiva materiali vide c. 21. Metempsychosi Pythagorica §. 8.9.

C A P U T II.

Paradoxon secundum.

Animas vegetabilium esse meros Spiritus.

1. Vegetabilia per Spiritus vegetantur & vivunt, 2. Stata suæ nutritionis habent

tempora. 3. Medicinales sunt ratione Spirituum.

1. **V**egtabilium animæ meri sunt Spiritus, Spirituum enim beneficio vitam suam vivunt, crescunt, augentur, vegetantur, multiplicantur: mercescentibus Spiritibus, intereunt, moriuntur; Facultatem & desiderium sese multiplicandi habent ex benedictione gloriosi Conditoris. Schröderus in Pharmacopœa sua l. i. c. 5. *Spiritus nihil aliud est, inquit, quam principium cujuscunque rei formale, actionumque scaturigo.*

2. Vegetabilia post mediam noctem succum attrahunt: sole oriente, & in hæmisphærio orientali existente, crescunt; post meridiem maturant, coquunt & sibi assimulant alimentum. Remita se habere, norunt mecum ii, qui non nudis dumtaxat ratiociniis indulgent, sed certis demonstrationum & experientiarum fulcris observationes suas stabiliunt.

3. Spi-

3. Spiritus vegetabilium distinctè medicinales sunt, ratione diversæ dispositionis : alia enim Spiritus habent serenos, tenues, subtiles, puros, simplices, igneos; alia spissos, crassos, obscuros, tenebricosos, impuros, &c. plura de his animabus vid. c. 21.

C A P U T I I I.

Paradoxon tertium.

Cælum esse Spiritum.

1. Cælum est quinta essentia. 2. Est expansum immensum. 3. Agit more Spirituum.

1. **C**ælum, cum etiam Aristoteli sit, & vocetur quinta essentia, corporum ordini eximere, & in Spirituum classem promovere debuimus; Est enim ingenerabile, incorruptibile.

2. Hebræis dicitur Rakia, expansum, per expansionem, & nimiam extenuationem in immensum, factum est Spiritus subtilissimus, tenuissimus; non secus ac Chymici corpora

attenuatione per ignem redigunt in Spiritus, eodem modo & cœlimateria attenuatione, merus evasit Spiritus, seu corpus subtilissimum, tenuissimum. Hinc quicquid agit cœlum, more Spirituum agit, de ejus actione vide libri hujus c. 26. §. 2

C A P U T I V.

Paradoxon quartum.

Astra esse Spiritus & ignes concentratos.

1. Astra radiant ignes. 2. Probatur mechanice. 3. Testimonio antiquissimæ Turbæ.

1. **A**stra nihil aliud sunt, quàm ignes conglobati, compacti, concentrati, nihilque de se radiant & spargunt, quàm ignes, Spiritus.

2. Hoc patet in Sole ejusque radiis, qui ignei sunt, imò concentrati merus ignis.

3. Idem statuit antiquissima Philosophorum Turba, seu synodus tertia Pythagorica, in quâ vir optimi consilii Iximindrus Senex. *Doceo*

vos,

*vos, inquit, stellas esse igneas. Helm. sub tit. in Sole tabernaculum. Ostendi, inquit, Solares radios per vitrum unitos esse verum ignem. Sira-
dii luminares connexi, sint verus ignis & ardeant, Sol quoque necessario tan-
quam connexorum radiorum centrum ipsum erit longè ferventissimus. Sol ignis ferventissimus luminum creato-
rum principale in Natura. Sol ignis est in se & prope. De astrorum vir-
tutibus & influentiis vide plura l. i. c. 26. §. 8. & seqq.*

C A P U T. V.

Paradoxon quintum.

Aërem esse Spiritum.

1. Aër est cœlum. 2. Est Spiritus sensatus.
3. Probatus mechanicè. 4. Testimonio Turbæ.

1. **A** Er, teste scriptura sacra, nihil aliud est quàm cœlum, nec à cœlo differt nisi impuritate, efflu-
viorum mistione & iniquatione.

2. Est Spiritus sensatus, quia sen-
tit & afficitur calore & frigore, non

secus ac alii Spiritus sensibiles. Fovetur, extenditur, rarefcit, dilatatur virtute & activitate, ignis Solaris; offenditur, contrahitur, spiffatur frigore.

3. Hoc evidenter demonftrant Thermoscopia, in quibus rarefactio, aëris extenfio, compressio, contractio manifestè confpicitur.

4. Hæc olim nota fuerunt antiquiffimis Philosophis. Iximindrus, in Turba, inquit: *Aër spiffatur, cum ab eo Sol prolongatur, Et tunc hominibus frigus pervenit, aëre verò rarefcente calor pervenit hominibus.*

C A P U T VI.

Paradoxon sextum.

Aër ægrotat.

1. Quæritur an fic? 2. Interdum densatur aër, iterumque rarefcit. 3. Morbidus fit & ægrotat. 4. Febre algida. 5. Probatur fixarum fcintillatione. 6. Febre intermittente & continua cum exacerbatione, 7. Incorruptibilis tamen est.

Quari posset à curiosis, an aër interdum ægrotet? Respondeo, quod

quod sic, cùm aër tanquam Spiritus necessariò sentiat.

2. Patet hoc ex ejus contractione, condensatione, inspissatione, quâ sentit, fugit hyberno tempore frigoris injurias; æstivo autem tempore incalescit, extenditur, expanditur fotu, radiis & calore Solis.

3. Quatenus itaque aër ceu Spiritus sentiens præternaturaliter constituitur, densior redditur, spissior, crassior, obscurior, impurior, à calore & frigore excessivo afficitur, vibratione & trepidatione horret & concutitur, eatenus morbidus & ægrotare dicitur.

4. Et quidem hyeme febre algida:

5. Ex frigore enim aërem cum horrore quodam algere vel frigere patet, quòd tunc stellæ fixæ magis scintillare videantur, quàm æstate, quæ scintillationis ratio non est in stellis, sed in aëre sensato cum horrore febrienti.

6. Vere febre laborat intermitte, propter vicissitudines frigoris

A 5

& ca-

& caloris; æstate, calidâ, continua cum exacerbatione caloris.

7. Corruptibilis tamen non potest dici propter suam siccitatem, effluvia tamen terrestria in aëre corrumpuntur & putrescunt, confer cap. 27. §. 15.

C A P U T VII.

Paradoxon septimum.

Ignem, lucem, lumen, radios, esse Spiritus.

1. Ignis non potest tangi. 2. Igne conservantur nostri Spiritus. 3. Ignis invisibiliter latet in creaturis. 4. Spiritus est, asserente L. de Comitibus. 5. Tendit sursum. 6. Humidus etiam est.

I. **I**gnis, lux primigenia concentrata, corpus est subtilissimum, actuosissimum, siccissimum, edacissimum, quod tangi non potest, à nobis in ordinem & seriem Spirituum promotus est. Ignis est Spiritus, & Spiritus est ignis.

2. Igne ob similitudinem & identitatem

titatem Spiritus fovetur , conservantur , multiplicantur. Ignes in terra , & Spiritus in rebus naturalibus latitant invisibiliter.

3. Ignis ex internis rerum Spiritibus elicitur. Ignis iterum in Spiritus resolvitur invisibiles : totus mundus plenus est igne & conservatur Spiritibus. L. de Comitibus in tr. de metall. p. 127.

4. *Notandum erit, inquit, ignem spiritualis esse substantiæ, hoc est, corporeis dimensionibus non esse subiectum, nisi per accidens, dum in corpus accipitur; at in naturali suo statu nullius dimensionis esse participem, demonstratum est in Physicis.*

5. Ignis sursum tendit ratione identitatis cum Sole & astris , ceu ignis, lucis, omnis luminis fontibus , à quibus in hæc inferiora radiat , influat & derivatur , iterumque naturali instinctu eò revertitur.

Lux etiam Spiritus est, lumen, radii, calor, influentiæ astrorum sunt ignis Spiritualis, hoc est, subtilissi-

mus, extenuatus, extensus, expansus, emissitius, radians ex igne, Sole, & astrorum corporibus.

6. Siccus dicitur ignis à superante ejus siccitate, humidus tamen est quodammodo, nullibi enim existit, subsistit, visibilis est, nisi in humidis, in Solis & astrorum corporibus suum habet nutrimentum & sustentationem in flagrabili; in sublunari- bus & rebus naturalibus è terra nascentibus in pingui, æreo, oleoso. Sicut enim Spiritus vini humidus ignis est & totus conflagrabilis, ita & omnes alii ignes. Color ignis diversus est, è diversitate humidi, pinguis, ærei, oleosi, cum eo combinati, & commisti. Chymici, ipse Hipp. ignes statuunt humidos.

C A P U T VIII.

Paradoxon octavum.

Omnia corpora esse spiritiosa, ex Spiritibus coagulata.

1. Terra in se habet Spiritum. 2. Ex foliis arefactis

arefactis semina format. 3. Experimentum auctoris. 4. Terra ignem continet, quo mineralia fovet. 5. Analyses Chemicæ docent, corpora constare ex Spiritibus. 6. Inflammabiles enim sunt, conflagrabiles, medicamentosi. 7. Veteres vocarunt atomos. 8. Declaratur per exempla mechanicè. 9. Mercurius, Mercurialia, & æreæ Spiritus sunt.

1. **N**ON autem jam enumerata solùm Spiritus sunt, universa Natura plena est Spiritibus, imò ex Spiritibus coaluit.

2. Ipsa terra, quæ caput mortuum multis videtur, suum in se habet Spiritum prolificum, cujus bonitate, sollicitudine, activitate semina producit & excludit.

3. Id quod aliquoties observavi, quando Novembri folia brassicæ rubræ ex infima caulis parte, flaventia, flaccida, decidua, decerpsi, convolvi, involuta obsoleto linteo, strenuè funiculo constricto, sub terram defodi, vere iterum erui: inveni corruptorum foliorum fibris ad hæ-

fisse brassicæ semina. Idem mihi evenit cum foliis calendulæ.

4. Terra ignem suum habet concentratam, ex quo horribiles sæpè flammæ eructat, ut Cosmapolita in 12. suis tractatibus, nec non Kircherus in mundo subterraneo demonstrant. In sinu suo fovet mineralia, per Spiritum suum semetipsam metallis imprægnat, & gemmis, quæ astra sunt terrestria, lucem habent, radios de se spargunt: imò nullum corpus naturale est, suum quod non habeat lumen, universa Natura plena est, gubernatur, conservatur Spiritibus.

5. Demum omnia corpora naturalia coagulata esse & composita ex atomis seu Spiritibus subtilissimis, actuosissimis, evincunt analyses, solutiones & resolutiones, cum primis chemicæ, quæ per communem hujus mundi tortorem fiunt, Ignem, optimum analystam, qui omnia coagulata resolvit in sua principia, seu partes subtilissimas, quas Spiritus dicimus,

dicimus, qui corporum subtilissimæ
particulæ, per fermentationem, de-
stillationem & sublimationem vi
ignis ex animalibus, vegetabilibus
& mineralibus, exprimuntur, ignei
sunt, inflammabiles, medica-
mentosi.

6. Subtilissimas hæc corporum
particulas veteres & neoterici non-
nulli atomos vocitant, nos autem
cùm actuosissimæ sint, Spiritus eas
appellitamus.

8. Quando, v.g. igni carbonum
subjicio sulphur vivum, vel resinam
quandam; illa resina & sulphur re-
solvitur vi ignis in fumum, hoc est,
in partes subtilissimas, tenuissimas:
resinæ enim vel sulphuris vivi, grani
piperis magnitudine, particula re-
solvitur, & adeo extenditur, ut fu-
mus ejus, Spiritus seu atomi reple-
ant, integrum occupent & sat capax
conclave: hanc autem fumositatem
Spiritus esse medicinales, evincunt,
i. ipsi Medici, qui in peste aliisque
multis morbis instituunt & præscri-
bunt

bunt talia suffimigia, cum primis autem in morbis mulierum & puerorum. 3. Odor gratus & ingratus, afficiens corporis nostri Spiritus. 3. Inflammabilitas.

9. Idcirco in Spirituum familiam, & alia meritò possemus recipere, v. g. Mercurium, seu argentum vivum, qui merus est penetrantissimus Spiritus, præsertim in fumum si resolvatur: Antimonium & commune, arsenicum, aliaque mineralia & gummata, quæ, si in fulgines & subtilissimas atomos ignis vigore redigantur efficacissimos esse Spiritus, olim in terrâ coagulatos, tota die deprehendimus.

C A P U T I X.

Paradoxon nonum.

Frigus esse ignem, & Spiritum frigidum.

1. Frigus esse substantiam, demonstratur. 2. Agit in omnes res naturales. 3. Supprimat & sufflaminat quasi plantarum vegetationem.

rationem. 4. Agit in ignem. 5. Omnes Spiritus fugiunt & horrent frigus. 6. Aër & aqua. 7. Vastus Oceanus. 8. Terra. 9. Gelu metalla contrahuntur. 10. Manifestæ frigoris actiones. 11. Frigus est ignis frigidus. 12. Demonstratur.

PLura adhuc tentabo paradoxa, ut eò melius Spirituum innotescat formalitas, natura, & eorundem medicina. In ordinem Spirituum promovebo FRIGUS & TENEBRAS, necnon IDEAS. Inaudita ut ut sunt, nemini tamen cavilandi vel calumniandi, opponendi tamen, & in naturam inquirendi potius suppeditabo ansam.

1. Et primò quidem FRIGUS substantiam esse spirituales mihi incumbit probare, sequenti modo.

Frigus & æstus seu calor sunt opposita, ipso JEHOVAH ita dictante Genes. 8. v. ult. Cunctis diebus terræ sementis & messis, frigus & æstus, æstas & hyems, nox & dies nō requiescent. Oppositorū autem eadem est ratio, sciētia & disciplina. Cognitione itaque caloris, perveniemus in
cogni-

cognitionem frigoris. Ratio caloris est substantia, ratio itaque frigoris seu frigiditatis etiam erit substantia. Calorem ignis, esse substantiam, præcipui hujus seculi Philosophi probant.

2. Frigus substantiam esse paradoxon hæctenus est. Probo tamen inde, 1. quia grando, nix, glacies, gelu, frigus, laudant Deum, teste Scriptura. 2. quia agit in omnes res naturales, in hominem, animalia & vegetabilia, in elementa, ignem, aërem, aquam, terram & elementata, utique ergo erit substantia. Actio illa sensibus est manifestissima, & primò quidem activitas, actio & vis frigoris in hominem animalium calores seu Spiritus sese exerit, extinguendo, suffocando, fugando eos: Spiritus calidi, ad occursum & invasionem frigoris, tanquam hostis, horrore horrent, trepidant, sese contrahunt, concentrant, fugam meditantur à frigore, tanquam substantia sibi inimicis-

micissima, è diametro sibi contraria, offensissima, internecionem, extinctionem, mortem & interitum minitanti, iisdemque molienti. Jugulat frigoris substantia homines, animalia, & vegetabilia, activitate sua & igne frigido, Spiritus calidos fugando, è corpore excludendo, ejiciendo, exturbando. 3. tyrannidem suam substantia frigoris non minus in animalia, quam vegetabilia exerit.

3. Hyeme enim Spiritus vegetabiles sese contrahunt, vegetatio cessat, attractio humoris alimentarii præ metu & timore sopita est, augmentatio itaque occulta est & latet.

4. Imperium sibi arrogat Frigus in Ignem, ita ut intensissimum candelam extinguat. Calor, absente Sole, & ignis in aëre, vel fontem suum repetit, vel in terram, sese insinuat & abscondit, hinc loca subterranea hyeme calida sunt, propter circumstans in superficie frigus,

gus , ceu hostis debilem ignem ob-
sidens.

5. 5. Omnes Spiritus calidi fri-
goris fugiunt injurias , quod ex eo-
rundem concentratione apparet , e.
g. Spiritus vini , in vini & dolii cen-
trum sese subducunt & concentrant.
Cum primis autem frigus non nu-
dam esse privationem , sed substan-
tiam maximè activam , demonstrant
horrores febrium & rigores. In iis
deprehendimus frigus agere in Spi-
ritus calidos , tali cum impetu & vio-
lentia , ut pro avertendis frigoris
injuriis & activitatibus , universum
concutiant corpus , tot pulvinari-
bus calorem revocantibus involu-
tum , ut autem tenebræ lumini , ita
frigus tandem cedit calori.

6. Aër etiam metuit & fugit
frigoris injurias & imperium , ut
patet ex thermoscopiis. 6. Aqua
lorica sese contra hostile frigus ar-
mat , defendit , fluidam suam de-
ferit & negligit naturam , & in du-
ram sese commutat glaciem. Oleum
nun-

nunquam congelat , merus enim spiritus est, & ignis penitus confla-
grabilis, idcirco ingelabile est.

7. 7. Ingens & vastus Oceanus,
ad occursum Lunæ & ejusdem ra-
dios frigidos contrahit sese , & ob
compressionem seu potius fugam
limites suos & littora transgreditur
in fluxu maris. Ea forsan ratio est,
quod terra sub polis ; seu potius
mare glaciale, oceanus hyperboreus
acuminatus sit & ovalis , propter
fugam aquarum , & à frigoribus
constrictionem.

8. 8. Terra adeo sese contra fri-
gus contrahit , ut aquam , quam
paulò ante imbiberat , iterum ex-
primat , & siccior permanere malit
sola , & tamen gelu in ipsam terram
ad duas interdum ulnas penetrat.

9. 9. Omnia omnino metalla
gelu contrahuntur. Videtur qui-
dem res valde admiranda , quamq;
vix erunt , qui credent. Azutus
verò experientiam ejus instituit , &
observavit tubum ex bractea ferrea
confe-

confectum 1 2. pedes longum, frigori expositum ad duos etiam articulos fuisse decurtatum.

Frigus itaque non nudam duntaxat privationem, sed substantiam esse in omnia sublunaria actualem, imperiosam satis & injuriosam probavi ex actionibus ejus, quæ satis manifestè sensibus sentiuntur.

10. Sicut enim ignis Solis calidus agit, urit, exsiccatur, consumit, mortificatur; eodem etiam modo & frigus seu ignis frigidus excessivus agit, exsiccatur, urit, Spiritus extinguit, mortificatur, fugat, exterminat, ejicit, idcirco egelida minus spirituosæ, alimentosæ, & salubria sunt, ac non gelata, paucioresque in destillatione fundunt Spiritus. Spiritus frigoris catarrhorum causa est, fugat enim & necat Spiritus calidos, quibus fugatis sequitur colliquatio affluentis alimenti.

Jam ulterius investigare debemus, quo nomine appellitanda sit, & unde ad nos deferatur substantia

stantia illa frigida , seu ignis frigidus.

11. Cùm oppositorum eadem sit ratio , scientia & disciplina , respondemus , ut calor est ignis Solis seu Solaris , qui calidus est , & à Sole tanquam fonte ad nos radiat ; ex opposito Frigus erit ignis frigidus ex Luna ad nos demissus.

12. Frigus frigidum ignem esse monstrabo ex igne calido ; calidus ignis ; 1. urit ; frigidus ignis etiam urit ; vere adurit tenera germina. In Insulis Antillis durante hyeme omnia progerminant , agriq; omnes sunt virides. Durante verò æstate , plantæ maximam partem intermoriuntur , arboresque foliis destituuntur. Ex quibus patet excessum caloris in istis Insulis eosdem producere effectus , quos frigoris excessus in Europa , ut enim Sol urit & adurit in Antillis omnia vegetabilia , eodem modo & frigus in nostris regionibus. 2. Ignis calidus exsiccat , eodem etiam modo & frigidus ;
madida

madida linteamina frigore siccantur. 3. Ignis calidus dolorem infert & exulcerat : Ignis frigidus dolorem infert & exulcerationem. 4. Ignis calidus excessivus mortificat res naturales : ignis frigidus easdem calamitates rebus inferre valet. Ignis & calor moderatus fovet, formant Spiritus : frigus modificatum seu aura frigidiuscula refrigerat, temperat æstuantem aërem, intemperatas, ferventes, luxuriantes, ferocientes Spiritus. Sicut itaque ignis calidus agit, exsiccat, urit, dolorem infert, consumit, mortificat: eodem etiam modo ignis frigidus agit, exsiccat, urit, Spiritus fugat, mortificat.

C A P U T X.

Paradoxon decimum.

Frigoris fontem esse LUNAM.

1. Radii Lunares concentrati frigidi sunt.
2. Urunt. 3. Noxii sunt valetudini. 4. Ignis frigidus modificatus naturæ conveniens

niēs est. 5. Ignis frigidus est in superioribus & inferioribus. 6. Gratus est 7. Suppolarem terram reddit inhabitabilem. 8. Ignes in inferioribus frigidi. 9. In hominibus. 10. In moribundis & cadaveribus. 11. In mineralibus. 12. In aquis & aquatilibus. 13. Animalibus. 14. Vegetabilibus.

T Andem curiosi seriò desiderabunt fontem ignis frigidi. Ego, ut dixi, alium in rerum natura, qui tam inexhausta, Spiritus frigidos eructat catarrhacta, non invenio, nisi Lunam. Quem admodum enim, Sol fons est ignis calidi: ita Luna erit, fons frigidi ignis.

1. Frigus autem esse Spiritum Lunarem monstrabo, 1. per mechanici. Radii Lunares collecti per lentem seu speculum concavum, frigidi sunt, & igne suo frigido Spiritus, verrucarum vegetantes enecant.

2. Luna urit, non calore, ergo frigiditate: ita inquit Psalmista Regius, Psalmo 120. *Per diem Sol non uret te, neque Luna per noctem. vel. Interdum Sol non percutiet te, & Luna*

in nocte. Quicunque igitur radii Lunares urunt, percutiunt, ignis sunt frigidus.

3. 3. Quia Lunæ radii, α . dolorem inferunt capiti, β . ingenii stupiditatem. γ . capitis imbecillitates, aliaqua valetudinis incommoda. δ . cadavera iis exposita, ranamque, ut Helmontius perhibet, in gluten aquaticum liquefaciunt.

4. Distinctio autem inter ignem calidum & frigidum nullam mihi videtur inferre absurditatem, cum uterque Ignis naturalis, modificatus, æque naturæ conveniens sit, gratus, & pro conservandis sublunariis summè necessarius; calidus quidem pro modificando frigore, frigidus, pro temperandis Solis ardoribus; excessivus uterque, urens, consumens, tortor, rerum sublunarium Analysta.

Talis ignis frigidus est & reperitur in superioribus & inferioribus. In superioribus satellites eo nomine planetis sunt associati, qui talem viden-

videntur habere ignem frigidum, pro modificando igne Solis calido excessivo, comburente: Satellites huius habet, circulos nimirum, aut appendices. His satellites, sidera Medicæa, frigidam ei afflant auram. Quis benigna & Mercurius Solis individui comites calorem Solarem mitigant & temperant. Ortis laterones nondum visi, forsan ii alii seculo microscopiâ, exquisitissimis instrumentis detegendi, reservati. Luna terræ proximissima est, ejus quasi ancilla, flabello suo frigidam terræ auram afflat, pro temperando Solis calore, quam auram Cosmopolita aërem vocat; ita enim loquitur tr. II. *Solem cœlestem & ejus calorem temperat aer, qui de die in diem circumvolat orbem: & nisi hoc esset, calore tali res omnes consumerentur, nec quicquam nasceretur.* Hermes inquit; *Quod est superius, est sicut id, quod est inferius, & quod est inferius, est sicut id, quod est superius.* Si itaque in superiore

B 2 riori-

rioribus ignis datur calidus & frigidus , utique vigore Philosophiæ Hermeticæ etiam in inferioribus tales habebuntur ignes , & vice versa. Necesse enim est mutuas caloris esse & frigoris modificationes, vicissitudines, alioquin ignis Solaris omnia combureret , perinde ac intensû frig⁹ omnia extingueret & enecaret.

6. Ignis Lunar^{is} frigidus per inspirationem attractus corporis nostri Spiritibus gratus est , eos refrigerat, & cû eis circulatur, quæ refrigeratio seu refrigerium notabiliter in ferventissima æstate , intemperie Spirituum calida , & febribus cum delectatione & levamine percipitur. Ignis hujus frigidi activitas apparet, & cum primis sensibilis est hyeme, quando ☉ à nobis elongatur in signis australibus ; quando radiis suis obliquis , minus reciprocantibus, repercutientibus, minus frigori seu radiis resistit Lunaribus.

7. Frigus itaque quod terras sub polis sitas affligit & inhabitabiles

les reddit, est ignis Lunæ frigidus, qui radiis obtusioribus solaribus non temperatur; quod frigus per ventos Boreales nobiscum etiam æstate communicatur, & tunc dicuntur Etesiae. Ille ignis frigidus verno tempore facultatem habet tenerissima vegetabilium germina & Spiritus comburendi, ejiciendi: hinc ariditas & mors, quæ sæpe vegetabilibus accidit ex Boreali frigore, Germanis ex frigoris ustione evenisse dicitur. Quod autem frigus in Zona frigida, absente Lunâ, præsentente Sole continuatur; respondeo, Solem radiis suis obliquis imparem esse discutiendo omnes Spiritus frigidos, ut in Zona temperata, ita etiam in frigida. Ratio autem, cur hyems unius non æque sit frigida, ac alterius anni, eadem est, cur æstas unius anni non æque calida sit ac alterius. Ea in trivio Philosophis cognita sunt. Sufficit mihi, quòd sciam, quòd fons omnis caloris sit ☉ igneus, quo cognito, necesse est fri-

goris etiam dari fontem , quem invenire boni est & sagacis Philosophi.

8. Secundum itaque Hermetem in inferioribus etiam & sublunaribus dantur, sensibusque deprehenduntur ignes frigidi.

9. Et, 1. quidem in Homine. Hominem habere Spiritus frigidos, patet sensu tactus; quando enim calore circa viscera concentrato, corporis humani extrema tangimus, frigida ea deprehendimus, sensibilibiter illud activum frigus in februm horroribus apparet.

10. Cum primis autem Spiritus esse & dari frigidos etiam in corpore humano, convincimur in moribundis, in Morte, post mortem tacta deprehenditur totius corporis frigiditas seu Spiritus frigidi, qui, prout in moribundis facultatem habuerunt Spiritus vitales è corpore ejiciendi, ita eandem post mortem retinent corporis alterius cujusdam vivi Spiritus calidos fugandi, necandi, malitiam & invidiam extinguendi,

guendi, quemadmodum patet ex
nævis maternis, quos tollunt, ut
docet de Peste, p. 41. Helmontius.
Et omnis necromantia, quæ per
mortuorum cadavera exercetur,
dependet ex Spiritibus corporum
seu cadaverum frigidis. Et exinde
inveniri posset Medicina hæcenus
incognita, pro coërcendis Spiriti-
bus morboſis, enormonticis, copiâ,
caliditate & orgasmo peccantibus.
Isti frigidi Spiritus forſan nigri ſunt
& tenebricoſi, cùm facultatem ha-
beant extinguendi corporis noſtri
Spiritus radiantes. Ipſa Luna, So-
lari lumine ſpoliata, umbræ terræ
immerſa, tenebricoſa conſpicitur
& picea.

II. In mineralibus & metallis
ſunt ignes frigidi. De igne matallo-
rum frigido ante aliquot ſecula
ſcripſit Baſilius Valentinus Mona-
chus in teſtam. ſuo ult. l. i. c. 48. U-
terque ignis frigidus & calidus de-
prehenditur in metallis, etiam in
Mercurio, qui extra tactu frigidiffi-

mus est, in se tamen Spiritus igneus; quo minus itaque urat tangentis manus, modificatur igne frigido; qui Lunæ igni assimilatur, eadem ratio est in auro, & reliquis metallis, in quibus extra frigiditas tactu deprehenditur, cum tamen in se meri sint ignes, & Spiritus ignei: tale frigus externum percipitur in lapidibus pretiosis, in sale nitri, in combinatione * cum ☉ e comuni, &c.

12. Tale frigus est in aquis, vino, cerevisia, quo Spirituum nostrorum mitigamus fervores: in ipso etiam mari, quod sub Lunæ dicitur esse imperio, idcirco per orgasmum ad Lunæ occursum videtur moveri Oceanus: hinc etiam alia frigida, quæ Lunæ subsunt, e. g. cochleæ, ostreæ, cancri, Luna plena crescunt, intumescunt, ob magnetismum, similitudinem, identitatem, sympathetismum, & consensum mutuum Lunæ cum Lunaribus.

Tale frigus habent & aquatilia alia, pisces, pisciculus Galere maximè

ximè frigidus, in Antillarum insulis communis; ranæ, anguillæ, torpedo, cujusvis stupefactiva in Spiritibus frigidis consistit, quos emittit, iisdemque extinguere conatur, obfuscare, & fugare radiationem calidorum Spirituum. Agit iste ignis frigidus per rete, per baculum ligneum, non secus ac ignis calidus per baculum ferreum. Sanguis testudinis marinæ multo frigidior est, quam ulla aqua, quæ haberi potest in illis Insulis. Interim tamen pulsus sentiunt cordis tam validum, artériasq; tam firmas habent, quàm ullum unquam animal.

13. Terrestria frigida sunt; viperæ, serpentes, ranæ, salamandra indicus, qui saliva sua carbones extinguit, duarum horarum spatio & ultra ab ignis violentia se vivum conservat.

Vegetabilia frigida sunt; opium, papaverina, lactuca, lactescentia, cichoracea, intybacea, tragopogon, scorzonera, cicuta, cicutavia,

aliaque frigefacientia. Omnia itaq; sublunaria ignem in se habent non calidum tantum, verum etiam frigidum: ita Helmontius sub tit. formarum ortus. p. 148. §. 89. inquit: *per Alkabeſt ſciri poteſt, quantum Luminariſ partem vegetabile (etiam incognitum, contuſum & ſitu obductum) poſſideat.*

C A P U T X I.

Paradoxon undecimum.

Tenebras eſſe ſubſtantiam ſpiritualem.

1. Deus ſeperavit Lucem à tenebris. 2. Tenebræ & lumen opponuntur. 3. Conſpiciuntur. 4. Palpabiles ſunt. 5. Antipathia eſt inter Spiritus & tenebras. 6. Melancholici amant tenebras, & quare? 7. Pueri meticuloſi ſunt in tenebris. 8. Tenebriſoſa in ſublunaribus.

IN ſoliti jam paradoxo inſolentia demonſtranda venit: **TENEBRAS** eſſe ſubſtantiam ſpiritualem activam. Patet hoc ſtatim.

1. Ex libro creationis, ex quo manifeſtum eſt, Deum ſeparaviſſe lucem

lucem à tenebris, quæ in principio fuerunt super faciem abyssi. Ista autem separatio non fuit accidentium, nedum creatio aut separatio privationis, sed substantiarum: tenebras enim Deus vocavit noctem, cum nocturno tempore maximè in sensus incurrant, Lucem autem Diem. Deus in Esaia dicit, se creasse lucem & tenebras.

2. Nox & dies, hoc est, tenebræ & lumen sibi opponuntur distante ipso JEHOVAH, Genes. 8. vers. ult. Si itaque lumen substantia est, prout titulo de igne demonstravimus, utique etiam tenebræ. Lux & tenebræ laudant Deum, testantibus viris sanctis in fornace ignea, ergo sensatæ sint necesse est; omnis Spiritus laudet Deum, inquit Psalmista in epiphonemate suo.

3. Sicut umbra de die, ita tenebræ crassæ noctu conspiciuntur. Substantiæ autem secundum neotericos conspiciuntur, secundum alios substantiæ beneficio, & medianti-

bus accidentibus in sensus cadunt. Necessariò itaque tenebræ sub se trahebunt substantiam. Ut umbra, ita tenebræ nigro conspiciuntur colore, etiam in ipso meridie sunt in cœlo, supra Lunæ concavum, etiam in aëre; propter eminentiam tamen & abundantiam Luminis Solaris & astrorum evanescent: post luminis exclusionem iterum apparent, v. g. in camera obscura. Lux penetrat tenebras, & aërem tenebricosum, non secus ac ignis ferrum candens, lumen solis aut ignis aërem.

4. Tenebræ concentratæ sunt palpabiles, quod patet ex tenebris Ægyptiacis, de quibus Exodi. 10. v. 21. ita enim dixit DOMINUS ad Moysen: Extende manum tuam in cœlum, & sint tenebræ super terram Ægypti tam densæ, ut palpari queant. Juxta Sap. c. 17. adeo crassæ fuerunt, ut nulla ignis vis, nec limpida siderum flammæ illam noctem horrendam illuminare potuerint. Jam verò palpabilitas affectio est corpo-

corporis naturalis, tenebræ itaque concentratæ, crassæ utique substantiæ erunt, expansæ verò & extenuatæ Spiritus subtiles. Quicquid longitudinem habet, latitudinem & profunditatem, illud substantia est corporalis: Umbra, v.g. terræ, longitudinem habet, latitudinem & profunditatem. E.

5. Inter lucem & tenebras mutua actio est, & antipathia, vigore primævæ separationis lucis à tenebris: accedente luce evanescunt tenebræ, eodem modo, ut frigiditas penetratur & obducitur calore, ferrum & carbo igne: ita tenebræ obducuntur, penetrantur lumine: excluso lumine, v.g. in camerâ obscura, etiam in ipso meridie præsto sunt tenebræ. Antipathiam esse & actionem inter Spiritus corporis humani lucidos & inter tenebras inde patet, quòd omnis homo sanus naturali instinctu tenebras horreat, aversetur; & propterea tenebræ homini sunt pœna, quando carceri

tenebricoso includitur. Diem autem & usuram lucis, tanquam rem amabilissimam, jucundissimam, cujus beneficio etiam vivit, perditè amet & desideret. Exhorrescentia tenebrarum, quæ passio est, præsupponit substantiam in Spiritus nostros agentem, tenebras nimirum.

6. Omnis homo melancholicus ob Spirituum suorum tenebricositatem tenebras amat, tenebricosa quærit & solitaria, lucos inhabitat, in cryptas & sepulcra se proripit: lucem autem fugit, timet, averfatur. Hæc autem antipathia est actio substantiarum, Spirituum nimirum, lucis & tenebrarum.

7. Omnes homines, cum primis pueri, propter Spiritus lucidos, tenebras & spectra (quæ Spiritus sunt tenebrarum, tenebricolæ, post lapsum ex privatione lucis tenebrefacti) horrent, offenduntur, epileptici fiunt. Cum itaque inter lucem & tenebras, luminosa & tenebricosa

bricosa mutua sit & reciproca actio;
& quasi pugna, necesse est, sint
substantiæ spirituosæ & activæ.

8. Tenebricosa in sublunaribus
omnia sunt nigra, spectra, Æthio-
pēs, homines nigri, nigro capilli-
tio, melancholici, qui ut plurimum
sanguinem habent & spiritus obscu-
ros, tenebricosos, impuros. Ani-
malia nigris lanis, volucres nigris
plumis, noctivagæ, noctuæ, ululæ,
bubones, vespertiones, bufones,
pulices.

Herbæ nigris floribus & foliis,
quales sunt faba, &c.

Terra tenebricosa est, idcirco de-
setenebras, ceu Spiritus tenebri-
cosos spargit, corpora terrestria
omnia, etiam humana tenebricosa
sunt, & idcirco Spiritus nostri &
anima nostra in tenebris & obscuro
habitant domicilio.

CAPUT

CAPUT XII.

Paradoxon duodecimū.

Idéas esse Spiritus.

1. Plato docuit Idéas, morbos ideales Helmontius.
2. Sunt producta Spirituum.
3. Spirituum habent actiones.
4. Formant sibi proprium domicilium.
5. Spirituum sunt remedia.
6. Sanitatis sunt & morborum causæ.
7. Facultatem habent sese multiplicandi.

UNum adhuc curiosis proponam paradoxon inauditum hactenus; IDEAS esse Spiritus, seu substantias spirituales.

1. IDEAS olim docuit Plato, num verò discipuli Præceptoris mentem & intentionem assecuti sint, dubito. Nostro seculo Helmontius morbos Medicis primitus monstravit ideales, ex idéis ortas. Idéas Spiritus esse, & substantias spirituales, à facultate creatrice Spirituum formatas, nobis hac vice minus usitato scribendi stylo incumbit probare.

2. Primò

2. Primò enim Spirituum sunt producta, à Spiritibus fiunt, creantur, generantur, producantur. Quodcunque itaque à Spiritibus creatur, producit & generatur, Spiritus erit, simile enim producit & generat simile, Spiritus producit Spiritus, creat, multiplicat. A spiritibus Ideæ producantur, generantur, E. sunt Spiritus.

3. Quodcunq; Spirituum actio-
fas habet actiones & operationes,
illud est Spiritus, ideæ, e. g. furoris
canini, saltatricis tarantulæ, epi-
lepticæ, terroris, metus; &c. Spi-
rituum habent actiofas operationes.
E. sunt Spiritus.

4. Quæcunque ideæ corpus sibi,
& proprium format domicilium, est
Spiritus; ideæ canis rabidi rabiosa,
corpuscula canina sibi format. E.
est Spiritus.

5. Quodcunque adæquatum Spi-
rituum est remedium, illud ipsum
est Spiritus. Ideæ adæquata sunt
Spiritus remedia; ideæ enim, e. g.
lætæ.

lætæ ex læto nuncio exhilarant, serenant præter naturalem Spirituum constitutionem. E. illæ ipsæ sunt Spiritus.

Quodcunque Spiritu est subtilius, Spiritus est, Ideæ longè subtiliores sunt Spiritibus. E. Spiritus sunt Spiritus constant igne & humiditate pingui, idea non.

6. Quodcunque imperium habet in vitam & sanitatem, substantia est, ideæ tale habent imperium, E. substantiæ sunt. Causæ enim sanitatis sunt & morborum.

Quodcunque naturales habet operationes est substantia naturalis: ideæ naturales habent operationes. E. substantiæ sunt naturales. Idea e. g. irascibilis, vindicatrix, formidabilis naturalis causa est apoplexiæ, epilepsiæ lethalis.

Quæcunque causa in corpore humano humores agit & Spiritus, substantia est. Ideæ humores movent & Spiritus. E. substantiæ sunt.

7. Quodcunque facultatem habet

bet sese multiplicandi, ea est substantia spirituosæ: ideæ facultatem habent, sese multiplicandi: E. sunt substantiæ spirituosæ, v. g. ideæ rabici caninæ, taratantulæ, &c.

C A P U T XIII.

De existentia Spirituum nostrorum.

1. Spiritus esse demonstrant sensus. 2. Calor. 3. Motus. 4. Virium jactura. 5. Animi deliquia. 6. paralytes. 7. Fermentationes. 8. Mors. 9. Medici omnes.

Spiritus esse & in corporibus nostris dari cognoscimus, 1. Sensu visus.

1. Illud enim subtile, quod spumosum est in sanguine cum primis arterioso, docti promiscuè & indocti vocant Spiritus; illud nimirum tenue, quod post extra venationem in auras tandem evanescit & expirat.

2. Illud ipsum subtile, quod motu & pulsu in cordis ventriculis, venis & arteriis ab alimentis secernitur, dicitur Spiritus.

3. Spi-

3. Spiritus esse patet ex animalibus brutis, quæ omnes actiones suas naturales, vitales & animales per animam sensitivam inaterialem, hoc est, per Spiritus perficiunt.

4. Sensu Tactus. Tactu corpora nostra calida esse deprehendimus.

2. Ex calore itaque spiritus esse & dari cognoscimus; subjectum caloris & calidi nativi sunt Spiritus, sunt enim ignes.

5. Ex circulatione & motu: hujus enim subjectum & principium sunt Spiritus. Circulatio Spirituum non est artificialis motus per pondera, ut in automatis & machinis, quæ violentia moventur: sed merè naturalis, à causa interna nativa, mobili, astrali, radiosa, vivida, & luminosa se se ad motum, analogiam & imitationem astrorum movente, utpote quorum spirituales radii principale sunt Spirituum ingrediens.

4. 6. Illud ipsum subtile, quod in morbis.

morbis, languoribus, mœroribus, ægreditudinibus, laboribus, vigiliis, curis, senectute insensibiliter amittitur, sunt Spiritus.

7. Illæ ipsæ vires, quæ sensibilibus evacuationibus, venæ sectionibus, hæmorrhagiis, purgationibus, sudoribus, immoderata Venere, &c. amittuntur, sunt à Spirituum jactura: Spiritus, vires, vita, pari passu ambulant.

5. 8. Animi deliquia, cùm proveniant à cessatione seu potius intermissione circulationis, motus & radiationis Spirituum, docent esse Spiritus.

6. 9. Paralytes, eum arguant denegationem, influxus Spirituum, vel eorundem narcosin, aut mortificationem idem confirmant.

7. 10. Ex fermentatione animalium, vegetabilium, mineralium cognoscimus Spiritus. Illæ enim bullæ & illud spumofum, quod in fermentatione ebullit, strepit, intumescit, commovetur, expirat, sensus

sensus ferit, Spiritus esse confirmant
sensus, auditus, visus, odoratus,
gustus, tactus.

8. 11. Ex ipsa Morte, de qua ca-
pite ultimo.

9. 12. Spiritus esse, existere &
dari, confirmat unanimiter omnis
Medicorum chorus, ab Hippocrate
usque ad hæc nostra secula: hos à
partibus, in quibus generantur, &
actionibus, quarum autores sunt,
vocant naturales, vitales & ani-
males.

C A P U T XIV.

*Discrimen animæ & Spirituum
ostendit.*

1. Anima propriè est Spiritus. 2. Divinæ
particula auræ. 3. Immortalis. 4. Non
elementata. 5. Ab elementis non affici-
tur. 6. Influentiis non obnoxia. 7. Qui-
escit. 8. Non sentit externas injurias. 9.
Non ægrotat. 10. Non enormitica est.
11. Non est subiectum medicinæ. 12. Est
indivisibilis. 13. Non immediatè conjun-
gitur corpori. 14. Eâ carent bruta. 15. So-
la, corpus redderet immortale.

Anima

Anima à Spiritibus distingui pater, quia

1. Anima est propriè Spiritus, materiæ expers : Spiritus autem sunt corpora subtilissima.

2. Anima est divinæ particula auræ : Spiritus est corpus subtilissimum, proximum divinæ auræ habitaculum, vehiculum.

3. Anima est Spiritus immortalis : Spiritus autem sunt mortales, attenuantur, imminuuntur, evanescent in auras, sub concavum Lunæ cum animabus brutorum juxta Platonem, vel potius aliis cum ignibus per magnetismum ignium fontes repetunt.

4. Anima non agnoscit, nec admittit qualitates manifestas : Spiritus autem sunt calidi, humidi magis & minus.

5. Anima injurias non sentit elementares : Spiritus autem obnoxii sunt & afficiuntur qualitatibus elementorum excessivis. e.g. frigiditate, caliditate, humiditate.

6. Anima

6. Anima astrorum influentiis obnoxia non est, utpote merus & Spiritus absolutè divinus; Spiritus contra τῶ τῶν ἀστρον σοιχοίω ἀνάλογοι, vel astrorum potius filii sunt, idcirco ob analogiam & identitatem ab iis afficibiles.

7. Spiritus moventur & circulantur ad imitationem astrorum, ex quibus generantur: Anima tali motu non movetur, diviniorem enim habet originem.

8. Anima, ceu propriè Spiritus, non potest tangi, nec tactu aut punctura lædi. Spiritus dolent, sentiunt gratum & molestum, quod patet in paralyfi, ubi membrum resolutum, præsentē anima Spiritibus orbatum non sentit, interdum non movetur.

9. Deliriorum subiectum seu causa Spiritus sunt; anima non delirat, nec ægrotat, cū sit immaterialis: Ergo Spiritus in corpore materiales, vicissitudinibus obnoxii sunt.

10. Illud

10. Illud ipsum enormantium seu impetum faciens in febribus, catarrhis, aliisque morbis & symptomatibus, v. g. convulsivis motibus, anima non est, sed Spiritus: ita animi thymoses seu excandescentiæ, e. g. iracundia, non ab anima immediate, sed à Spirituum effervescentia, ebullitione, quod apparet ex faciei efflorescentia & rubore: patet & inde, quod ad iram magis proclives sint & commoveantur juvenes & vivi, quàm senes, non ratione animæ, sed culpa Spirituum igneorum.

11. Ex quotidiana Medicorum praxi, qui medicamenta non animæ, sed Spiritibus applicant, talia sunt, e. g. præternaturalem Spirituum constitutionem corrigentia, Archeum sapientia, narcotica, opiata, somnifera, papaverata, etiam in morbis animi, qui morbi sunt Spirituum.

12. Anima est indivisibilis: Spiritus autem sunt divisibiles, dissipabiles, resolubiles.

13. Anima, tanquam Spiritus subtilissimus, divinus, immortalis, post lapsum obscuratus, corpus humanum, crassum, terrestre, opacum, grave; hebes, immediatè gubernare non potest, & illuminare, sine intermediis Spiritibus, corporibus igneis, semper activis, mobilibus, maximè sentientibus, quibus tanquam instrumentis proximis utitur pro gubernando & vivificando corpore; patet hoc ex paralyssi, animi deliquiis, in quibus non deficit anima, sed Spiritus, & eorum radiatio. Spiritus itaque sunt medium & quasi vinculum inter duo illa extrema, animam & corpus, multis parasangis, insigni & maximala latitudine inter se distantia. Spiritus, ceu docent Pneumatici, Dæmon, Genius molem de loco tollere non valet, sine intermedio, tanquam instrumento, e.g. aëre, corpore itidem spirituofo & Dæmoni magis analogo: ita anima tanquam Spiritus immaterialis, exigua
flam-

Hamula corpus movere non potest sine intermediis Spiritibus; & ut Spiritus, Dæmon corpus aut cadaver, quod intrat, naturaliter non movet; ita nec anima, nisi median-
tibus Spiritibus.

14. Spiritus in brutis corpus sine anima possunt gubernare; sed anima, Spiritus subtilissimus, immortalis, qualitatibus manifestis expers, sola corpus humanum non sine Spiritibus, corporibus radiantibus, mobilibus.

15. Animam à Spiritibus distingui patet ex morte: anima non moritur, cum sit immortalis, nec corpus, illud enim non potest dici mori, cum sine anima & Spirituum commercio sit merum cadaver & terra; necesse itaque est, vinculum illud & intermedium animæ & corporis, Spiritus nimirum mori; quibus ablatis, dissipatis, suffocatis, extinctis, non circulatis, nec radiantibus, necessario sequitur Mors, rupto nimirum vinculo utriusque,

Hinc, salvo rectiori ita possemus colligere:

15. Si anima immortalis, sufficienter radians sola corpori præesset immediatè, homo nunquam moreretur, sed à morte præservaretur beneficio animæ. Coactè enim & violenter animula, exigua post lapsum flammula, suum deserit domicilium, sicut Spiritus Mercurialis, purus in auro metallicus, aurum præservat à rubigine, morte, interitu; ita etiam anima corpus.

C A P U T XV.

Nonnullas differentias spirituum accidentales recenset.

1. Differunt ratione qualitatuum primarum.
2. Secundarum. 3. Constitutionis. 4. Motus. 5. Partium. 6. Indolis. 7. Idearum. Differunt & ipsi inter se Spiritus multis modis.

1. **A** Qualitatibus manifestis; alii dicuntur calidi, ratione ignis: alii frigidi, quales in moribundis & cadaveribus tachi depre-

prehenduntur ; alii humidi ; alii sicci.

2. Ratione qualitaturn secundarum : alii dicuntur obscuro , tenebricosi , crassi , alii sereni , radiantes , pellucidi , perspicui , expansi , subtile ; alii dulces , alii falsi , alii acidi , alii alkalisati , &c.

3. Ratione constitutionis ; alii sani sunt ; alii ægri ; alii puri , alii impuri.

4. Ratione motus ; alii mobiles ; alii minus mobiles ; alii sedati , alii inquieti , enormantici , trepidantes.

5. Ratione partium , in quibus generantur ; qui in hepate , naturales ; in corde , vitales ; in cerebro , animales ; in partibus generationis , geniales dicuntur.

6. Ratione indolis ; alii sunt & dicuntur generosi , serviles , laboriosi , legnes.

7. Ratione idearum iis impressarum ; alii sunt tristes , melancholici , meticulosi , timorosi , saltantes , furiosi , &c.

Hæ & aliæ accidentales ejusmodi
differentiæ in Medicina nostra sæ-
pius occurrunt.

C A P U T XVI.

*Spirituum nostrorum enucleat
definitionem.*

1. Spiritus sunt corpora. 2. Rotunda. 3. Viva. 4. Subtilissima. 5. Calida. 6. Ignem sunt. 7. Homo igne nutritur. 8. Lucem sunt & lumina. 9. Differentia inter ignem, calorem & radium. 10. Muscæ lucentes. 11. Vegetabilia & aquatilia habent Spiritus. 12. Spiritus etiam humidi sunt. 13. Humiditas illa oleosa est. 14. Mobilia sunt, astrorum more. 15. Harmonia superiorum & inferiorum est illa catena aurea. 16. Motus est quasi ipsa vita. 17. Motus & circulationis utilitas. 18. Unde generentur Spiritus ♂. 19. Ex Spiritibus alimentorum. 20. Ex aëre, radiis, & Spiritibus astralibus, imprægnato. 21. Isti radii sunt astrorum influentiæ. 22. Finis Spirituum. 23. An unus an plures. 24. Unum esse monstratur, & per exempla illustratur.

Definitionem Spirituum mu-
tuabimus à Sennerto, Præce-
ptore

ptore nostro, qui sequentem nobis suppeditat.

Spiritus est corpus vivum, subtilissimum, tenuissimum, calidum & mobile, à subtilissima & maximè sincera sanguinis parte genitum.

Spiritus itaque, de quibus in præsentiarum agimus, & quarum gratia scriptio hæc & tractatio instituta est, sunt

1. CORPORA) quia habent longitudinem, latitudinem & profunditatem; quia, 1. dividuntur, quia extenduntur, quia extenuantur, quia imminuuntur. 2. quia calidi non tantum sunt, sed etiam humidi. 3. quia in vasorum obstructionibus iisdem denegatur transitus & influxus. 4. quia aliis multis obnoxii sunt vicissitudinibus.

Curiosi hoc loco possent inquirere, quâ figura prædita essent.

2. Spirituum corpora? quibus responderem, forma rotunda; quia, ea, 1. est perfectissima, ad motum, fluxibilitatem & circulationem

aptissima. 2. Cum Spiritus, cœlestis sint originis, necesse est, ut parentum Solis & astrorum, ignis, nec non aëris & cœli agnoscant figuram rotundam; simile producit simile; sunt, secundum Philosophum, analogi elemento astrorum. Spiritus peregrini, e. g. minerales, salini, rotundi quidem sunt, in superficie tamen, ut terra, cujus filii sunt, & à cujus phantasia generantur, hirsuti sunt, hispidosi, senticosi, aculeati, quia à terra, quæ suos etiam habet montes, cautes, rupes, scopulos acuminatos & prominentias, tanquam matre generati, quemadmodum secundum astrologorum observationes Saturnini ad ♄ faciem falcatam, faciem habent oblongam, macilentam: ♃les, ob ♃is atri splendorem, faciem cum gravitate pulcram: Solares, rotundam, regiam: ☿tiales, maculis obductam, cum capillis rubicundis. ♀rei, ob lucis pulcritudinem, cum amœnitate pulcram; ☽nares, ob luminis

luminis pallorem, pallidam: \varnothing les, pro ratione configurationis, vari-
am. Spiritus enim astrales, astro-
rum & planetarum retinent natu-
ram & figuram, eandemque, in na-
tivitate fortes, corporibus impri-
munt.

3. VIV A) vivunt verbo & vo-
luntate gloriosissimi Creatoris. Is,
qui totus vita est, res omnes creat
vivas, nullamque à manu sua mor-
tuam expectandum promisit. Vi-
vunt Spiritus, quod enim vitam
corpori tribuere debet, utique vi-
vum sit necesse est. Spiritus autem
vivere, patet ex sensibus, qui bene-
ficio Spirituum perficiuntur. Sen-
tiunt Spiritus gratum & molestum,
salutare & noxium; percipiunt o-
dores suaves, iisdem delectantur,
lætantur; graves, quibus afficiun-
tur, offenduntur, læduntur. Irrita-
ti autem tumultuantur, enorman-
tici fiunt & impetum faciunt, ite-
rumque demulcentur. Quod vi-
vant & vitæ causa sint, patet ex sensu

motus. Spirituum beneficio corpus & singula membra moventur. Motus naturalis præsupponit vitam seu principium vivens; motus autem beneficio Spirituum perficitur; positus Spiritibus, ponitur motus, denegatis, denegatur motus. In suffocatis ex utero, ab apoplexia & aquis; Spiritus quidem moventur, nobis tamen insensibiliter, radiant etiam, sed debiliter, non secus ac ignis in pruna candente movetur, insensibiliter tamen, radiat etiam, sed debiliter. Talem vitam vivunt hyeme, ranæ, ursæ, mures alpini, &c. Extravasatos Spiritus sentire, & mutuum consensum habere cum iis, qui insunt corpori, demonstrant curationes magneticae. In cadaveribus supersunt Spiritus, pauci tamen, maximam partem extincti & obscuri, quibus superest vegetatio, hinc cadaveribus crescunt capilli, ungues.

Formaliter autem consistit in lumine & radiatione ignis Spirituum; posito

posito sufficienti lumine, ponitur vita, extincto, in propinquo mors est. Quæ extinctio in moribundis in oculorum vitrificatione apparet. Bartholinus de luce. *Lucis subiectum quod Spiritus sunt, quos comitantia lumina vitam ponere & auferre ex parte dici possunt.* Ut autem radiant, luceant, flagrent, illuminent, requiritur motus. Motus autem Spiritibus communis est cum astris, qui meri sunt ignes & Spiritus, quorum vita & radiatio motu conservatur, omnibusque rebus naturalibus & creaturis à primo motore & Patre luminum, lumen, radiatio, & cum lumine motus est inspiratus & vita. De vita vide peculiare caput seq. 17.

4. SUBTILISSIMA, TENUISSIMA) ratione subtilitatis obtinuerunt nomen, dignitatem & privilegia Spirituum; ratione subtilitatis & tenuitatis suam habent penetrabilitatem, pernicitatem, activitatem; ratione subtilitatis & tenuitatis

nuitatis visum effugiunt, qua ratione & omnes Spiritus, anima, cœlum, aër, ignis extensus invisibiles sunt à corporeis oculis & creaturis: ratione subtilitatis & teneritudinis facilè etiam per poros exspirant, dissipantur, consumuntur, suffocantur, extinguuntur. Debent autem esse corpora subtilissima, quia anima, tanquam Spiritus incorporeus, pro regendo corpore opus habet Spiritibus, tanquam instrumentis subtilissimis. Spiritus sunt intermedium & quasi vinculum animæ & corporis. Non tamen adeo subtiles sunt & simplices, ut eorum humidum, impurum non admittat aut heterogeneousum, quod docent fermentationes eorum, quarum beneficio à se & toto corpore equestrant, quod alienum est, peregrinum & impurum.

5. CALIDA) sunt ratione ignis: ignea, calida sunt, & calida ignea. Corporis nostri Spiritus ignes esse patet, 1. ex Hippocrate, qui Spiritus

ritus vocat ἔμφυτον πῦρ, connatum ignem. 2. patet, quod ex Spiritibus igneis vegetabilium & animalium, si concentrantur inflammabilibus, combustibilibus generentur. 3. generantur & ex Spiritibus ☉is & astrorum, quorum radii concentrati meri sunt ignes. 4. Quia ex medicamentis itidem spirituosius igneis, inflammabilibus, restituntur, refocillantur. 5. Calidos esse & igneos patet sensu tactus, corpus nostrum calet magis & minus Spirituum beneficio. 6. Calidi sunt Spiritus, quia calidis pariter & frigidis afficiuntur, excessivè frigidis & calidis offenduntur, moderatè calidis & frigidis reficiuntur. 7. Calidos esse, patet ex coctionibus. Spiritus calore coquunt, digerunt, in singulis coctionibus, ceu culinis alimenta, hinc Spiritus, Naturæ dicitur coquus. 8. Spiritus calidos patet ex intemperiebus, cum primis autem ex febribus calidissimis; Febris nihil aliud est, nisi Spirituum ignitio, mul-

tiplicatio, incendium, quo nomine etiam à Medicis per *æp*, id est, ignem describitur. Ignis enim febrilis est ignis noster naturalis, per pulsum auctus, nimium multiplicatus, semetipsum & humidum suum extenuans, suaque disproportione consumens. 9. Ut ignis stipulas, ita Spiritus fuligines, superfluas humiditates, morborum causas & eorum producta, imò vel semetipsos conficiunt. 10. Ut ignis tandem, denegato & detracto humido & pingui combustibili successivè consumitur, extinguitur, in auras expirat; ita & corporum Spiritus, per morbos, ægritudines, labores: & hæc ipsa senectutis & ipsius denique mortis genuina ratio est. Hic curiosi quærere possent, num homo igne etiam nutriatur?

7. Responderem, quod sic: Spiritus sunt ignes extenuati, extensi, subtiles, incarcerati, multiplicati autem concentrati & liberiores redditi meri sunt ignes urentes. Hinc est,

est, quod Lucēs dicantur, & Lumina hinc inde ab autoribus.

8. Bartholinus eo nomine doctissimum de Luce animalium literato orbi scripsit tractatum; p. 266. ita loquitur. *Ratum ergo sit animantium lucem inter qualitates obtinere locum, à quibus subjecta talia dicuntur, augereque primarum qualitatum numerum, ut quinta sit sui ordinis & conditionis, nec enim calor est, nec frigus, nec ullius humidatis siccitatisque per se efficiens, sed peculiari essentia ratione à reliquorum conditione separata.* Helmontius de aura vitali; p. 728. *Luces, inquit. sunt ipsemet vite ac formæ vitalium.* Hoffmannus Spiritum appositè vocat Flammam vitalem.

9. Lux, lumen, radius, calor ab igne non differunt nisi tenuitate, subtilitate, extensione, expansione, radiatione: Lux, Lumen, radius, calor, i. sunt effluvia ignea, ignes emanantes, emissitii, radiantes ex Sole, aliisque concentratis, compactis,

pa&is , solidioribusque ignibus. Prout itaque ignes , lux , lumina radiant : ita etiam Spiritus corpora irradiant ; illuminant , caloremque de se spargunt , vel mitem & naturalem , qui sensu deprehenditur , vel auctum & præternaturalem , in febribus , qui ad tactum acris est & pungens quasi. 2. Spiritus effluvia de se spargunt , ignis & astrorum instar : ejusmodi radiatio deprehenditur in medicamentorum activitatibus ; medicamenta enim non agunt tantum figura sua externa , pleraque internâ potius forma activa radiante , non secus ac quando medicamentum spirituolum tracto vase effunditur , exspirat per radiationem , nostrosque Spiritus mirè afficit. Radiatio illa manifesta est in magnete , sympathiis & antipathiis , e. g. hominis & felis , in quibus necesse est , ut vibratio fiat , contactus & collisio quædam , quæ radiatio est , & radiorum similium mutus amplexus , dissimilium mutua fuga.

3. Spi-

3. Spirituum ignes radiare, patet in perpetua corporum expiratione & transpiratione, quæ radiatio est, & Spirituum activitate perficitur. 4. In morbis contagiosis, in quibus Spiritus peregrinus è corpore morboſo egreditur & exhalat, inque aliud corpus ſeſe inſinuat, cujus Spiritus ſanos facultate ſua multiplicativa contaminat, accendit, ſibiſque aſſimilat. 5. Spiritus perhibentur radiare extra corpus abſque definita activitatis ſphæra, ut in ſympathetica vulnerum curatione patet; & quidem per corpora etiam opaca, minusque poroſa, ut in radiatione magnetis, item in radiatione gemmarum.

Spiritus autem lumina eſſe, pellucida, diaphana patet, i. quod ignium more illuminent, irradiant, translucida, diaphana reddant corpora: digiti candelæ admoti transparentes conſpiciuntur; animalcula per microſcopia pellucida apparent: manifeſtè lucidæ ſunt cicindelæ,

delæ, aliaque, de quibus Bartholinus de luce animalium.

10. In Insulis Antillis muscæ lucentes reperiuntur, quibus pro candelis utuntur incolæ. Lumen ipsarû debile redditur, cû morbo afficiuntur, extinguitur verò omnino, si moriuntur. 2. patet ex sensu visus, qui & radiorum emissionem, & specierum visibilium receptione perficitur, ut autem utrumque fiat, purum requiritur lumen. 3. ex oculis animalium nonnullorum, in quibus manifestè lumen quoddam radians conspicitur; & hominum ex scintillatione, quando comprimuntur. Apparet, 4. ex somniis, in quibus animal in Spirituum lumine videt innumeras rerum ideas, sibi olim impressas. 5. Spiritus radiare deprehendimus ex mutuo viscerum consensu, qui fit per radiaticnem & illuminationem mutuam. Quando enim ventriculus medicamentum accipit generosum, post suscitatum illuminationem ex grato & spirituo-

lo me-

so medicamento, in instanti radiat & illuminat cor, caput, uterum, renes, eorundemque Spiritus. In ipsa enim sumptione antequam actuosa illa medicamenta corpore ad remota deferantur viscera, cor, caput, uterus, renes, subsidium percipiunt ex Spirituum ventriculi illuminatione & radiorum vibratione in eminus collocata viscera. Quod vero illa Spirituum radiatio non semper sit visibilis, fit, ut norunt Naturæ-Consulti, ob summam Spirituum spirituositatem, ignis & luminis eorum tenuitatem, raritatem, subtilitatem, extensionem, expansionem. Sic propter summam essentiae simplicitatem à corporeis nostris oculis non conspiciuntur nec Genii, nec anima, nec aër, licet illuminetur, nec ignis expansus in aëre, nec radians per fornacem in hypocaustum. Propter eandem causam Spirituum nimirum tenuitatem, raritatem & extensionem in piscibus, in vegetabilibus sensibilis non deprehenditur calor. Pis-

11. Pisces tamen, qui Lunæ sub-
sunt, & vegetabilia præter frigidos,
Spiritus in se habere etiam calidos,
inde apparet, quòd, 1. in fermenta-
tione incalescant motu. 2. Spiri-
tus ex vegetabilibus destillatione
eliciantur calidi. 3. vegetabilia ra-
tione Spirituum æreorum combu-
stibilia sint. 4. vegetabilia quando
putrescunt, incalescunt & accen-
duntur, id quod fit in fœni putrefa-
ctione. Pisces licet frigidi sint, Spi-
ritus tamen etiam habent intus cali-
dos, non secus ac Qus & mineralia
sensu deprehenduntur extra frigida,
cùm tamen Spiritus eorum interni
sint ignes.

12. Spiritus autem nostri non ca-
lidi tantùm sunt, verum etiam hu-
midi: calidi tantùm & sicci ignes es-
se non possunt, utpote, qui nimium
simplices sunt, subtiles, tenues; ita
enim justo citius essent conflagra-
biles, dissipabiles, consumtibiles,
evaporabiles, evanescentes. Idcir-
co flammula illa vitalis meritò de-
buit

buit esse humido contemperata, quo, tanquam in appropriato habitaculo & convenienti vehiculo delitesceret, contineretur, conservaretur.

13. Illud ipsum autem humidum, frigidum non est, nec aquosum, sed pingue, oleosum, & cum, (merus enim ignis est conflagrabilis) quod cum Spirituum calido exactissime contemperatum est, & hinc in calido & humido vita nostra consistere verè dicitur, consensu Medicorum & Philosophorum, & ab eis communiter calidum innatum & humidum radicale, calidum & humidum influens dicitur, à nonnullis primigenium.

14. MOBILIA) moventur, & moveri debent ad imitationem astrorum, quia ex iis generantur. Moventur non tantum motu influentiarum, Spirituum astralium more, seu per motum influxus, in viscera & habitum corporis, sed etiam circulationis. Sicut Cometæ, filii

☉is & planetarum, parentum suorum observant & antecessorum motum & gressum: eodem modo & Spiritus humani ex astrorum Spiritibus generati astrorum motu moventur circulari.

15. Admirabilis Harmonia est in tota rerum Natura, & inter creaturas, quam ingeniosè Hermes in tab. sua Smaragdina exprimit seq. modo: *Superius est sicut inferius, & inferius sicut superius*: vel, ut Krigsmannus Phœnicum contextus proprietatem servans latinè vertit, hoc modo: *Verè non fictè, certò verissimèq; ajo. Inferiora hæc cum superioribus illis, istasque cum iis vicissim vires sociant*: Lumine itaque Hermeticæ Philosophiæ, omnia naturalia superiora cognoscuntur per inferiora, & vice versa, inferiora per superiora. Hæc harmonia est illa catena aurea, quâ inferiora superioribus alligantur, gubernantur & mutuo attrahuntur. Cum enim astra moveantur, & corpora nostra moveri necesse

cesse est , quippe cùm Spiritus habeant ex astris haustos astrales , qui, cùm communes sint nobis cum a-
stris , inter eos communis consen-
sus est , & mutuus magnetismus,
sympatheismus & obedientia. Spi-
ritus autem mobiles alios Spiritus
non ita mobiles posse ad eorum imi-
tationem reddere itidem mobiles,
patet in sublunaribus, e. g. Spiritus
mobilis & saltans animalculi sal-
tantis taratantulæ communicatus
cum homine , omnes Spiritus ho-
minis saltantis facit & mobiles; non
secus ac Spiritus canis rabidi aquã
fugientis , Spiritus hominis rabio-
sus efficit, hydrophobos, aquas a-
versantes: talis Spirituum commu-
nicatio, assimilatio, imitatio appa-
ret in morbis contagiosis, in quibus
Spiritus v. g. pestilentialis, scorbu-
ticus, in aliud sanum corpus trans-
latus, assimilat sibi, suæque dispo-
sitioni & alios sanos Spiritus. Ita
circumgyratio, navigatio, vectio,
corporis nostri Spiritus reddit ver-
tigi-

tiginolos. Spiritus itaque & radii
astrales attracti, nostrisque sociati,
pro naturâ sua nostros etiam dispo-
nunt Spiritus.

16. Motus autem naturalis est
proxima vitæ & radiationis causa,
eiusdemque indubitatum indicium
in astris, in homine, in animalibus,
quamdiu movebuntur astra, homi-
nes, animalia, vivunt, (cùm vita
consistat in radiatione Spirituum,
motus autem radiationem eorum
conservet) quamprimum cessabit
motus, cessabit radiatio, cessabit
vita. Aristoteles inquit: *Omni-
bus rebus naturalibus ipse motus est vita
quedam.* Vita enim cum motu in-
spirata est creaturis in prima crea-
tione, à primo motore, gloriosissi-
mo Creatore. Motus autem, ra-
diatio & vita inspirata Spiritibus
pari passu ambulant, posito motu,
ponitur radiatio, quæ ipsa viven-
tium est vita. Spirituum beneficio
circulatur & influit sanguis, corpus
de loco in locum movetur. Motus
itaque,

itaque , ut jam aliquoties dictum ,
conservat radiationem Spirituum ,
quamdiu radiatio Spirituum durat ,
durat vita , vita enim est Spirituum
radiatio , quamprimum cessat & de-
ficit motus , deficit radiatio , quæ
ipsa est vita.

17. Motus ille naturalis & circu-
latio multas insuper præstat nobis
utilitates : separat ab alimentis Spi-
ritus vegetabiles & brutales , ulte-
rius elaborat eosdem , & specificis
viscerum fermentis specificati , Spi-
rituum conservat lumen in naturali
suâ serenitate, diaphaneitate, tenui-
tate , radiatione : corrigit impuri-
tatem , densitatem , obscuritatem :
sequesterat omne quod peregrinum
est in corpore & alienum in Spiriti-
bus , restituit omne quod amissum
est & deficit.

Motus hic seu circulatio assimi-
latur Chymicorum cohobationi ar-
tificiali , quâ sæpius repetitâ rectifi-
cantur , puriores redduntur , defe-
ciores , subtiliores & simpliciores

animalium, vegetabilium & mineralium liquores. Jussu itaque & imperio superiorum, Spiritus nec possunt, nec debent esse quieti, cum enim singulis momentis amittantur, singulis momentis motu & circulatione restituantur. Ipsi Spiritus naturâ mobiles gaudent invitari ad motum: animalia cursu, volatilia volatu, homines labore, infantes fletu suo ceu sermone nativo supplicant, & desiderant moveri.

Motus itaque Spirituum est sine intermissione continuus. 1. ut continuo generentur, aut ab alimentis separentur. 2. ut continuetur lumen, radiatio & vita sine intermissione. 3. ut continuo ventilentur, & in serenitate conserventur. 4. ut ob continuum effluxum & jacturam continuus conservetur influxus. Motus itaque Spiritibus competit, quatenus sufficientes sunt in corpore animalis vivente; in cadavere motum illum non amplius exercent, nec observant siderum, licet supersint

Superfint aliqui Spiritus pauci; obfufcati tamen, extincti & quieti, non enim amplius inspirantur, attrahuntur, foveantur, fomentantur, reftituuntur, confervantur ab aſtraliſus, ſemper mobilibus, idcirco nec amplius ad ſiderum imitationem moventur, circulantur, nedum radiant.

18. Generantur autem Spiritus ſecundum Sennertum, alioſq; Medicos ex ſubtiliſſima ſanguinis parte. Per ſubtiliſſimam ſanguinis partem intelligunt procul dubio ſubtiliſſimam alimentorum partem, quæ nihil aliud eſt, quàm alimentorum Spiritus.

19. Spirituum generatio, eſt tantummodo Spirituum ab alimentis ſeparatio, & aſſimulatio. Spiritus non una vice, nec uno in loco aut viſcere in momento generantur & perficiuntur, ſed per gradus. Natura enim agit per gradus, non per ſaltus. In coctionibus generantur, hoc eſt, ſeparantur, & ſucceſſivè

concoquantur, perficiuntur, assimulantur. In prima coctione & chylosi prima fit Spirituum, & rudis separatio, quæ ex ructibus nidorosis deprehenditur, secunda & ulterior separatio fit in primis viis & venis lacteis, tertia in corde: quarta in arteriis, venis & nervis, ubi specificantur, fiuntque ex vegetabilium Spiritibus, Humani. Generantur etiam in pulmonibus, ut in curioso suo tractatu de Pulmonibus docet, de re medica longè emeritus Bartholinus. Ex assumptorum itaque Spiritibus humani fiunt Spiritus. Nihil potest suppeditare & generare Spiritus, nisi illud ipsum, quod Spiritus habeat & spirituosum sit, quod enim quis non habet, cum altero communicare non potest: sic vegetabilia & animalia Spiritus non possunt suppeditare, nisi materialiter in se habeant, ut infra tit. de Nutritione fusius declarabimus.

20. Non tantum autem ex Spiritibus alimentorum, sed etiam ex aëre

aëre generantur Spiritus, secundum
unanimem Medicorum & Philosophorum
sententiam, idem docebo
l. 2. c. 4. §. 3. & 4. A E R est præci-
puum pro generandis Spiritibus In-
grediens: sine aëre enim vivere non
potest animal, ut mechanicè hodie
demonstrant curiosi rerum natura-
lium indagatores, experientiæ nos
convincunt & sensus. Guarinus
Guarini, Helmontius, aliq; mon-
strant, aërem cum respiratur, in
pectoris non solum capacitatem u-
niversam, sed infimum etiam intra-
re ventrem. Varro credidit ani-
mam esse aërem inspiratum ore,
calefactum in corde, sparsum per
viscera. Nec tantum ex simplici
aëre vivimus & Spiritus generantur,
sed est in aëre insuper siderum oc-
cultus vitæ cibus, ut loquitur Cos-
mopolita; ille autem occultus vitæ
cibus satis manifestus est iis, qui vi-
dent radios ☉lares aliorumque si-
derum calidos & frigidos penetra-
re, calefacere, imprægnare, rempe-

rere aërem hunc , quem haurimus nostrum , & quo vivimus. Illi enim radii vivi sunt , & ignis ex sole & astris vivificus , omnia vivificans: radios ☉is ignem esse ☉larem omnes norunt Physicorum & Opticorum tyrones. Illa vis radiorum vivifica est, quod manifestè apparet in vere & æstate , in vere redeunte ad nos ☉le , quando ad radiorum reciprocationem ignis vivificus multiplicatur , cum omnibus creaturis communicatur , & cum igne vegetatio , palingenesia , & nova vita. Cum itaque univèrsus aër plenus sit & imprægnatus igne ☉lari & siderum radiis , patet , assumi , inspirari una cum aëre illum ipsum ignem vivificum. Quam copiosus autem ille sit ignis ☉lari in aëre, patet ex speculis caustoriis concavis, quæ radiorum ☉larium exigua parte concentrata , ignem concentrant realem , & producant comburentem , metalla liquefacientem, lapides vitrificantem: vide Ephemeriditorum an. 1666. p. III.

21. Hinc quilibet, etiam stupidus ingenio, sensibus convincitur externis, manifestas astrorum influentias fieri in aërem, homines, animalia omnesque creaturas, quas partim per sensibilem, partim insensibilem inspirationem attrahunt unà cum aëre, radios nimirum seu ignem & effluvia astra, quæ secundum naturam astrorum corpora nostra disponunt. Sicut Spiritus qualescunque tandem sint, medicinales, suaveolentes, graveolentes, contagiosi in aëre oberrantes, cum communi aëre hauriuntur, nostrisque sociantur: eodem planè modo ex Spiritu, igne Solari & astrali vivifico cum aëre per inspirationem sensibilem & insensibilem constituitur, generatur & disponitur vitalis & animalis Spiritus.

Et hæc est illa ipsa superiorum & inferiorum harmonia, catena, consensus, sympathia, magnetismus, appetitus, raptus; obedientia ex similitudine, identitate Spirituum

humanorum & astralium: simile enim eadem est actio, harmonia, consensus, sympathia, amor, appetitus, raptus, motus.

Generantur itaque, restituuntur, conservantur, disponuntur Spiritus nostri non ex Spiritibus alimentorum tantum, sed etiam ex aëre, radiis, igne seu Spiritibus astrorum imprægnato.

22. Finis Spirituum, ut ex antecedentibus patuit, est, ut corpora creaturarum beneficio eorum irradiati vivant, sentiant, moveantur, sui simile generent; habent & alios fines, qui sub jam dictis comprehenduntur, v.g. ut conservent corpora in debito statu & naturali constitutione seu sanitate, ut sanguificent, motu suo sanguinem à coagulatione & grumescencia præservent & aciditate, ut discutiant heterogenea, ejiciant impuritates & fuligines, ut vulnera consolident, & quicquid amissum est per sensibilem & insensibilem evacuationem, per
ulcera,

ulcera, restituant; ut paucis multa complectar, Spirituum finis est, ut per eos corpus sanum vivat & longam vitam; hi enim soli sunt vitæ autores, conservatores, morborumque medicatores: ita nobiscum sentit ingeniosissimus & laboriosissimus Kircherus in arte magnet. l. 3. parte 7. p. 729. *Spiritus, inquit, omnium animæ functionum organum necessarium sunt. Horum enim vi admirabili totum corpus vivit, sentit, se movet, nutritur, augetur: hi concoquunt, digerunt, egerunt, attrahunt, omnesque vitales actiones perficiunt: his languentibus omnia languent: hi omnes rerum species accipiunt, deferunt, & ad phantasie motum voluntur in corpore, non secus ac lapide in aquam tranquillam coniecto, circuli causantur, se diffundentes totumque corpus alterant: Unde non immerito ab Hipp. τὰ σώματα ἐνορμύνεσθαι dicuntur.*

23. Hoc loco probè notandum, nos loqui solitos in præsentī Spirituum medicina, interdum de Spiritibus

tibus ceu pluribus , interdum de Spiritu tanquam uno.

De Spiritibus ceu pluribus loquimur , tanquam de corporibus subtilissimis , quæ in diversis organis ab alimentis separantur , perficiuntur , distribuuntur. Spiritum naturalem vocitamus eum , qui ruditer in prima & secunda coctione ab alimentis separatur ; crudus adhuc ille est , merè vegetabilis , herbalis , aut brutalis , nondum elaboratus satis , nedum Spiritu aëris & astrorum sufficienter imprægnatus & corpori hominis specificatus. Vitalem salutamus eum , qui aëris occulto cibo & igne astrali perfusus , imprægnatus , vivificatus , in corde & arteriis ulterius ventilatur , elaboratur & perficitur. Animalis est ille , qui ex Spiritu vitali in cerebro & nervis adhuc magis magisque sublimatus , exrenuatus , exaltatus , rectificatus. Genialis , qui in vasis spermaticis pro generatione & multiplicatione præsto est.

24. Ex horum autem omnium combinatione, confluxu unum exoritur Spirituum complexum, unus Spiritus. Non secus ac multi rivuli unum constituunt lacum seu stagnum; omnes fluvii in unum sese exonerant mare, unumque constituunt Oceanum: ita omnes Spiritus in habitum corporis confluentes, unum constituunt Spiritum, qui Spiritus dicitur hominis vel animalis, communiter anima sensitiva.

Sicut astrorum Spiritus, radii & influentiæ inter se commiscetur, confluunt, & unum constituunt Spiritum, qui dicitur Mundi & Universi; ita in microcosmo Spiritus naturales, vitales & animales in habitu corporum animalium unum constituunt Spiritum.

Sicut ex radiis ☉is, tanquam infinitis ignis particulis, concentratis, unus coalescit ignis ardens: ita ex infinitis Spiritibus, corporibus subtilissimis unus demum Spiritus. Sicut ex mille subtilissimis effluviis

aqueis, aut infinitis aquæ & pluviarum guttulis una confluit aqua; ita ex diversis ita communiter dictis Spiritibus naturalibus, vitalibus, animalibus unus demum emergit universi corporis Spiritus. Sicut ex mille & ii granulis unum colligitur & ii liquamen; ita ex Spirituum minutissimorum congerie unicus corporis animalis Spiritus. Nobiscum sentit Bartholinus: de luce animalium p. 138. & universa antiquitas. *Unus tantum*, inquit, *Spiritus mihi, etiam ex antiquorum mente semper visus fuit, variis officiis & forma diversa distinctus, ævūpa antiquis dictus.* Unum esse in corporis habitu Spiritum, patet ex amissione virium in morbis calidis, diuturnis, magnis evacuationibus, laboribus, motionibus, & jactura Spirituum, in quibus non amittitur tantum in specie Naturalis, vel vitalis, vel animalis, sed totus Spiritus.

CAPUT

CAPUT XVII.

DE VITA.

1. Vita consistit in Spirituum radiatione.
2. Patet ex morbis. 3. Ex animi deliquiis.
4. Ex somno. 5. Suffocatione uteri. 6.
- Ex violentiâ morientibus. 7. Longa vita in quibus.

Vita nostra consistit in Spiritibus, & quidem primariò in eorundem radiatione; quamdiu enim lumine radiant, vivit animal, quamprimum cessat radiatio, cessat vita. Vita autem & radiatio illa statim incipit cum motu. Primam vitam motu incipientem monstravit nobis doctissimus Harveus in ovo in puncto illo saliente seu micante. Motu illo saliente, mediante micante illa radiatione eliciuntur, sese multiplicant & distribuuntur Spiritus, quæ radiatio durat per totam vitam, quousque motus durat: quando desinit motus, desinit radiatio, desinit ipsa etiam vita;

2. Id quod patet ex morbis, qui

conjuncti sunt cum languoribus, Spirituum jacturis, virium imbecillitatibus, in iis pulsus & Spirituum motus debilis, & idcirco radiatio etiam debilior est, obscurior, fracta, ipsaque vita. In muscis lucentibus, in Antillis Caribum, tanquam in speculo deprehendimus, vitam & sanitatem in luce & radiatione, morbum & mortem in extinctione lucis consistere, de his Ephem. erudit. octava anni 1667. p. 99.

3. Ex lipothymia, ἀποζία, in qua deficit motus, & hinc radiatio, & sensus, idcirco deficit ad tempus vita, præsentem etiam animam; restituto motu, radiatio restituitur & vita.

4. Patet id ex somno in quo obscurantur ex parte Spiritus, ideoque radiatio eorum frangitur & impeditur, ut alibi monstratum: hinc illud: *Stulte quid est somnus? gelida nisi mortis imago, & mors somni frater.* Patet ex hirundinibus, ranis, aliisque insectis, ursis in terræ latebris semi annum somnum dormientibus,

entibus, ob suppressam ex parte & impeditam Spirituum radiationem semimortuis.

5. Patet ex mulieribus ex utero suffocatis, quæ propter debilem & insensibilem Spirituum motum & radiationis debilitatem pro mortuis sepultæ. De occulta & insensibili hac vita suffocatorum ab apoplexia fœti, ex utero, sub aquis, mentionem fecimus supra cap. 16. §. 3.

6. Patet ex mortuis per violentiam interemtis, in quibus Spiritus superstites quidem sunt, verum cum motus eorum motu astralium Spirituum & influentiarum attractione non possit conservari, continuari, idcirco nec radiare amplius possunt, nec vivere.

7. Conservatio itaque vitæ, seu longa vita consistit in conservatione Spirituum, eorundem motu & radiatione. Spiritus autem constant calido & humido; calidum itaque conservandum pariter ac humidum

dum. Calidum est igniculus aliquis lucidus, lucens, radians; humidum, pingue & oleosum igniculi seu flammuli vehiculum. Ista itaque duo curiosè conservanda sunt, & per similia alenda, quò minus eorum fiat à corpore divortium aut jactura: &, 1. quidem in motu. 2. in radiatione, in quibus ut diximus animalium consistit vita: Spiritus enim si non deficerent, homo esset immortalis. De his fusius l. 2. tit. de longa vita.

C A P U T XVIII.
DE SANITATE ET NATURALI SPIRITUM
Constitutione.

1. Tabula naturalis Spirituum constitutionis. 2. Sanitas consistit in qualitate. 3. Spiritus debent esse sereni. 4. Puri. 5. Dulces. 6. Calidi & humidi. 7. In quantitate. 8. In motu.

1. **S**Anitatis formalitas est potentia actiones naturales exercendi, subjectum sunt SPIRITUS.

Causa

Causa est naturalis EORUM
constitutio, quæ in tribus consistit,

I. Qualitate

1. Serenitate; radia-
tione, luminosita-
te, luciditate cla-
ritate, perspicuita-
te, pelluciditate,
dilatatione, expan-
sione, extensione,
tenuitate, subtili &
rara igneitate: nec
non puritate, sim-
plicitate, homo-
geneitate, integri-
tate, nitore seu ni-
titudine.

2. Dulcedine & na-
turali odore.

3. Temperie calida
& humida.

II. Quantitate debita, sufficien-
ti copia & robore.

III. Motu astrali-circulari, &
naturali influxu.

Sanitatis ratione, & ut sanam vi-
vat homo & longam vitam suscepta
hæc

hæc est tractatio, eoque nomine exculta est, hætenus neglecta, Spirituum Medicina.

Sanitas autem consistit in naturali Spirituum constitutione, quæ in tribus consistit; in debita qualitate, quantitate & naturali motu.

2. Qualitatis ratione Spiritus debent esse

3. 1. Sereni, hoc est, rara luce, lumine & luminositate radiare Spirituum more, tenuitatem habere debitam, expansionem & extensionem, perspicuitatem, diaphaneitatem, raritatem.

Ut ignis igne serenior est & purior, flamma flamma; ita Spiritus Spiritu; non secus ac aër aër est tenuior, rarior; eodem etiam modo & Spiritus. Sereni itaque quando sunt, suaque serenitate & radiatione radiant, irradiare possunt, illuminare corpora naturalia, eaque penetrare, non secus ac ignis ferrum candens.

4. Sub serenitate comprehendere

dere & includere debuimus Puritatem. Spiritus debent esse puri, simplices, homogenei, immaculati, sine labe & incontaminati, nullam admittere heterogeneousitatem, aut alienum seu peregrinum, sed summopere & integritate gaudere: hinc corpora dicuntur simplicia; non quod compositionis sint expertia, cum vicissitudinibus sint obnoxia, cum calida sint & humida, sed talia dicuntur, quamdiu in ea persistunt subtilitate, tenuitate, puritate. Taliter constituti, puri habent & inremeratas sine errore in organis suis actiones, homoque sanus est, solito levior, sanam vivit & longam vitam, cum nullam in se habeant corruptionis causam peregrinam externam.

5. Secundò naturalis Spirituum constitutio consistit in Dulcedine: Spiritus sani nullam debent habere peregrinam, acidam, amaram aliamve graveolentem qualitatem, sed suavem dulcedinem. Ipsos Spiritus

tus dulces esse & suaveolentes, patet, quia, 1. dulcibus & suaveolentibus, tanquam similibus, afficiuntur. 2. quia carnes & alimenta cocta & asfata dulcem & gratum præbent saporem. 3. quia suavem spirant nidorem, qui Spiritus est expressus ex carnibus per ignem, grato odore nostros Spiritus afficiens. Dulcedo illa, quæ Spirituum & sanguinis balsamus est, æquiparatur dulcedini, quæ est in Spiritu vini, oleo, pinguedine, & sita est in sale quodam dulci & saccharino, hinc dicitur falsedo saccharina. Talis debuit esse Spirituum salino Saccharina dulcedo, ut seipsos, sanguinem & universum corpus eò rectius à putredine conservarent, cum alioquin omne sale quod destituitur facile putrescat. Hinc dulcia appetimus, dulcibus afficimur, dulcibus nutrimur, Spiritibusque naturaliter constitutis conveniunt & salubria sunt. Salina illa dulcedo gustu deprehenditur in potulentis, vino, cerevisia, mulso:

mulso : in alimentis, lacte, & lactis fero, in animalium carnibus, vegetabilibus esculentis : in sensibili Spirituum evacuatione, v.g. in sudore, sanguine evacuato, in quibus falsedo manifestè gustu sentitur : apparet illa ipsa falsedo in fructibus immaturis, in quibus Spiritus acidi, amari, crudi, immites, temporis tamen maturitate maturescunt, dulcescunt : apparet illa ipsa dulcedo in artificiosa & diuturna Chymicorum digestionem, in qua liquores amari & acidi iterata circulatione successivè dulcescunt : apparet etiam in radicali rerum tangibilium per liquorem Alkahest resolutione, in qua v.g. ex vino Spiritus separatur suavissimus, longè ab aqua vitæ acrimonia segregatus. Quamdiu itaque humidum illud Spirituum pingue & oleosum dulce est, sani sunt, sanamque habent constitutionem.

6. Tertia qualitas, est Temperies calida & humida. Spiritus homogenii calidi sunt & humidi : Caliditas

luiditas consistit in igne , luce & lumine Spirituum : humidum autem quasi habitaculum ignis est & alimentum , quo sustentatur & subsistit. Humidum hoc etiam calidum est , consistit in dulci pinguedine, oleositate , & citate. Vita nostra consistit in calido & humido , quod Temperamentum est viventis , & communiter dicitur calidum & humidum radicale & influens. De hac Spirituum qualitate uberius supra, cum primis c. 16. in Definitionis enucleatione egimus, propterea crambembis coctam hic non animus est apponere.

II. Naturalis Spirituum constitutio consistit in debita eorum

7. Quantitate, sufficienti copia, mensura & robore, hoc est , quantum sufficit ad sanitatem , ad potentiam actiones naturales exercendi. Ut nimirum debite & sufficienter concoquant, ut Spiritus ab alimentis sequestrare, ventilare, specificare, sanguinem rubificare , à grumescen-

mescentia præservare, alimenta assimilare, heterogenea sequestrare, corpus & organa movere, gubernare, inque suo robore conservare valeant. Spiritus itaque quando sunt in debita copia, robusta satis nostra sunt corpora & sana, robur enim homini conferunt, omnibusque visceribus & partibus suum, quem vocant, tenorem conservant.

III. 8. Naturalis Spirituum constitutio consistit in Motu circulari, & naturali influxu. Motus, 1. Calorem conservat, 2. alimenta concoquit, & ab iis separat & ventilat Spiritus. 3. rectificat, dulcificat, perficit & specificat eosdem. 4. distribuit eos per omnia viscera, partes & membra. 5. à putredine & grumescentia præservat sanguinem & corpus. 6. heterogenea quævis & excrementa sequestrat & ejicit. 7. corpus movet, gubernat. 8. Lumen in radiatione conservat & vitâ. Quamdiu itaque motus iste Spirituum naturalis est in corpore, sanum

num est animal, homoque potentiam habet actiones naturales exercendi. De motu isto prolixius etiam egimus superius in explicatione Definitionis Spirituum.

C A P U T XIX.

DE NATURA.

1. Natura sumitur pro Deo. 2. Pro creaturarum complexo. 3. Pro eorum virtutibus. 4. Pro rerum magnetismo. 5. Pro Spirituum robore & debilitate. 6. Pro moribus.

VOcabulum Naturæ apud autores πολύδημον est.

1. Primò significat Deum, qui Natura est Naturans, de qua Seneca in I.V. de beneficiis. c. 7. præterea quacunque significatione sumatur, semper innuit Spiritus, Spirituum virtutes, dotes, affectiones, constitutiones, facultates, indolem, activitates. Mundus visibilis utrobique gubernatur & conservatur ab invisibili.

2. Ita Natura sumitur interdum, & pro omnibus creaturis, & quæ in creatu-

creaturarum sunt serie: ita nonnulla dicuntur esse in Natura, id est, inter creaturas, aut in creaturarum serie.

3. 2. Natura sumitur interdum pro virtutibus creaturarum, energiis, facultatibus & virtutibus, quas Gloriosus Creator creaturis suis imprefit, e. g. Naturam, hoc est, facultatem, virtutem dedit homini generandi, vegetabilibus vegetandi, sese multiplicandi; igni calefaciendi.

4. 3. Interdum pro lege illa regulari & immutabili quam divina sapientia creatis suis imperavit; v. g. astris injunxit motum perpetuum, quem religiosè observant elementis desiderium, magnetismum, sympathiam, fontem suum & originem appetendi, similibus appetitum sese congregandi.

5. Natura etiam sumitur pro Spirituum robore & debilitate. Hinc Natura dicitur robusta ratione Spirituum, quatenus in quantitate sunt sufficienti; debilis, ratione paucita-

tis eorundem: & hinc Natura dicitur optima morborum medicatrix, quæ facultas & natura medicatrix sita est in Spiritibus, eorundem robore, virtute, activitate. Tota itaque Natura, omneque in Natura naturale est à Spiritibus.

6. Demum Natura sumitur pro moribus, qui sequuntur temperamentum; v. g. homo naturâ dicitur hilaris, tristis, calidus, frigidus, &c. illa autem naturarum & morum diversitas etiam est à diverso Spirituum temperamento, dispositione, constitutione: Magnanimus Spiritus habet Leoninos, hoc est, calidos: meticulosus, leporinos: hoc est, tenebricosos: fatuus, stupidus, asininos, hoc est, impuros. Mores sequuntur Spirituum indolem & temperiem, ut in sequenti titulo de Temperamentis fusius monstrabitur.

CAPUT XX.

DE TEMPERAMENTIS.

1. Temperamentum quid? 2. Calidum. 3. Humidum. 4. Frigidum. 5. Siccum. 6. Sanguineum. 7. Cholericum. 8. Phlegmaticum. 9. Melancholicum. 10. Hilaris qui? 11. Iracundi unde? 12. Segnes. 13. Morosi. 14. Meticulosi. 15. Judiciosi. 16. Memoriosi. 17. Temperamentum est Spirituum productum. 18. Temperamenta mutantur. 19. Catarrhi unde? 20. Temperamentorum differentiae. 21. Temperamenta sexus. 22. Mutatio.

Quomodo Temperamentum à Physicis & Medicis sumatur, tyronibus notum est.

1. Nobis non aliunde, & nihil aliud est, nisi certa & peculiaris constitutio & dispositio Spirituum. Quocumque enim modo à Physicis sumatur & Medicis Spiritus constituent Temperamentum misti & viventis. Sine Spiritibus corpus naturale non potest dici temperatum aut intemperatum.

2. Calidum illud, ignis est seu
E 2 Spiritus

Spiritus misti & viventis, & ille Spiritus in vivente movetur, in misto quiescit, communiter dicitur calidum innatum.

Humidum est habitaculum ignis, pingue illud & oleosum, radicale & influens, quod communiter humidum radicale dicitur, seu primigenium, de quo supra in definitione Spiritus egimus.

4. Frigidum est Spiritus frigidus, qui in absentia sufficientis caloris notabiliter percipitur.

5. Siccum est receptaculum, vehiculum humidi & calidi, vel potius siccitas est ex insufficientia humidi; pinguis, oleosi, & rei, radicalis & influentis.

6. Temperamentum itaque sanguineum calidum est & humidum, constituitur ex serenitate, puritate, & naturali temperie Spirituum calida & humida.

7. Cholericum, calidum est & siccum, ex prædominante calido seu igne, & non sufficienti humido, oleoso.

8. Phleg-

8. Phlegmaticum, humidum est & frigidum, ex imminuto igne seu calido & luxuriante humido oleoso.

9. Melancholicum, frigidum & siccum, ex insufficienti quantitate calidi naturalis seu ignis, & humido pingui seu oleoso.

10. Sanguinei, ratione morum hilares sunt, ob spirituum naturalem constitutionem, calidam, humidam, eorumque serenam radiationem. Serenitas enim, lux, lumen, lætitiæ causa sunt, in macro- & microcosmo, tenebræ contra, tristitiæ, mœroris. Serenantia Spiritus hominem reddunt hilarem, qualia sunt v. g. vinum, omniaque calefacientia facultatem habent serenandi, extendendi, purificandi Spiritus.

11. Cholericī animosi sunt, ex nimia Spirituum libertate & prædominio calidi seu ignis, qui non satis coercetur, cohibetur & moderatur, nec sub iugo & imperio tenetur ab exigua illa pingui & oleosa

humiditate , qua aliàs immergitur , sufflaminatur , & temperatur : idcirco facili negotio , ignium instar erumpit , coruscat , exardescit ex idea hostili feriente Spiritus , motu orgasmico extenduntur , inflantur , igniuntur , corpusque incalescit , facies efflorescit , hinc ira , iracundia , ex candescencia .

12. Phlegmatici sedatiores sunt , ob humidum oleosum , quo immersus est ignis alioquin activus , & quod obducit & obtundit eum .

13. Melancholici cogitabundi sunt , morosi , constantes , ob Spirituum densitatem , spissitudinem , crassitiem , consistentiam , firmitatem , quietudinem : .

14. Tristes , meticulosi fiunt , impuritas si accedat & tenebricositas : tenebræ causa sunt metus , tenebræ enim è diametro opponuntur luci , hinc perpetuus metus : .

15. Judiciosi sunt melancholici , ob siccitatem , in qua dicitur esse iudicium : ideæ enim Spiritibus oblatæ &

tæ & impressæ minus fluctuant, sed ea quæ congrua sunt & conveniunt commodius mutuò coaptantur, hinc iudicium.

16. Memoria & iudicium in uno subjecto non combinantur. Memoria enim est in Spirituum humido, pingui, in quo facilius, clarius, magisque luculenter imprimuntur rerum idæ, non secus ac in cera ductili imagines. Fluctuant tamen magis in humida quàm in sicca constitutione.

17. Temperamentum itaque seu complexio, Spirituum productum est & emergens. Spiritus hominem constituunt temperatum, calidum, frigidum, humidum, siccum, pro ratione constitutionis eorundem. Ut corpus universum & singula membra suum habeant debitum temperamentum, requiruntur Spiritus, qui fabricatores sunt temperamentorum seu complexionis.

18. Cùm autem vicissitudinibus & mutationibus obnoxii sint Spiri-

tus , idcirco etiam temperamenta mutantur pro varia mutatione constitutionis Spirituum. Spirituum enim igneum , pingue , humidum multiplicari , interdum imminui potest : hinc tot temperamentorum vicissitudines. Spirituum ignis & humidum augeri potest liberiore diæta , dissipari quotidie motionibus , laboribus , exercitiis , cum primis in morbis : ♀r , in intemperiem convertitur temperamentum , quando pingue , humidum , ♀r attactu salium lixivialium , ♂lium mutatur in aqueum. Apparet hoc mechanicè in lixivio , quod pinguidinem mutat in aquam ; idem in sale ♀ri lixiviali , qui Spiritum vini oleosum mutat in aquam.

19. Ex ejusmodi Spirituum in aquam conversione fiunt & oriuntur catarrhi seu defluxiones , scorbuticis ex sale lixiviali familiares : apparet hoc in purgantibus , quæ humores , Spiritus , carnem & sanguinem
sale

fale volatili in liquamen & mucum
commutant: ex argento vivo, quod
Spiritus & quosvis humores vertit
in putrilaginem & salivam: ex scor-
buto, in quo sal scorbuticum Spi-
ritus corrumpit & humores: ex
tabe, consumptione, marasmo, im-
primis ex diabete, in quibus colli-
quatio accidit Spirituum.

20. Differunt etiam tempera-
mentatatione ætatum. Infantes &
pueri temperamentum habent hu-
midum, ex abundantia oleosi &
pinguis, Spirituum humido radica-
li, quo igneum obductum est & ob-
rutum: juvenes calidi sunt, ob tem-
periem Spirituum calidam & humi-
dam. Viri cholericici, calidi sunt &
sicci, ob paulatimam humidi immi-
nutionem, dissipationem: Senes
frigidi sunt & dicuntur sicci, ob ja-
cturam & depauperationem calidi
& humidi nativi.

21. In sexu quoque Tempera-
mentorum quædam est latitudo.
Fœminæ frigidiores sunt, ob pulsum

debiliorem; plurimum tamen sanguinis generant ob pulsum cordis & arteriarum concitatio-rem. Mares seu viri calidiores sunt, ob pulsum durio-rem, qui Spiritus reddit puriores, sereniores, magis igneos. Et hæc secundum doctrinam Spirituum, est ratio diversitatis Temperamentorum sexuum, ætatum, ingeniorum, morum, roboris, virtutum: de quibus in subsequen- tibus sub titulis suis.

22. Temperamentum itaq; mu-
tatur, 1. ætate. 2. victus ratione, ci-
bo & potu. 3. vitæ genere. 4. animi
affectibus & pathematibus, v. g.
mœroribus. 5. regione. 6. aëris
mutatione. 7. morbis, evacuatio-
nibus sensibilibus. 8. aliis rebus non
naturalibus, vigiliis, repletionem, &c.

C A P U T XXI.

DE NUTRITIONE

& Metempsychosi.

1. Nutritio fit beneficio Spirituum. 2. In pri-
ma coctione fit *πνεύματωσις*. 3. Fer-
mentum

mentum quid ? 4. Est salinum. 5.
πνευματώσις fit beneficio Spirituum.
 6. Nutritio fit tantum per spirituosas. 7.
 Salita insalubria sunt, ut & morticina. 8.
Μετεμψύχωσις Pythagorica restituitur.
 9. Animæ materiales sunt & conspicuæ.
 10. Actiones specificæ unde ? 11. Unde
 puerorum lumbrici. 12. Unde pinguedo
 corporis, macies, tabescentia.

IN præsentī hac nostrā, de Spirituum Natura, Medicīna & morbis, Doctrīna, non immeritō tractandus est titulus de Nutritione. Doctrinam hanc ad invidiam usque pertractarunt alii haut ignobiles Medici, ad quorū lectionem curiosos rerum naturalium remittimus studiosos.

1. Nos, hoc loco tantum quid ad nutritionem conferant Spiritus, exhibebimus, forsan non errabimus, nec peccabimus, si, nutritionem sine Spiritibus fieri non posse, asserimus. Odore panis id est, Spiritu panis triduo vitam produxit Democritus. Loqui saturantur odore, id est, Spiritibus ciborum,

quos tractant, propterea cibum minus appetunt. Nuysement doctissimo suo tr. p. 175. loquitur ita : *Cibi omnes non sunt nisi excrementa , succum invisibilem & spiritualementantum continentes , aptum ut in carnem & substantiam nostram congeletur & transubstantietur, ac proinde à natura attrahitur, tota massa per loca destinata rejectâ.* Coctionem primam quod attinet , Sennertushinc inde docet , omnem coctionem esse *πνευματίωσιν* , spiritualisationem , Hippocrates vocat , meteorisationem , sublimationem , quæ initium suum statim in stomacho sumit , ibi enim alimentorum prima fit analysis , separatio , in chylicatione , beneficio spirituosæ fermenti. In prima statim coctione fieri Spirituum separationem ab alimentis evincunt ructus nidorosi , qui nihil aliud , nisi Spiritus ab alimentis separati , qui , cum sint leves per superiora exitum quærunt , Spiritus autem esse alimentorum ex nidore patet.

Pneu-

2. Pneumatofin illam alimentorum maximè promovet in prima coctione fermentum ventriculi. Fermentum ventriculi est vel Spiritus acidus ventriculo natus, vel Spiritus quispiam quotidie assumptorum, quo tunica ventriculi imprægnata sunt, inebriata, imbuta: ille Spiritus reciprocè radiat in reasumpta, evocatque per similitudinem Spiritus ex alimentis, & hæc est prima & rudis separatio Spirituum à cibis & potu per fermentum iis conveniens & simile, omnis enim solutio fit per similia. In aviculis, gallinis acidus est, ut & in hominibus, interdum amarus, hinc per acida & amara stimulatur & vegetior redditur: interdum assumptorum quodammodo saporem sapit, hinc ratio sumitur, quòd dura, concoctu difficilia, concoquantur faciliùs, ab iis, qui assueti sunt duris cibis, quàm mollibus.

2. Sunt, ut dictum, nonnulli, qui Fermentum stomachi salinum

statuunt, & quidem non sine causa: omnes enim solutiones fiunt per salia, etiam Spiritus vini solvens suam habet acrimoniam à sale dulci volatili: menstruum universale dicitur sal circulatum. Illud sal seu fermentum est Spiritus salinus, vel acidus, vel ab assumtis ventriculo inspiratus, qui facultate terebrante, punctiva, stimulante pungit, vellit stomachum, & hæc punctura & vellicatio fames dicitur, & naturalis; si luxuriat caninus: in diuturna fame solvit ille Spiritus fermenti salinus, corrodit, consumit, liquefacit ipsam stomachi substantiam acritudine sua, hinc intolerabilis cum continua fame conjuncta est tortura, dolor & mors tandem acerba, miserabilis.

Sal illud fermentale separat à cibis acritudine sua alimentorum compagem & ligaturas, Spiritus fugat, insidemq; animum præbet, imò januam aperit fugiendi, servitutis jugum excutiendi, & libertatem capescendi.

Fer-

Fermenta salia esse patet ex fermentorum omnium sapore falso, amaro, stiptico, acido, qui omnes haut tacite & indubie insinuât nobis fermentorum naturam salinam. Salia illa esse Spiritus patet mechanicè ex calore & mutua actione, quando enim ejusmodi salia committuntur ad fermentescendum, mutua fit, non tantum actio & collisio, sed calor etiam exoritur satis sensibilis, imò incendium, ignem enim concipiunt: Kergerus de ferment. p. 169. *Spiritum vini à phlegmate purgatissimum, spiritui minerali acido rectificatissimo sive fuerit spiritus nitri, sive vitrioli, sive salis, sive aquæ fontis infundas, fermentescendo flammam concipiunt.* Salia esse meros ignes, patet ex alkalibus, salibus concentratis, calce viva. Observationes enim docent calcem vivam in inundationibus, in mediis fluctibus flammam concepisse, domos conflagrasse. Illud ipsum igitur fermentum, ut supra dictum, salinum, inest partim natu-

naturaliter ventriculo aliisque visceribus & partibus connatum, ut apparet ex tunicis ventriculi gallinarum, quæ acidi sunt saporis; partim e. g. ex pane, aliisque alimentis assumptis ventriculo communicatum est, & quasi inspiratum.

5. Prima itaque πνεύμασις in ventriculo fit beneficio fermenti, hoc est, Spirituum salinorum, qui alimentorum partes facultate salina, hoc est, aculeata, terebrante, pungente, separant & dividunt, alimentorum Spiritus sentientes pungunt, ad fugam irritant, stimulant. Extemporaneam autem πνεύμασιν, & Spirituum ab alimentis fieri in ventriculo separationem, patet ex alimentis & potulentis spirituosiss, i. enim ructus, qui ejusmodi ex alimentis elewantur & fauces feriunt & nares, Spiritus sapiunt, & Spirituum habent acrimoniam. 2. quia Spiritus in ventriculo ex alimentis separati caliditate & dulcedine sua feriunt orificium ventriculi, &

li, & per consensum capitis & cerebri membranas seu ipsum caput: hinc post vinum incalescentia, color roseus, ebrietas, somnus, animositas, non nisi à naturali Spirituum dulcedine, generositate. Spiritus enim vini, qui quasi in limine hærent, facili negotio à vino sunt separabiles. Helm. p. 724. *Reperio, quòd vinum parte sua v. nosa, aquam vitæ contineat, ideoq₃ facilè, citò atque absque fellis digestis maturitatibus rapi per arterias stomachi ad cor, sive advocari immediatè in supplementum & defectum Spiritus vitalis.* Sicut itaque ea, quæ facilis sunt solutionis spiritaliscunt, eodem etiam modo, & ea quæ difficilioris sunt solutionis & coctionis, debent spiritaliscere ab appropriatis suis fermentis, ut in prima, ita multò magis in secunda & tertia coctione: itarata enim coctiones sunt itarata alimentorum solutiones, Spirituum sequestrationes, rectificationes, circulationes, purificationes.

Porro

6. Porro nutritionem fieri & conservationem corporum animalium per Spiritus, patet etiam exinde, quod alimentis tantum & potulentis spirituosus nutriantur & conserventur. Ut ignis, igne conflagrabiliū sustendendus est & alendus: ita etiam Spiritus corporis nostri tantum per Spiritus alimentorum igneos. Tenzelius inquit: *Nil quicquam nos alere potest, nisi quod ipsum etiam alatur, sitque vitæ præditum, quoniam nostra vitæ, nostraque mummia vitali & congeneri, neque corporis nostri substantia, aliâ nisi illorum materia sustineri potest.* Vinum, aliaque spirituosæ in os sumpta, statim reficiunt hominem, non aliunde nisi per Spiritus. Hinc omnium Medicorum consensu carnes recentes salubriores sunt, quàm in sale conditæ, & fumo induratæ. Recentes enim succi & Spirituū adhuc plenæ sunt, copiosiores itaque suppeditant corpori Spiritus & longè efficaciores: salitæ contra, paucos, crassos,

crassos, salinos, acres, impuros, fermento putredinis infectos, morbosos; hinc obstructions, malum hypochondriacum, scorbutus, arthritis vaga, & infinita, inexhausta malorum & morborum ilias.

Nocentissimæ sunt carnes morticinæ, utpote quæ seminia morborum, ideam mortis sibi & Spiritibus impressam, imò ipsam mortem in se continent, & hinc, quò minus tangantur, in lege divina prohibitum est. Spiritibus itaque corpus nostrum nutritur & conservatur, id quod minus spirituosum est, per emunctoria, tanquam scorix & quisquilix rejicitur, v. g. vinum vomitu reiectum, vinum non amplius est, sed vappa acida tantùm, iners, excors, elumbis, nullarum ferè virium. Per urinam quicquid emititur est partim aqueum, partim salis parum in se continet. Alvi feces spiritus quidem retinent quosdam, purioribus tamen orbata sunt. Natura itaque spiritus sibi à cibis curiosè

riosè & sedulò separavit nobiliores, pro sui restauratione & conservatione. Imò ipsa universa sanguinis substantia Spirituum beneficio spirituosa est, & tota volatilis in corpore humano, nullæ enim partes in sanguine fixæ sunt, sed omnes successivè per sensibilem & insensibilem transpirationem volatiles sunt & fugitivæ.

8. Pythagoras Philosophorum sapientissimus, cùm ingenii acumine observasset, sublunaria omnia Spiritibus tantùm vivere, nutriri, docuit discipulos suos animas sensitivas & vegetabiles migrare è corpore in corpus. Per animas autem nil aliud potuit intelligere, nisi animas sensitivas & vegetabiles materiales, quas uno nomine Spiritus vocamus. Non animas hominum intellixit sapientissimus Philosophus, quæ divinæ est particula auræ, immortalis, & confessione saniorum etiam Ethnicorum in campos Elysios, seu verius ad Deum, à quo origi-

originem sumsit, per magnetismum & naturalem similitum tractum, transmigrabilis, ut testantur inter alia verba Ciceronis & Senecæ. Successores ejus non satis mentem & intentionem Præceptoris assecuti, extenderunt *μετεμψύχωσιν* ad animas etiam hominum immortales, sed malè. Metempsychosis nihil aliud est, quàm circulatio & transmigratio Spirituum vegetabilium in animalia, animalium in animalia, animalium in homines, hominum & animalium in aëreos, aëreorum in terram, terræ iterum in vegetabilium. Et hæc est rerum naturalium periodus, circulus, initio & fine carens, antiquorum serpens gyrtus, seipsum mordens, caudamque suam devorans.

9. Animæ sensitivæ & vegetabiles materiales dicuntur, materiæ immersæ: si jam animæ sunt materiales & materiæ immersæ, utique in corporum naturalium accuratissima in partes & atomos subtilissima
reso-

resolutione , demum sese ostendunt, & in conspectum prodibunt, nil autem in simplicissima corporum naturalium analysi , quæ fit vel per ignem , vel per fermentationem amplius apparet,quàm principia naturalia omnibus cognita & conspicua. Non in terra lätitat anima potior animalis pars , quæ caput mortuum est & legne , ut dicitur principium : non in aqua , quæ minus est actiuosa & ignea. Ergo vel in ære vel in sale, vel spiritu, dico in Spiritu, quia ær & salia sunt Spiritus concentrati, & in Spiritus resolubiles : anima igitur erit vel in Spiritibus , vel potius ipsi Spiritus erunt ipsa anima sensitiva & vegetabilis : anima enim est ignis, Spiritus autem sunt ignei , inflammabiles , conflagrabiles penitus, nil nisi meri ignes. Animas seu Spiritus , animalia ingredi, è corpore in corpus migrare, demonstrant sensus. Videmus enim ex animalibus mortuis & putrefa-

refactis regenerari animalia. Resolvuntur corpora mortua in ea animalia, quibus viva vesci sunt solita.

10. Quod autem attinet actiones sensitivæ & vegetabilis specificas, diviniore, secretiores, quæ Spiritibus à corpore solutis minus convenire videntur, sciendum est, illas facultates omnes diviniore habere, & Spiritibus inspiratas esse in prima creatione à Creatore. Omne enim quod creavit, vivificum creavit creator, animatum, spirituosum, & hinc anima est prolifera, proprium sibi format domicilium, aliasque habet affectiones & operationes specificas. Has, inquam, habent & peragunt vi & facultate phantasie creatricis, quæ divina est, & à Deo, potens, fecunda, multiplicabilis, beneficio verbi benedictionis & creationis. Non itaque mirum est, Spiritus habere potestates, occultas, inexplicabiles; quicquid enim habent, habent

bent ex dotatione , dispensatione , benedictione & verbo gloriosissimi Conditoris , quam facultatem & quas vires retinent , non solum in specificis suis habitaculis , sui quando sunt juris & liberi , sed etiam aliis corporibus involuti , in carcerati , & quasi subjugati : v.g. Spiritus vermis sub jugo , e.g. arboris & ligni , obtinet sub jugo facultatem formandi corpus proprium , seseque multiplicandi , aliasque specificas facultates , quam primum enim liber & sui juris fit Spiritus vermis , expirante anima vegetabili , suum sibi statim proprium format & conveniens domicilium , iterumque fit vermis , e.g. lumbrici terrestres , ova fibris radicum arborum affigunt , succum liquefactum cum succo terræ , fibræ sugunt , attrahunt , & fit nutrimentum arboris & fructus , quiesca infantium , in quibus fatiscente & corrupto vegetabili , animalis Spiritus jugum excutit , fotu excluditur , suumque proprium sibi format domicilium. Ex

Ex quibus omnibus jam dictis patet animam sensitivam & vegetivam nil aliud esse, quàm Spiritus, qui facultatibus suis instructi sunt, virtutibus animati, dotati, hinc specificè actiui. Quando itaque cum alimentis assumimus Spiritus animalium & vegetabilium, ingrediuntur corpus nostrum, nobis & naturæ nostræ fiunt domestici & familiares, juxta Pythagoram dicuntur migrare è corpore in corpus, mutari in animas nostras, & hæc est vera μετεμψύχωσις.

12. Unicum adhuc circa nutritionem succurrit. Cur quorundam corporum habitudo pinguescat, crassa fiat, & carnosa, aliorum gracilis sit, nonnullorum planè tabescat? Ratio est, quòd ii, qui Spiritus habent sanos, naturaliter constitutos, ex alimentis avidè propter similitudinem & identitatem alimentorum Spiritus attrahant, retineant, multiplicent, coacervent, sibi quæ assimilent. Hinc pinguedo,

F crassi-

crassities, carnositas naturalis, congeries est multorum concentratorum coagulatorum Spirituum. Macilenti contra Spiritibus abundant peregrinis, qui in stomacho, intestinis & primis statim viis alimentorum Spiritus sentientes fugant, hinc scorbutici, hypochondriaci, ut plurimum macilenti sunt, flatulenti, Spiritus enim alimentorum nutriendes, pinguefacientes, maximam partem in primis viis, in flatus redacti, per ructus aufugiunt, nec in sufficienti copia ad partes intimiores admittuntur, nedum assimilantur. Corpora morbosa, tabescentia, morbofis scatent, tabificis, alios mortificantibus Spiritibus, hinc tabes, marasmus, phthisis.

C A P U T XXII.

DE SENSIBVS EXTERNIS.

1. Sensus fiunt per Spiritus. 2. Externi. 3. Spiritus percipiunt externa grata & ingrata. 4. Quid multi scientia? 5. Quid phantasia?

1. Sen-

1. **S**ensus, Philosophorum & unanimi Medicorum consensu fiunt per Spiritus. Ut enim naturaliter fiant, requiruntur Spiritus.

2. Ubi sensus, ibi Spiritus & vice versa. Ut oculus videat, necesse est, ut oculi humores per nervum opticum Spiritibus illuminentur, quod patet in *ἀμαυρώσει*, ubi humor crystallinus à Spiritibus non illuminatus est, hinc cæcitas; omne itaq; animal Spirituum beneficio videt; ita si auditus organis sui denegentur nervi, aut Spirituum influxus, aboletur auditus: si lingua, sermo; ita in paralyfi, quando membro denegatur Spiritus, insensibilitas suboritur, & denegatur motus, omnes enim actiones, naturales, vitales, & animales, à Spiritibus. Ita lassitudo est à Spirituum defatigatione & jactura; tremor à debilitate & inopia; convulsio & motus convulsivus, à Spirituum vitioso motu. Motus impotentia à Spirituum insufficientia & defectu. Sternutatio,

horror , rigor à re Spiritus molestante. Vertigo à Spiritibus cerebri in gyrum quasi agitat. is.

3. Imò Spiritus percipiunt etiam assumpta interna , grata & ingrata , afficiuntur medicamentis extra applicatis : propterea membra dicuntur olfacere gratum & ingratum , cum primis uterus , externè applicata. Per organa sensuum , Spiritibus etiam Idææ communicantur : seu organa sensuum Spiritibus illuminata , irradiata , Spirituum beneficio quasvis rerum ideas suscipiunt , nil enim incurrit in mentem , quod non prius fuerit in sensibus : quicquid igitur scimus , per sensuum externorum Spiritus nobis est communicatum , spiritibusque impressum.

4. Hinc humana notitia & multis scientia nihil aliud est , quam multitudo idearum , Spiritibus per sensus externos homini impressarum , res enim non intrant Spiritus , sed rerum idææ : doctus ab indocto non differt , nisi idearum pluritate : lucrum,

crum, quod quis ex longa peregrinatione domum reportat, nihil aliud est, quàm multitudo idearum hinc inde collectarum & sensibus impressarum, quas ideas iterum depromit: per sensum visus imprimimus Spiritibus ideas rerum externas: per gustum, ideas saporum: per odoratum, ideas odorum: per tactum rerum superficies & consistentias.

Et ea ipsa procul dubio ratio est, quòd quilibet in præcõcepta opinione, in Philosophia sua & religione, in qua in juventute informatus est, admodum pertinax est; is enim informationis suæ ideas à pueritia sibi fortiter impressas, pertinaciter retinet, defendit, quæ difficulter aut planè non obliterare & eradicare permittit.

5. Phantasia autem est Spirituum labor continuus & indefessus rerum ideas volvens, revolvens, emit- tens; judicium autem coaptat.

CAPUT XXIII. DE GENERATIONE.

1. Generatio est creatio. 2. Fit per phantasiam. 3. Quid sperma? 4. Fœcunditas in Spiritibus consistit. 5. Unde mutuus amor. 6. Ratio pulcritudinis.

1. **G**eneratio nihil aliud est, quàm nova & iterata creatio. Facultas illa generandi seu creandi, homini & animalibus communicata est per verbum benedictionis: Crescite & multiplicamini; cujus verbi vi & potestate generat homo hominem, animal animal, vegetabile multiplicat vegetabile. **A** DEO per verbum benedictionis emanavit in animam & Spiritus virtus benedicta, quæ cum à DEO, divina ἐντελέχεια est, infinita generandi, & in infinitum prolificandi, sese multiplicandi facultatem obtinuit.

2. Facultas illa generandi & multiplicandi exierit sese in forti illa libidinosa phantasia; spermata enim, ut de generatione docet

Har-

Harvéus, fœcunda & animata redduntur per fortem libidinis phantasiā; secundum enim ejus & neotericorum observationes, partes feminis masculini, crassiores nihil conferunt ad generationem, sed Spiritus geniales fœcundum & prolificum reddunt semen, animantq; ova fœminina alioquin fatua.

Omnis itaque generatio necessario fit & naturaliter beneficio Spirituum. Harvéus de generatione, p. 142. *Nec enim teste Aristotele, inquit, quod semen fœcundum reddit est ejus corpulentia, aut ignis, aut talis facultas aliqua, sed Spiritus, qui in semine spumosoque corpore continetur, & natura, quæ in eo Spiritu est, proportionem respondens elemento stellarum.*

3. Sperma est subjectum seu vehiculum Spirituum genitalium; sperma est corpus spirituosum, cui in complexu Venereo per fortem libidinis phantasiā hominis idea est impressa; ex frequenti Venere & feminis emissionem debilitantur ho-

mines, infrigidantur & sterilefcunt. Cosmopolita, inquit : *Experientia testatur, homines veneri nimium deditos & indulgentes debiliores fieri, ut arbores nimios fructus ferētes fieri postea steriles.* Avicenna. *Coitus, inquit, evacuat de substantia Spiritibus rem plurimam, propter delectationem, & propter illud, qui plus delectantur, plus sunt cadentes in debilitatem.*

4. Ratio itaque fœcunditatis non in anima solùm, ita enim omnes promiscuè essent fœcundi, sed in Spiritibus lucidis, luminosis, puris, ovarium muliebri fœcundantibus, quærenda est. Sterilitas est ex defectu luminis, hinc humida, impura, morbosa corpora, ut & senes steriles sunt. Sanguinei spermate abundantes, & viri ob Spirituum serenitatem aptiores sunt ad generandum, quàm frigidi & senes: hinc impotentia generandi, ligatio, sterilitas est vel Spirituum ligatura, vel defectus, luminis immutatio aut obfuscatio. Pollutio nocturna est

est à Spirituum turgescencia, abundantia, effervescentia : dum enim idea lasciva in somno Spiritibus obviam venit, phantasia protrudit semen & ejicit. Idea itaque lasciva, pulcra, vel revera talis vel apparen-ter, Spiritibus obvia & impressa movet omnes Spiritus, cum primis autem geniales : frequens appetitus venerescens partim ex Spirituum abun-dantia, luxurie & ebullitione, par-tim à lasciva & pulcra idea Spiriti-bus obviante.

5. Mutuus amor est ex identitate, similitudine, paritate & conformi-tate Spirituum seu temperamento-rum. Fœcundum conjugium est à similitudine & inter se Spirituum convenientia, maris & fœminæ : Si enim temperamento conveniunt, utique fœcundi sunt & concordēs, si non, steriles : hinc si juvenis juven-culæ conjungitur, ut plurimum fœ-cundi sunt : si autem diversæ æta-tis copulantur conjugēs, ut plurimū discors suboritur & sterile conjugium.

6. Ut calidum & humidum optimum constituit temperamentum, ita omnem in natura format pulcritudinem, formositatem. Hominis venerem experti constitutio mutatur, ob Spirituum orgasmum, ebullitionem, turgescientiam & jacturam, hinc venerem ex pertirauescunt, hircissant, turgescunt.

C A P I T U L U M XXIV.

DE VIRIBVS PHANTASIAE ET IDEIS.

1. Quid phantasia? quid iudicium? 2. In quibus conspicua. 3. Cum primis in pathematicum ideis. 4. Quid idea per exempla demonstratur. 5. Idea ☉ is oculo imprimatur. 6. Ideæ rerum externarum per sensuum organa Spiritibus imprimuntur. 7. Violentæ difficulter tolluntur. 8. Ideæ scientiarum & artium. 9. Ideæ in somniis recurrunt. 10. Ideæ morbosæ. 11. Hæreditariæ. 12. Pathematicæ. 13. Pavoris & mortis. 14. Ideæ iræ, terroris. 15. Spirituum humidum assimilatur ceræ. 16. Idea timorosa. 17. Ideæ animalium pathematicæ. 18. Kircherus refert ad occultum magnetismum. 19. Ideæ sanitatis sunt

sunt & morborum causæ. 20. Sunt in duplici differentia. 21. Fermentales sunt, & seminales. 22. Phantasia format ideas. 23. Ideas multiplicabiles. 24. Serpens animal est innocuum. 25. Canis lambendo curat vulnera. 26. Vipera alexipharmaca est, signaturam habens palingenesias. 27. Animalia veneni ideam creant ex tempore. 28. Illud venenum ideale ignis instar est multiplicabile & exitiale. 29. In morbis idealibus non opus est purgatione. 30. Helmontius curat eos, per extinctionem. 31. Phantasie vires vix nobis sunt explicabiles. 32. Mirabiles ejus juxta Baconem virtutes.

I. **P** Hantasia est actio & facultas divinior à Creatore homini inspirata, Spiritibus communicata, cujus beneficio non tantum cognoscit rerum ideas externas, sed etiam volvit, & revolvit demumque coaptat, & tunc judicium dicitur. Imò ideas formandi & multiplicandi potestatem habent Spiritus, quos sibi imprimunt, quibus vario modo disponuntur, & hinc sanitas, interdum & morbus. Libidinis phantasia semen reddit proliferum, ea-

dem, embryoni nævos imprimit, monstrosum interdum efficit.

2. Virtus phantasiæ hinc inde conspicua est,

3. Cum primis in animi pathematibus, in quibus variè disponit, movet, agitatque Spiritus, iisdem varias imprimit pathematum ideas & charagmata, quæ sanitatis pariter & morborum causæ sunt; indeque fit; quòd Spiritus, qui antea erant sereni, tenebricosi; qui crassi & impuri, sereni fiant & clari; qui quieti, inquieti, trepidantes, furibundi.

4 Quid sint ideæ, quæ partim formantur à Spirituum phantasia, partim per phantasiam corporibus Spirituum humidis ceu sigillis imprimuntur, difficulter exprimere possumus; superius, c. 12. in seriem Spirituum ideas promovimus.

Per exempla jam existentiam earum & quidditatem quodammodo demonstrabimus.

5. Idea, v. g. ☉is imprimitur oculo

culo nostro, quando post ☉is obtutum oculus clauditur, deprehenditur idea quædam ☉is post obtutum.

6. Illa suo tempore durabilis est, tandem evanescit: ita nubibus imprimitur iris, idea ☉is; eodem modo Spiritibus nostris, per sensus externos omnium rerum communicantur simulacra & ideæ, v.g. visibiles, per visum: audibiles per auditum, hinc campanarum sonus diu post cessationem sonat in aure: ita species saporis figitur in Spiritibus, ita ut quando recordamur delectabilis saporis, mirificè afficiamur, & salivemus. Ita circa recordationem rei cujusdam abominabilis nauseat stomachus, aut vomiturit ventriculus.

7. Ejusmodi ideæ, præsertim violentæ, interdum admodum difficulter oblitterantur, tolluntur, & non mirum, si ad obtutum ☉is, tanquam subjecti lucentis violenti, violetur visus: idem accidit visui

Insulanorum in Archipelago , quæ aliquot diebus insolitas intuiti sunt & terribiles eructationes igneas è terra & mari , de quibus Kircherus in mundo subterraneo.

Epilepsia puerorum ex terrore Spiritibus adeo profundè imprimitur , ut hæreditaria fiat , imò in nepotem propagabilis.

8. Eodem modo & corporis nostri Spiritibus , in scientiarum & artium apprehensione rerum infinitarum inculcantur ideæ.

9. Ideæ Spiritibus per sensus impressæ recurrunt nobis & apparent in somniis , v. g. idea parentis , fratris , conjugis , amicorum , canis , & cujusvis rei antea perceptæ.

10. Ita morbosæ dantur ideæ , v. g. epileptica , hydrophoba , salatrix.

11. Hæreditaria , v. g. abominatio casei , butyri , pomorum , rosarum.

12. Pathematica , terroris , mœroris , tristitiæ , ærumnosa , terribilis :

Bilis: ita lasciva Spiritibus imprimatur idea exesu lascivientium: pigra, ex usu pellium animalium pigrorum: ita putaticius in somniis fit homicida aliquis post esum carnis bovis in ferocia occisi; ita rabidus quispiam fit & hydrophobus ex morfu canis rabidi; saltator ex punctione taratantulæ.

13. Idea pavoris, sudori morientis, sanguini hirci cum pavore occisi, in sculpta, pavidos reddit, & tranquillos corporis nostri Spiritus tumultuantes, turgescences, enormonticos.

14. Ira commovet Spiritus ad turgescentiam, ille ipse Spirituū organinus redit per periodos aliquoties sedata irâ: illud igitur ipsum, quod sedata ira Spiritus commovet de novo, vocamus ideam iræ; ita illud ipsum quod longè post terrores, paroxismos epilepticos Spiritus ad motum trepidationis, vibrationis vel convulsionis concitat, dicitur idea terroris.

15. Corporis nostri Spiritus calidi sunt & humidi, talemque habeant constitutionem, ut ceræ instar quasvis faciliè ideas, ceu sigilla, imprimi sibi patiantur, quæ ideæ prout fortiter imprimuntur, vel leviter aut superficialiter, ita pertinaciter vel leviter inhærent: leviter impressæ, facili negotio exterguntur, obli-
rantur, extinguuntur: pertinaciter, contumaciter inhærent, difficulter tolluntur, & interdum in vitam sunt durabiles,

16. Imò hæreditariæ sunt interdum & in prolem propagabiles, e.g. idea timorosa, quæ epilepsiæ causa est in filium propagata, in nepote non rarò repullulat.

17. Eodem modo & omnium animalium pathemata, indoles, in hominem esu carnis & sanguinis transfundi possunt; & hinc usus sanguinis in lege divina seriò est prohibitus, cum sanguis Spirituum sit vehiculum.

18. Audiamus Kircherum in arte
magnet.

magnet. l. 3. part. 8. quæst. 2. Sicut igitur quadam animalia venenosa sunt, quæ prorsus eandem affectionem, quam ipsa patiuntur, morsu in alios transferunt; ita Dipsas serpens, cum semper fervida siti crucietur, talem quoque efficit mordendo in homine, juxta illud: ut sitis hanc torquens nullis extinguitur undis; sic rabidam morsu concitat illa sitim. Ita canis rabidi morsus eam passionem, quam in cane efficit, etiam in homine præstat, videlicet ὕδρφοβίαν seu metum aquæ: ceras-tes quoque, ut ab Ægyptiis accepi, πυρφοβίαν seu metum ignis lucisque, tam in serpente, quam in homine ejus veneno infecto, incutit. Ita torpedo, torpida membra reddit, & sicut parens quoque podogra, lepra, epilepsia laborans in semine filio eosdem morbos communicat; non secus taratantularum diversarum venena ab insita sibi proprietate videntur iecti animum ad eum calorem, quem ipsa referunt, seu quo ipsa recreantur, occulto magnetismo, seu cæca quadam naturæ similitudine inclinare.

19. Nos in hac nostra Spirituum Medicina ideas ejusmodi consideramus, quatenus sanitatis sunt & morborum causæ; sanitatis, quatenus lætæ, pulcræ, geniales, sensus internos & externos afficientes, tales enim extendunt, serenant Spiritus: Morborum, quatenus violentæ, odiosæ, tædiosæ: tales, Spiritus reddunt crassos, trepidantes, meticulosos, fugientes, sese contrahentes, furibundos.

20. Sunt enim idæ in duplici differentia; nonnullæ enim oblectant, delectant, recreant, dilatant, & expandunt Spiritus, quales sunt pulcræ, geniales, lætabundæ, amoroſæ, delectabiles: nonnullæ maximè inimicæ sunt Spiritibus, iisdemque adverſantur, quales sunt, v. g. idea odiosa, timorosa, irascibilis, hostilis, molesta, ærumnosa, lugubris, luctuosa, terribilis, formidabilis, vindicatrix, tenebriosa.

21. Ejusmodi, inquam, idæ sanitatis

nitatis sunt pariter & morborū causæ, & secundū Helmontium fermentales, seminales & multiplicabiles, ut apparet in ictu tarantulæ & morfu canis rabidi. Cum veneno enim tarantulæ, Spiritibus communicantur ideæ saltatrices, cum saliva canis rabidi multæ canicularum ideæ, quæ etiam nonnunquam in saliva & urina fuerunt conspicuæ.

22. Illud ipsum quod ideas format & multiplicat fortis est Spirituum phantasia, quæ facultas est creatrix, creandi, formandi, multiplicandi Spiritus, species, ideæ, e.g. morsus canis rabidi exitiosissimus est, fortis enim Spirituum phantasia cum iracundia ideam iracundiæ ejusdem rabiei & hydrophobiæ transfundit in alterius corporis Spiritus.

23. Quæ ideæ multiplicabiles sunt & fermentales, hinc hydrophobus non aquam tantum omnesque liquores timet, sed morfu etiam alios impetit.

24. Eadem

24. Eadem ratio est in omnium animalium morfibus, e. g. serpentis, serpens animal alias innocuum, fugitivum, meticulosum, morfu duntaxat, qui cum forti iracundiæ phantasia fit, nocet: imò morsus iracundi etiam hominis noxius magis est, quàm alia unitatis solutio, quatenus cum iracundiæ phantasia & nocendi intentione fit: iracundiæ enim semina ignium instar multiplicabilia alteri communicantur, infunduntur, quæ tam exitialia inferunt symptomata, quod ex allegatis satis patet exemplis. Canis rabidus, ut dictum, Spiritus validos morfu suo iracundo, alteri communicat animali, ignis instar in eo multiplicabiles.

25. Catus blandiens vulnera cum blandimentis curat cum saliva vehente Spiritum blandientem, amorphum, medicamentosum, quem creat, & vulneri allambit, infundit.

Viperas venenatas non esse asserunt observationes de viperis habitæ

habitæ à Francisco Thedo Florentiæ.

26. Viperæ & serpentes per se innocuæ sunt, meticulosæ, fugientes, palingenesis in corpore per exuviarum depositionem habent signaturam, hinc inter alexipharmaca primas tenent, & præcipua theriacæ sunt basis.

27. Vipera, canis, felis, tarantula, aranea, apis, homo, &c. venenum, hoc est, Spiritum iracundum creant ex tempore, quem cum iracundiæ phantasia alicui inferunt:

28. Venena itaque talium videntur mihi esse Spiritus iracundi, qui facultatem habent ignis instar sese multiplicandi, Spiritus nostros suffocandi, consumendi, interimendi, occidendi, & tali modo fiunt, creantur, multiplicantur, & nocent venena quorumvis animalium exitialia. Idem mecum sentire videtur Charasius in Historia Naturali animalium, quæ theriacæ compositionem ingrediuntur; in qua flagellationem

lationem viperarum non saltem inutilem, sed & periculofam esse afferit, quoniam Spiritus ita irritati in corpore animalis producere venenum possint, ubi antea nullum fuit. Ita bufo stimulis irritatus inflatur venenumque spirat.

29. In ejusmodi itaque morbis idealibus non semper opus est purgatione, cum non semper adsit humorum apparatus: extrahunt communiter chirurgi venenum spirituosum per cucurbitulas:

30. Helmontius extinguit ideas, & obliterat per submersionem in aquas, eodem modo ac gallinis phantasia & desiderium incubandi ovis.

31. Tandem concludo hocce caput & hancce doctrinam, fateorq;, vix explicabile esse, quas vires habeat & imperium phantasia in Spiritus & corpora.

32. Audiamus profundi ingenii scriptorem Anglicanum Rogerium Baconem, de secretis operibus artis

artis & naturæ: Considerandum tamen quia peritus medicus , & alter quicumque habet animum excitare; carmina & characteres licet fictos, utiliter , secundum Constantium Medicum , potest adhibere; non quia ipsi characteres aut carmina aliquod operentur ; sed ut deo ius & avidius recipiatur medicina & animus patientis excitetur , & confidat liberius , speret & gaudeat , quoniam anima excitata, potest in corpore proprio multa renovare : ita ut de infirmitate in sanitatem convalescat , ex gaudio & confidentia. Anima multum potest super corpus suum, per suas affectiones fortes , ut docet Avicenna in l. de anima & 8. de animalibus , & omnes sapientes concordant. Et ideo fiunt coram infirmis ludi , & res delectabiles afferuntur : imò aliquando appetitui multa conceduntur contraria : quia vincit affectus & desiderium , & anima spes supra morbum.

CAPUT XXV.

DE MORIBUS, INGENIO,
Memoria, Indole, Sapientia, Pruden-
tia, Indicio, Eruditione.

1. Medicus Temperamentum sciat & sanan-
 dorum mores. 2. Temperamentum est
 duplex. 3. Causa efficiens ingeniorum. 4.
 Non anima. 5. Nec organorum disposi-
 tio. 6. Nobilitatis fundamentum. 7. Con-
 formatio corporis indicina est internæ in-
 dolis. 8. Socrates corpore deformis. 9.
 Unde prudentia. 10. Unde eruditio. 11.
 Scientia nostra est merè idealis. 12. Unde
 multiscientia? 13. Illustratio per cameram
 obscuram. 14. Differentia docti ab indo-
 cto. 15. Uterinorum diversi mores. 16.
 Timiditas & servilis natura. 17. Puerorum
 epilepsia. 18. Timor caniciei causa. 19.
 Inclinationes etiam sunt hæreditariæ. 20.
 Indocti quomodo fiant docti. 21. Unde
 Græci Sapientes? 22. Ingenia ætatum.
 23. Ex morione fit prudens. 24. Quid e-
 loquentia? Reminiscencia; Memoria? ju-
 dicium? 25. Memoriosi, fastuosi sunt. 26.
 Ingeniorum diversa dispositio in quibus
 consistat?

1. **I**nterest Medico cognitum ha-
 bere & perspectum non tem-
 pera-

peramentum duntaxat sanandorum, sed etiam mores exinde emergentes. Et cognitis exactè moribus, Medicus longè accuratius pervenit in notitiam temperamenti.

2. Temperamentum vel hæreditarium est, vel ascititium seu acquisitum. Hæreditarium est, ab hæreditaria Spirituum ex semine parentum constitutione: ascititium illud est, quod successu temporum succedit, & per educationem, victus rationem, vitæ genus, exercitia, &c. acquiritur. Temperamentum insinuat nobis hominum mores, indolem, ingenium, & vice versa, mores produnt hominis temperamentum, constitutionem, Spirituum dispositiones: mores enim sequuntur temperamentum; Dygbeus inquit: etiam illam naturæ complexionem, quæ ex moribus & exercitatione oritur, natam esse in prole pullulare.

3. Causam efficientem, subiectum ingenii, indolis, &c. esse Spiritus,

ritus, pauci sunt, qui contraveniunt.

4. Volunt quidem nonnulli functionum harum subjectum esse animam, verum cum anima ab anima non differat accidentibus, nec obnoxia sit vicissitudinibus, cum merus sit Spiritus, non video animam anima esse puriorem, activiorem, sapientiorem, prudentiorem, judiciosam magis & ingeniosam.

5. Nonnulli qualitates hasce & effectiones, dispositioni corporis organorum tribuunt, verum tales obliti sunt spiritus esse fabricatores organorum corporis, hoc vel illo modo organorum, & organa sine Spirituum lumine esse cadavera. Purus enim, & à nativitate serenus, luminosus, lucidus, temperatus, agilis Spiritus, purum, temperatum, formosum, beneque dispositum format corpus: opaci, impuri contra, minus luminosi, monstrosi: in subjecto naturâ nobiliori, nobiliores, generosiores, actuosiores,

fiores, puriores & magis ignei sunt Spiritus.

6. Hinc fundamentum nobilitatis hæreditariæ: Fortes creantur fortibus: in ignobiliori: torpidiores ut plurimum, hinc homines serviles natura, ut plurimum vitiosi, ob vitiosam Spirituum constitutionem. Mores sequuntur temperamentum Spirituum. Bonam indolem, optimum ingenium, laudabiles & modestos mores conciliant Spiritus vitales cum animalibus temperie bene convenientes. Germani de Cholericis dicunt, er hat einen hitzigen Kopff / intelligunt Spiritus igneos, fervidos, non animam calidam, quæ Spiritus simplicissimus, nec calida est, nec frigida.

7. Externa corporis & membrorum conformatio, indicina est internæ indolis & morum, quia Spiritus formant & conformant corpus & membra. Hinc magnanimus, animosus, lineamenta, faciem & Spiritus habet Leoninos: astuti,

callidi, Spiritus habent, 'faciem & capillos vulpinos. Meticulosi, Spiritus, & hinc faciem quàm proximè leporinam, ovinam. Crudeles, faciem habent & Spiritus lupinos: fatui bovis & asinī Spiritus, faciem & caput.

8. Physiognomus Socratem pronuntiavit vitiosum, ex vitiosa corporis conformatione; *Talis enim essem*, respondit Philosophus, *nisi Philosophiâ me correxissem.*

9. Nemo quidem prudens, nemo judiciosus, nemo artifex, naturâ nemo sapiens nascitur, cùm omne artificium ex idearum impressione: cum spiritibus tamen nobis connascuntur rudimenta seu principia morum, vitiorum, & virtutum interdum paternorum inclinationes ad bonum & malum, ratione dispositionis hæreditariorum Spirituum: ut enim maturè urit, quod vulturica manere: ita maturè luceſcunt ex inclinationibus puerorum ingenia ad bonum & malum statim in
infantia,

infantia, non aliunde, nisi ex naturali, connata Spirituum indole. Dygbeus, ut supra dictum, inquit, etiam illam naturæ complexionem, quæ ex moribus & exercitatione oritur, natam esse in prole pullulare.

10. Sapiens tamen, doctus, prudens, judiciosus aliquis debet fieri ex improba idearum multarum in Spiritus impressione, & convenienti coaptatione: omnes enim habitus Spiritibus imprimuntur per ideas, ut sigillum ceræ. Harvéus in præfatione de Gener. animalium: *Nulla nobis, inquit, cognitio innata est, ex sententia Aristotelis. Nec enim opinio, nec ars, nec loquela, nec ratio à natura & ortu primo nobis insunt, sed omnia hæc in eorum censu habentur, quæ extrinsecus nobis secundum naturam adveniunt.* Cum autem Spiritus sint tantum subjectum & instrumenta, quibus innumeræ rerum imprimantur idéæ, ad memoriam & eruditionem non sufficit

G 3 tantum

tantum Spirituum puritas , & laudabilis eorum dispositio , sed una variarum idearum impressio ab infantia & ineunte ætate. Omne quicquid sensibus externisprehendimus, illud Spiritibus nostris imprimitur , vel leviter , vel tenaciter : quod leviter impressum est , facile iterum oblitteratur, hinc oblivio , quod tenaciter , illud diutius inhæret : nihil itaque scimus , nisi ideas , quas per sensus externos Spiritibus nostris impressimus :

II. Hinc omnis nostra notitia , mera est idealis , imperfecta , à posteriori , etiam mathematica. Nulla certa hominum est scientia , cum nihil nisi ideas externas rerum videat , cognoscat : internas autem rerum formas ratiocinando , unum ex alio colligendo , hæriolando assequi conatur. Spiritus nostri sunt quasi rasa tabula , cui nihil inscriptum est , iis tamen rerum externarum innumeræ ideæ , ceu sigilla per organa sensuum externorum imprimi

mi

nipossunt : Idea visibilis Spiritui oculorum communicatur , & unâ quasi in instanti universo corporis Spiritui imprimitur , ibique tanquam in penuario reconditur. *Nemo*, inquit Aristoteles, *naturâ sapiens* : nil scimus nisi ideas , quas per sensus externos Spiritibus nostris impressimus :

12. Hinc multiscientiæ est ex idearum multitudine. Rerum ideæ sunt quasi irides aut iridum colores, sicut enim in nubem fœcundam, aut aërem diversi iridum colores naturaliter & artificialiter possunt projici ; ita in unam animam & Spiritus, infinitæ rerum ideæ, & hæ ideæ sunt nostra scientia, sicut ideæ iridum è nubibus evanescent, iterumque apparent , ita impressis rerum ideis obliviscimur, iterumque in memoriam easdem revocamus.

13. Sicut in camera obscura per vitrum, hominum extra ambulantium & rerum externarum ideæ vivis coloribus pinguntur : eodem

etiam modo & per oculos, rerum quatumcunque ideæ Spiritibus imprimuntur. Sicut speculo, aquæ, rerum imagines; ita Spiritibus lucidis & humidis externa objecta per quinque sensus. Non tantum autem Spiritibus, sed unâ etiam animæ rationali. Spiritibus enim amissis, non unâ omnes impressæ amittuntur & obliterantur imagines; hinc evincimur, præter Spiritus, successivè evanescentes animam etiam corpora gubernare humana.

14. Doctus itaque ab indocto non differt nisi idearum multitudine: ex informatione itaque & educatione, quæ fit à parentibus, nutricibus, Præceptoribus, morum informatoribus, aliquis evadit doctus, multiscius, moratus, liberalis, fervilis, prout ideæ diversæ Spiritibus imprimuntur.

15. Hinc hominum, hinc fratrum uterinorum diversa natura, diversi mores. Esau ad venationes & ferarum trucidationes educabatur,

tur, hinc ferocior : Jacob autem ad opera domestica, hinc civilior, humanior.

16. Justo timidiore sunt, qui in pueritia semper timuerunt Orbili ferulam, timorosa enim idea Spiritibus fortiter sunt impressa : hinc tales etiam ut plurimum fiunt serviles, qui serviliter educantur.

A ferula enim Spiritus percussi, trepidant, fugam meditantur, hinc timorosi semper, & fugitivi. Liberales fiunt, qui liberaliter suos, Batavorum more, educant.

17. Hinc etiam pueri epilepsiam (quæ est motus trepidationis seu convulsivus) sunt obnoxii, ob ideas timorosas, terribiles, tenerrimis Spiritibus impressas. Epilepsia timorosa in prolem, interdum in nepotem propagabilis est, & derivabilis, hinc hæreditaria dicta.

18. Timor in infantibus non tantum causa est epilepsiæ, sed in adultis etiam causa canicie. Testantur enim historiæ captivos interdum

unica nocte ex timore mortis & pavore canuisse. Curæ, incærores, ægritudines animi non sunt, nisi continuus futurorum timor, ex quo successiva canicies. Si itaque morbosæ Spirituum ideæ hæreditariò in sobolem transplantantur, quid nictiam alia bonæ mentis & indolis virtuosæ, morum & inclinationis semina & ideæ?

18. E. G. inclinationes ad mathesin, ad artes mechanicas, ad poësin: Poëtæ enim non fiunt, sed nascuntur. Ingenii quidem dotes, ut antea dictum, nonnullæ nobiscum nascuntur, vel cum Spirituum puritate, vel hæreditaria quadam impressione: virtuosissimi enim ut plurimum nascuntur virtuosiss; habitus tamen per diligentem idearum impressionem & inculcationem excoluntur, perficiuntur, nihil enim scimus,

20. Nisi cujus idea per sensus Spiritus est impressa, & hoc modo indocti & stupidi evadunt docti, ut
docent

docent exempla Xenocratis, Demosthenis, & aliorum quotidiana. Nemo sine informatore, vel vivo vel muto sapiens fit. Barbari idcirco sunt bardi, stupidi, & rudes, quia non instructi sunt ideis, quæ hominem faciunt prudentem & sapientem.

21. Græci olim sapientes fuerunt, non ob clima & solum natalè tantum, quod purissimo etiam nunc gaudet aëre, hodièque barbari incolunt, sed ob culturam, institutionem & educationem.

22. Senes sapientiores sunt juvenibus, quia pluribus variarum rerum ideis sunt instructi; magis judiciosi sunt, quia sicciores habent Spiritus, in quibus ideas convenientes convenienter coaptant, quæ in juvenum humiditatibus hinc inde fluctuant & obruuntur. Infantes & pueri ob temperamentum humidum memorosi sunt: In pueritia enim & juventute Spiritibus humidioribus facilius & profundius ideæ

novæ imprimuntur , hinc viros & senes memoria superant:ideas enim, quas in pueritia vidimus , tenacius retinemus , quia profundius impressæ: Senes contra memoria deficiunt, hinc nullum certius est senectutis ingruentis indicium,quàm quando memoria labascit;& Senecæ testimonio, *primum quod atas invadit, est memoria.*

23. Ex morione interdum fit prudens, seu ratione pollens , quatenus morbo calido Spiritus impuri , crassi purificantur , ventilantur , illuminantur , & humidi exsiccantur.

24. Humana sapientia , ut & eloquentia secundum Platonem est Reminiscentia. Reminiscentia autem est collectio, reassumptio, revocatio & revolutio idearum Spiritibus impressarum. Memoria nihil aliud est , quàm promuscondus idearum olim in penu Spirituum reconditarum ; hinc oblivio est ex obliteratione idearum. Perditur
sæpe

sæpe memoria & amittitur per graves morbos, in quibus ideæ olim Spiritibus impressæ, unâ cum Spiritibus & eorum humido & pingui amittuntur. Juvatur memoria per imagines seu ideas; hinc Mnemonica. Memoria, ut dictum, consistit in humido; judicium, prudentia & sapientia in Spirituum siccitate, in qua firmitus coaptantur ideæ convenientes: anima enim sicca prudentissima est: In vino consilium, quia 1. vinum moderatè sumtum exsiccat, Spiritus expandit, exhilarat. 2. quia novos suppeditat, puros & laudabiles.

Error rationis est putatio, & error phantasiæ, ex idearum quidem coaptatione rerum sibi in praxi non correspondentium. Judicium ex rerum ideis sibi in praxi undiquaque convenientibus.

25. Memoriosi elatiori sunt animo, magis fastuosi, quàm viri judiciosi; tales præsumtuosi sunt Grammatici; inflati, ventosi, fastuosi

Oratores , quia Spiritus habent humidiores, quibus inflantur, humida enim Spirituum constitutio hominem facit inflatum, superbia tumidum, præsumptuosum, φιλαυτον.

26. Morum itaque & ingeniorum diversitas est à diversa Spirituum dispositione, quæ acquiritur & consistit, 1. in semine, & est hæreditaria 2. in sanguine, & nutrimento, quo infans in utero sustentatur: 3. lacte, quo infans lactatur: infantes alieno lacte nutriti, ut plurimum degenerant, & ad naturam nutricum naturalisantur; ex lacte & Spiritibus nutricum assument naturas nutricum & mores: Lacte humano cicurantur ferocissima animalia, ob Spiritus temperatos, quos unà cum lacte sugunt; ut contra homines ferino lacte educati ferini fiunt & feroces, ut Romuli testatur exemplum & Remi. Agnus aliàs balans lacte caprino nutritus hircquit. 4. alimentorum ratione & conditione

ditione quibus utitur. 5. in educationis ratione; alii liberaliter, alii serviliter educantur: 6. informatione seu doctrina; didicisse fideliter artes Emollit mores. Quò quis doctior, eo humanior. 7. à diversa constitutione soli naturalis: Galli moribus differunt ab Hispanis, &c. Naturalis itaque indoles est à naturali Spirituum constitutione, serenitate, lumine, claritate, puritate: eruditio, memoria, iudicium ex infinitis ideis iisdem Spiritibus successivè impressis, sibi convenientibus, distinctè coaptatis.

C A P U T XXVI.

DE COELI ET ASTRORUM Influentiis, & Spiritu universi.

1. Mundus est animatus. 2. Cælum agit. 3. Aër cum cælo idem est. 4. Dives est Spiritibus astralibus. 5. Astra agunt. 6. Sensibiles Luminarium influentiæ. 7. Astra influunt. 8. Quia radiant. 9. Prometheus & primi seculi hominibus notæ fuerunt influentiæ. 10. Aër inebriatus est Spiritibus astrorum. 11. Harmonia astrorum & Spirituum.

Spirituum. 12. Astrologi malunt tempus nativitatis, quàm conceptionis. 13. Talismata quando fundenda. 14. Compassio aëris & Spirituum. 15. Unde pluviarum fœcunditas. 16. Influencias sensibus deprehendimus. 17. Mechanicè per Alkahest. 18. Spiritus universi quid? 19. Ex eo sit medicina universalis.

1. **M**undus non tantùm spirituosus est in se, sed Spiritibus corporum naturalium plenus & quasi ebrius, hinc animatus olim dicebatur. Mundus visibilis gubernatur ab invisibili.

2. Cœlum habere suas actiones patet, 1. quia est corpus naturale. 2. quia corpus subtilissimum, spirituosum, idcirco actuosum. 3. quia radiis, effluviis, Spiritibus astrorum est ditissimum. Hos thesauros & opulentissimum hoc feudum sibi soli non reservat, sed dotes hæc suas à gloriosissimo Conditore sibi concessas, collatas, largiter undiquaque quousque sese immensum hocce extendit expansum, radiat, spargit, communicat, distribuit.

3. Aër

3. Aër cum cœlo idem est & continuus, nullus enim murus est, cœlum ab aëre discernens: ita Nuysemet, tr. de Sale: *Quāquam enim terra & cœlum separata videntur ratione situationis, nempe superioritatis; non tamen ab invicem diversa sunt, cum inter ea perpetua sit connexio & cognatio.* Cum itaque cœlum & aër sint unum & idem, easdem habebunt operationes, virtutes, activitates, passionēs: ita Cosmopolita; *Est in aëre occultus vitæ cibis, quem nos rorem de nocte, de die aquam rarefactam nominamus, cujus Spiritus invisibilis congelatus melior est, quàm universa terra.*

4. Pluvia dives est igne & Spiritibus astralibus ebria, cum quibus terra imprægnatur, & omnia vegetabilia vegetantur & crescunt, sola enim aqua astrorum influentiis animata, imprægnata nutriuntur & crescunt.

5. Astra, ornatissima cœli corpora, iisdem, imò longè eminentioribus

tioribus gaudent energiis & virtutibus. Ignes enim sunt immortales, concentrati, compacti, incombustibiles, inexhausti luminum & virtutum vivificantium thesauri & fontes. Corporum horum cœlestium lampades & perpetui ignes sibi soli non prælucent, nec ut inertia sint mundi pondera, aut cadavera, numero duntaxat at & mole sua naturæ molesta, nec pulcritudine sua universum hoc duntaxat exornantia, sed ut ignium instar, calorem activum, radios & Spiritus de se spargant, quibus ad normam reliquorum corporum naturalium agant, ad quos fines sapientissimus rerum Conditor ea condidit, & inspiciosissimum hoc universi theatrum collocavit.

6. Virtutes autem corporum cœlestium & operationes maximè conspicuæ sunt & sensibiles in duobus illis mundi Luminaribus magnis ☉ & ♀. Tolle Solem ex mundo, auferes non modo præstantissimum

munum cœlo ornamentum, sed mundi oculum & lampadem, imò animam extingues, in pristinum planè chaos & tenebras rediges universam rerum naturam, remoto Sole morietur omnis homo, cadaver evadet omnis mundus. Si Sol & homo hominem generat, utique sol & animal animal; Sol & vegetabile, vegetabile generabit. Nulla generatio fieri potest sine Sole, nulla multiplicatio, nulla vita, nullus motus, nulla actio, cùm Sol sit ignis concentratus, vivificus, vivificans, luminis origo, mundi oculus, fons ipsius, denique vitæ, sua enim vivifica & spirituali influenza suscitatur, & excludit Spiritus vegetabilium, fovet animalium, & eosdem conservat.

Non autem video, quæ fronte reliquis astris suas denegare poterimus virtutes & operationes, soli Soli, nolentes volentes, indulgentes influentias: forsan quòd benignissima sit, familiaris nobis, maxime.

ximè activa, sensibilis, oculos nostros & sensus incurrens.

7. Astra ejusdem cum Luminaribus sunt materiæ, ejusdem naturæ igneæ, ejusdem virtutis, operationis & definitæ suæ & determinatæ activitatis ?

8. Astris inest lux, eodem planè modo de se spargunt lumen, radios, calorem, qui concentrati meri sunt ignes comburentes, ut docet optica. Luna radios de se spargit, urentes, percutientes, secundum Psalmistam. Posito Planetas proprium non habere lumen, influunt tamen. Luna proprium non habet lumen, influit tamen manifestè, ejusque influxus diversissimus est ab influxu Solis : influunt more gemmarum, astrorum terrestrium, amuletarum, plantarum radiantium non luce manifesta, radio tamen invisibili, magnetico, specifico. Nec obstat maxima Planetarum & stellarum fixarum à nobis elongatio. Eorum activitatis Sphæra hucusq;

usque sese extendat, necesse est, cum radiatio e.g. Υ is & Φ ris tam sensibiles sint, ut umbram nobis in terra pariant. Ipsi autem radii, sunt corporum substantiæ & influentiæ, emanantes, effluentes ex astris, ut ignis ex Sole, cum radiis Solaribus; ignis ex igne; virtus & efficacia ex gemmis, ex magne-
te, &c.

9. Hic est ille ignis cœlestis, quem Prometheus, Japeti filius, consilio Minervæ è cœlis clam sustulit; sine igne astrali immobiles esse homines & exanimés, cæteraque sublunaria, emblemate nostro innuere voluimus. Ex quo patet Spirituum doctrinam, quam nos ex natura eruimus, primis hominibus notam fuisse, hieroglyphicè traditam, fabulis involutam, temporis successu neglectam, suppressam, nec meritò hætenus excultam.

Astra nil nisi Spiritus de se radiant, spirant, spargunt, luce suâ, lumine & radiis, quos ultro in se recipiunt

recipiunt corpora naturalia spiri-
tuosa, ob similitudinem, identita-
tem & raptum, qui est inter similia.
Quòd autem astrorum influentiæ
ingrediantur constitutionem Spiri-
tuum, ex superioribus patuit, ubi
monstravimus Spiritus vitales sepa-
rari & generari, non ex alimento-
rum duntaxat Spiritibus, sed etiam
ex aëre, ut dilucidè docet Senner-
tus, aliique Institutistæ tit. de Spiri-
tibus: Non autem aër simpliciter
ingreditur constitutionem vitaliū,
utique unà etiam Spiritus astrales aë-
rem perpetua radiatione impræ-
gnantes, vivificantes.

10. Aër semper inebriatus est,
ebriosus & imprægnatus astrorum
Spiritibus, lumine, radiis, influen-
tiis, igne & virtutibus cœlestibus
nunquam vacuus est, & expers,
quas unà cum aëre haurimus, & sine
quibus nec vivere nec subsistere,
nec respirare possemus. Ignis &
aër unum constituunt corpus, aërem
nimirum calidum, non secus ac
aqua

aqua & ignis , unam constituunt aquam calidam, quam haurire possumus; ignis & ferrum , unum ferrum candens; aqua & terra, lutum; aqua & farina massam, &c. ita radii Spiritus astrales & aër, seu Spiritus cum aëre unum constituunt aëris corpus, quod attrahimus, inspiramus, de quo vivimus, ex quo corporis nostri Spiritus generantur & regenerantur.

11. Hinc illa est astrorum & Spirituum nostrorum admirabilis harmonia, sensibilis consensus & sympathia, communis motus circularis, non aliunde, nisi propter indentitatem Spirituum astralium & nostratum, qui secundum Philosophum analogi sunt elemento astrorum, & idcirco mutuum habent ingressum, sympathiam, magnetismum, raptum.

12. Et hæc est vera ratio, quòd Astrologi pro erigendo themate genethliaco seligere malint natiuitatis tempus, quam conceptus, cum
fensi-

sensibiliter, per sensibilem inspirationem & respirationem combibat, attrahat, inspiret primitus tenerrimum recens nati infantuli corpusculum, Spiritus cum aëre astrales, qui imbuunt, animant & disponunt illud pro sua naturâ.

Non incongruè primam illam astralium influentiarum imbuitiōnem, infusionem in recens emergentis infantuli natum corpusculum perspirabile, explicare possum vulgari illo versiculo: *Quo semel est imbuta recens servabit odorem Testa diu.* Quibus Spiritibus in prima inspiratione & respiratione imbutum est, & imprægnatum tenerrimum infantuli corpusculum, si inhærent pertinaciter, constituunt & disponunt corpus, sui que similes alios ejusdem speciei Spiritus astrales successivè pro sui conservatione attrahunt, alliciunt. Ista prima Spirituum astralium infusio assimilatur imbibitioni liquoris cujusdam rubri aut aliàs colorati in spongiam
aut

aut lanam candidam ; liquor enim coloratus licet iterum exprimatur, tincturam tamen ſuam in ſubſtantiam ſpongiæ deponit, relinquit : ita, licet ſpiritus corporis noſtri pedetentim amittamus ſenſibiliter & inſenſibiliter, fixi tamen nonnulli manent, aliosque ſimiles ejusdem conditionis & naturæ alliciunt, propter identitatem, ſimilitudinem, ſympathiam natalium ſeu nativorum. Ita corpusculum infantis primitus radiis & Spiritibus *Æ*libus ebrium, impoſterum *Æ*les ſemper Spiritus, non ſecus ac acus magnete ſemel affricta, ferrum ſemper appetit.

13. Et hoc, meo quidem judicio, fundamentum eſt, & multis occulta, Taliſmatum fabricandorum, ratio, quæ fundi debent ſub certâ quadam conſtellatione, Planeta nimirum in carpento ſeu throno ſuo, ut loquuntur Aſtrologi, hoc eſt, in eſſentialibus ſuis dignitatibus conſtituto. In iterata enim per vio-

H lendum

lentum ignem fusione metallum Spiritus quosdam non adeo fixos amittit, in quorum locum succedunt & substituuntur alii, Planetæ nimirum cujusdam in ximè activi, tunc temporis fortissimi.

14. Porro Spiritus vitales ejusdem esse cum aëre vitali constitutionis, naturæ & materiæ, evincit mutua aëris & Spirituum vitalium sympathya & consensus: Si enim aër impetuosus est, nubilosus, nebulosus & turbulentus, utique per sympathyismum easdem patiuntur corporis nostri Spiritus tempestates, procellas, vicissitudines, anomalias, excentricitates: est enim analogia, convenientia, similitudo, harmonia, compassio, consensus aëris & Spirituum adeo sensibilis, ut siquid incommodi patiatur aër nebulosa; impetuenta, constitutione, unà afficiatur, illudque consentiat corpus nostrum spirituosum, cum Spiritus nostri ejusdem sint cum aëre materiæ & constitutionis. Hinc homines

homines sereno cœlo & aëre , sereniori , & hilariori , contra verò pluviosa & nebulosa constitutione tristiori , minus alacri & erecto esse animo omnes ultro fatemur & experimur. Si ex aëre , ut notum est , haurimus morborum epidemiorum , febrium , & morborum contagiosorum semina , causas & miasmata , imò ipsam pestilentiam ; utique & ex benigna astralium imprægnatione , influentiâ , illustratione , irradiatione , inundatione vivificam & vitalem flammam , sanitatem , vitam. Ita nobilissimus Nuylement p. 199. *Evidendissimum autem est , vitam esse rem cœlestem & divinam , quod igitur eam conservare potest , ejusdem nature esse debet , quia omnes res ex eo sustentantur , inde originem sumunt : dicam verò adhuc amplius , hunc Conservatorem ipsam vitam esse. Ita Cosmopolita. Est in aere occultus vitæ cibus. Hunc occultum vitæ cibum astrorum ignes in aërem hunc nostrum*

vibrant. *Spiritus hic invisibilis melior est*, inquit autor, *quàm univèr-
sa terra.* astralis est, & cœlestis, in
aërem hunc nostrum desuper ef-
fusus.

15. Spiritus hic invisibilis sensi-
bilis est in pluvia fœcunda, fœcun-
dans, excludens sepulta, & in terra
semimortua semina eaque ad vege-
tationem vivificans, Spiritibusque
nostris vitam suppeditans & mo-
tum. Præfatione in ¶ inquit idem
autor: *Naturæ ministri sunt Spiritus
vitales aerem constringentes: difficile
est*, inquit: *credere Spiritus habere
tantam potentiam in ventre venti.*

In demonstrandis his non ero o-
perosior, cum astra in hæc inferio-
ra influere, bardi etiam, blenni &
plauti intelligant, comprehendant,
sentiant, sensibus externis, tactu,
visu.

16. Sentiunt & tangunt calorem
Solis, vident omnia fotu Solis cre-
scere & vegetari; vident & sentiunt
radios Solis influentes merum esse
ignem,

ignem, cutem, ligna & combusti-
bilia comburentem. Vident astra
radiare radiis suis, umbram facere,
stellas moveri motu circulari, vi-
dent per demonstrationes oculares
& autopſiam sanguinem ab interno
principio moveri itidem circulari-
ter; Sciunt naturalia ea, quæ eas-
dem planè habent affectiones ea-
dem eſſe, v. g. homo easdem habet
affectiones, cum homine, ignis cum
igne; ergo iidem ſunt; aqua cum
aqua, aër cum aëre, terra cum ter-
ta, vinum cum vino, ☿ ius ☿ io &
auro, ergo eadem ſunt: corporis
ergo noſtri Spiritus iidem erunt
cum aſtris, cum aſtra & Spiritus
easdem habeant affectiones. v. g.
moveri, circulari, radiare, illumi-
nare, influere, calefacere, vivifi-
care: operationes illæ identicæ ma-
niſeſtè cuivis etiam ſtupido inſina-
ant, Spiritus eſſe ex aſtris.

17. Helmontius ſub tit. forma-
rum ortus. p. 148. §. 89. inquit:
Per Alkaheſt ſciri poteſt, quantum al-

terutrius luminaris partem vegetabile (etiam incognitum, contusum ac situm obductum possideat. Si itaque vegetabilia de luminaribus participant, quis dubitaret de homine, animalium nobilissimo, microcosmo, in quo evidentiora luminarium apparent indicia & macrocosmi characteres.

Quomodo autem diversi astrorum positus diversimode disponant corpora, hujus loci non est explicare. Sufficiat monstrasse Spiritus corporum nostratum esse astrales: Philosophus suo modo vocat elementa astrorum analogos: Lunæ influxum intelligunt rustici; Mercurii in concitandis ventis, Martis in ciendis tonitruum ignibus observant Phisici & astrologi; Solis influxus, omnium manifestissimus est omnibus.

18. Coronidis loco mentionem quoque meritò hîc injicere debemus de Spiritu universi. Dubitant quidem plurimum detur Spiritus
quis-

quispiam universi ? Cùm mundus universus sit corporum mundanorum congeries , quodlibet autem corpus suo proprio dotatum sit Spiritu. Notorium tamen est, vocabulum. Spiritus universi apud modernos usitatissimum esse : Sumitur autem duplici modo ; 1. pro radiis, influentiis & Spiritibus cœli, Solis & astrorum. Astra, cum primis Sol radios suos de se spargunt sensibiles. Isti corporum cœlestium radii inter se commiscentur, confunduntur, iisdemque cœlum, cæteroquin spirituosum, & aër repletur, imprægnatur, ditatur. Hic Spiritus corporum cœlestium confusus, Universi, hoc est , omnium corporum mundanorum dicitur Spiritus.

Secundò, Spiritus universi à nonnullis dicitur Spiritus salis terræ volatilis. Terra suum in se habet sal spirituosum ; illud sal volatile copiosè exhalat & extrahitur è terra mensibus comprimis vernalibus

Martio, Aprili, Majo, ☉ in Vete,
 8to & 11is existente, ad nos rede-
 unte, terram radiis suis calefacien-
 te: illud ipsum sal ex rore majali
 colligitur, ex eoque fit & conficitur
 Medicina universalis Dienheimii:

19. Ex hoc sale Spiritus præpara-
 tur, quo Borellus aurum in liquo-
 rem solvit. Et hoc sal, est sal illud
 vegetabile, sal terræ, sal nitri terræ,
 sal naturæ, sal mundi, de quo Sen-
 divagius Cosmopolita in 12. tracta-
 tibus.

C A P U T XXVII.

DE MAGNETISMO ET SYMPATHEISMO.

1. Quid sympathismus? 2. Differentiæ ma-
 gnetismi. 3. Totus mundus est sympa-
 theticus. 4. Omnis ignis rapitur ad So-
 lem. 5. Terra moverur. 6. Aquæ mo-
 ventur. 7. Mare repetunt. 8. Consensus
 inferiorum & superiorum. 9. Amicitia
 inter nostrum calorem & cœlestem. 10.
 Inter aërem & Spiritus. 11. Homo sereno
 cœlo sereniori est animo. 12. Imbecillia
 membra præfagiunt tempestates. 13.
- Sym-

Sympatheismus verno tempore sensibilis.
14. Febres vernaes epidemiae ex consensu aëris. 15. Aër sensatus est. 16. Causa continuarum febrium. 17. Unde febres hyemales. 18. Sympathia elementorum. 19. Tractus aquarum. 20. Raptus ignium. 21. Propensio aëris ad aërem. 22. Sympathia hominum. 24 Unde somnus? 25. Somnus meridianus cur molestus? 26. Curationes magneticæ sitæ sunt in cōsensu Spirituum. 27. Sympathia viscerum.

1. **M**agnetismus, alias Sympatheismus, antipatheismus quid sit, duobus possumus exprimere verbis, quod sit Consensus Spirituum. Per sensum intelligimus formaliter Consensum, hoc est, eundem sensum, eandem sensationem, sive ille sensus idem, gratus sit & amicabilis, & tunc dicitur sympathia, philautia, amor, desiderium amorosum, tractio, tractus, raptus similium: sive ingratus, qui dissensus dicitur, & antipathia, odium, abominatio, compassio, fuga dissimilium. Et isti sensus interdum exquisiti satis sunt, interdum minus.

H 5 2. Est

2. Est autem consensus & magnetismus, non inferiorum tantum cum superioribus, sed etiam mutus superiorum, ut inferiorum inter se sympathismus & antipathismus.

3. Univerſa Natura magnetica eſt, ea enim raptus ſimilium eſt & fuga diſſimilium. Totus mundus conſtat & poſitus eſt in magnetiſmo; omnes ſublunarium viciffitudines fiunt per magnetiſmum; vita conſervatur magnetiſmo, interitus omnium rerum fiunt per magnetiſmum, quem huius libri epilogoſ loquitur, & concludit.

4. Mutuus conſenſus, raptus & quaſi circulatio eſt ignis Solaris, quem Sol radiat, ſpirat & ſpargit, cum ipſo Sole. Solis calor & ignis ex corpore Solis qui radiat, redit omnis iterum ad Solem, tanquam ad mare igneum, è quo exiit; ex eodem iterum ſpirat ſine intermiſſione ad corpora naturalia, iterum exſpirat, iterumque ad Solem redit, & ita.

Et ita sine fine circulatur : hinc non miror , elapsis tot mille annis de corpore Solis igneo nil haecenus esse consumtum , nec corpus Solare imminutum , nec viribus debilitatum , cum omnis ignis ex Sole qui exspirat , per circulationem , propter identitatem & raptum similitudinis ad Solem , ceu igneum mare , omnis ignis fontem iterum redeat. Eodem modo & illud ipsum ex reliquis astris quod radiat , ob tractum similitudinis iterum allicitur , & redit ad suum astrum , ex quo antea fluxit , iterumque sine intermissione circulatur.

Sicut aqua exhalat ex mari & terra , iterumque ad terram per pluvias redit : ita astrorum ignes , fontes suos iterum ob identitatem appetunt & repetunt.

5. Terra ad astrorum imitationem , ut Copernic. demonstrat , sicut astrum , inter astra collocatum , circulatur , movetur. In cœlo libero , à Sole illustrata lucet , lumen de se

H 6 spargit,

spargit , & radios eodem modo ac Luna , Saturnus & reliqua sydera.

6. Ad motum cœlestium circularem etiam aquæ in terra moventur ; motus ille fit ita , quatenus terra in sinum & viscera sua per cuniculos tanquam venas , meatus & canales aquam maris in se quasi absorbet , iterumque hinc inde per fontes eructat , flumina efficit , quæ mare iterum naturali desiderio appetunt , repetunt :

7. Naturalis hæc est circulatio aquarum ad normam & imitationem astrorum , ob harmoniam superiorum & inferiorum , quæ catena aurea veteribus dicebatur , de qua sapientissimè Hermes in tabula Smaragdina ; *Verum , sine mendacio , certum & verissimum : quod est superius , est sicut id quod est inferius , & quod est inferius , est sicut id , quod est superius.*

8. Consensus superiorum & inferiorum cognoscitur , i. ex motu. Astra moventur ; per magnetismum
moventur

moventur & inferiora , moveantur itaque necesse est corporis nostri Spiritus, propter nimirum similitudinem & identitatem. Corporis nostri Spiritus iidem sunt cum aſtrorum , quia ex Spiritibus & radiis eorum cum aëre à nobis sunt attracti, & ita noſtrates facti sunt & domestici. 2. ex vita : Denegato homini aëre, denegatur ei vita , in loco enim conſecluſo homo moritur, & communiter ſuffocari dicitur. Aër hic noſter maximè vitalis eſt, propter radiorum aſtralium reciprocationem & duplicationem : in editiſſimis montibus radii ſimpliciores ſunt , idcirco minus vitales. Illam ipſam vitam ex aëre quam haurimus alii curioſi demonſtrant hujus ſeculi Philoſophi maniſeſtiſſimè. 3. ex calore. Si enim aſtrorum calor nobis denegaretur , unà etiam vita privaremur ; hinc loca arctica & antarctica , ſub ipſis polis dicuntur inhabitabilia , ob diurnam Solis abſentiam & atrocif-

simum frigus, Spirituum flammulam extinguens.

9. Calor itaque, cœlestis est naturæ, Spiritibus nostris propter similitudinem & identitatem amica-bilis, desiderabilis, gratissimus, propter consensum per raptum & tractum applicabilis, conservat enim, alit, restituit hosce nostros magneticè, ut ferrum magnetem, sympatheticè. Et hic magnetismus est illa aurea Homeri & antiquorum decantata catena, cœlum conjūgens cum terra, superiora cum inferioribus: hinc aurea etiam illa antiquissimorum Philosophorum dictoria. *Natura naturâ letatur: Natura naturam continet: Natura naturam superat: Natura propinquat naturæ: Natura assimilatur naturæ: Natura conjungitur naturæ: Natura submergitur in naturâ: Natura non emendatur, nisi sua natura, &c.*

10. Notabilis & manifesta est compassio, eadem sensatio, inter corporis nostri, & inter aereo-astrales

astrales Spiritus. Athmosphæra enim , si expansa est , se ipso solito major , serena est , & , sicut vernali & æstivo tempore esse solet , purissima : tunc enim propter rectos , in sese reciprocantes & duplicatos radios , & ignis Solaris multiplicationem capacissima est & extensissima , hinc etiam subtilissima , serenissima , Spiritibus astralibus beatissima , di-rissima , lætissima. Ad exemplum , imitationem & compassionem , seu per consensum aëris , qui merus est Spiritus , imò ipsum cælum est aër , corporis nostri Spiritus sentiunt , consentiunt , constituuntur. Expanso enim aëre , expansi sunt , dilatati , longè subtiliores , rariores , puriores Spiritus , hinc vividiores , liberiores , vegetiores , hilariores. Ratio hujus est in identitate , mutuo sensu & consensu Spirituum homogeneorum : Corporis nostri Spiritus iidem sunt cum Spiritibus aëreo-astralibus , quia ejusdem sunt materiæ ; aëreæ & astrales influentiæ seu Spiritus

Spiritus nobis facti sunt domestici, nil ferme aut parum mutati. Prout itaque sese aër habet, constituitur, disponitur, & afficitur, eodem planè modo & unà corporis nostri Spiritus, quia homogenei, quia aër & Spiritus nostri unum constituunt corpus, hinc unius & ejusdem corporis eadem affectio est, & constitutio, eadem accidentia: non secus ac ignis in ferro candente eadem est ac reliqua ignis ferrum ambientis constitutio; eodem modo & eadem aëris cum corpore nostro est constitutio, cum constitutione universi aëris, corpora nostra immediatè ambientis & ingredientis.

II. Hæc ipsissima ratio est, cur sereno, expanso & subtili aëre, homo serenior est animo, hoc est, hilariori, præsentiori, promptiori; Contra autem tempestatibus, ventorum procellis, imbribus, nebulis, nubibus agitato & inquietato aëre, unà etiam afficitur & turbatur corporis nostri Spiritus aëreo-astralis, hinc

Hinc minus prompti animo , minus agiles sumus minusque hilares. Hic inquam, ignotus est ille, & haëtenus occultus magnetismus; qui nihil aliud, nisi ille idem sensus, consensus, eadem affectio, actio, passio, constitutio Spirituum, ejusdem qui sunt naturæ communis.

12. Ob eandem causam & consensum & illi, qui inæquali laborant membrorum robore, imminentes præfagiunt aëris procellas, tempestates, non fecus ac in baroscopio quodam.

13. Aliud in medium producam magnetismi microcosmi cum macrocosmo documentum. Verno tempore universa natura dicitur & videtur esse in fermentatione, terra enim intumescit, ab interno principio incalescit, ita ut glaciem licet satis densam liquefaciat, halitus effumant copiosi, aërem replentes, maris aqua turbatur, aliaque evidentissima universalis fermentationis apparent indicia. Macrocosmus,
cùm

cùm positus sit in fermentatione, microcosmi Spiritus, ejusdem cum Spiritu universi substantiæ & naturæ unà fermentescunt, quæ fermentatio in hominum corporibus per morbos, præcipuè in febribus conspicua est, & maximè evidens; has febres communes, aliosque morbos ex communi & universali verni temporis fermentatione ortos longo ordine & catalogo recenset Hippocratis Aphoristes.

14. Febris epidemia morbus est universalis & communis, ex communi causa, cum aëre omnibus communi, communicata corporibus. Est autem morbus Sympatheticus ex sympathiâ aut communi sensu & constitutione universi ortus. Aër, cum Spiritus sit, sentit, qui prout afficitur, constituitur, & prout valet, eodem etiam modo & Homo, verno cum primis tempore. Vere, terra ob radiorum Solarium fermentationem denuo fermentatur, & quidem non terra
solum

solùm, sed quævis, quæ terræ ortum suum debent, qualis est Homo, fermentationem, per communem sensum & consensum patiuntur. Spiritus ex terra in fermentatione in aërem exhalantes, & ibi frigus & calorem passi, retinent fermentationis indolem, ideam & facultatem: non secus ac feces cerevisiæ recentis mores, ideam, & vires aliam fermentandi cerevisiam. Hosce Spiritus terrestres, inquietos, alienos, peregrinos, effrenes, fermentantes, frigus & calorem cum aëre, commune passos, imbibit, & haurit homo, quibus haustis ad fermentationem, ad frigus & calorem concitantur humani Spiritus, non secus ac per venenum taratantulæ mobilis, Spiritus hominis ad saltandum impellitur. Hinc in ejusmodi febribus epidemiis plures decumbunt, & quidem ii tantùm, qui febriles, hoc est, facilè afficibiles, fermentabiles, ad fermentandum pronos habent Spiritus.

15. Febres ejusmodi frigus habent & calorem, ex communi, ut dictum est, consensu aëris sensati & Spirituum terrestrium: Spiritus enim terrestres absente Sole cum sensati sint, frigus, non secus ac aër, omniaque naturalia sentiunt, hinc sese ad modum omnium sentientium trepidatione contrahunt: eodem modo & corpora ingressi, assueti sunt ejusmodi contractionem, sensum horroris, eundemque in corpore humano contractionis motum instituire, repetere, exexcere. Redeunte autem calore Solis, & ipsi Spiritus in aëre, & ipse aër iterum incallescunt, extenduntur: hinc in corpore assueti huic incallescenciæ, alternatim incallescunt, omnia ob eam causam, quia prout dispositi sunt Spiritus terrestres in terra & aëre, eandem retinent, ingressi corpora dispositionem & naturam, e.g. sese contrahendi, trepidandi, expandendi, incallescendi, deferendi.

16. Con-

16. Continuae itaque febres in vere oriuntur, aëre verno existente maxima ex parte noctu diuque absque notabili vicissitudine & alternatione calido: hinc aër & Spiritus in aëre terrestres nocte tepida non affuefiunt notabili contractioni, trepidationi & vibrationi; sed semper calent: Sole autem in meridiè æstuate, incalescunt iterum aër & Spiritus: hinc ille continuis calor febrium continuarum cum exacerbatione. Hyeme febres non æque frequentes sunt ac verno tempore, hyeme enim terra gelu est incrustata, hinc minus exspirabilis est, & spirituosa.

17. Febres tamen interdum, sicut anno 1667, in Februario grassari occipiunt, ob austrinam aëris constitutionem: auster enim Spiritus fermentescens nobis aliunde etiam ex locis calidioribus Meridionalibus potest apportare hyeme, Spiritus nostros fermentantes.

Ex quibus patet, universam naturam,

turam, majorem æque ac minorem, mundum febricitare, hyemis sustinere & æstatis vicissitudines, & obnoxiam esse injuriis. Ut frigus tollitur accessu Solis, ignium calore & fotu: ita febris algida amolitur, si in principio tempestivè ac præmaturè corpus calefiat, & humectetur per sudores. His enim tollitur non frigus tantum, sed exspirat etiam præternaturalis calor febrilis, & miasmata, pluviaque quasi quadam tepida & rore perfunduntur Spiritus, & corpus nostrum.

18. Mutuus inferiorum inter se similium consensus & sympathismus satis evidens est, lippis etiam & tonsoribus, imò aniculis notorius. Consensus est, raptus, tractus inter elementa congenera. Terra tendit ad terram, non gravitate, sed ob identitatem, naturali instinctu, tractu, raptu. Aliàs enim terra æquali celeritate ad terram moveretur, mutuo potius appetitu trahitur. Novimus enim terram in æquali

æquali motu ferri aut rapi ad terram, quo enim terra propior fit & redditur terræ, eo major est appetitus, raptus, libido & φιλαυτία.

Terra tendit ad terram, non gravitate, alias major globus citius terram repeteret, quàm minor; novimus tamen, minorem & majorem globum pari & eodem passu petere, eodem desiderio appetere terram. Terra exsiccata & igne calcinata, ut & alkalia aquam sponte ex aëre ideo attrahunt, quòd globus terræ, non sicca sit tantum terra, sed terra constet & aqua, jussu DEI Creatoris. Terra ex Nilo defumta, exsiccata, & diligenter asservata toto anno nihil in pondere mutatur ad diem 27. Julii, tunc seipsa fit gravior, quo tempore inundatio Nili fit. Tractus, con-raptus, ut ita loquar, est inter aquam & aquam, ob identitatem, gutta tangens guttam attrahit eam, combibit, in se absorbet, sibi unit, cum ea coit, & fit una gutta, quia eadem est aqua & homogenea.

19. Tractus est & naturalis motus omnium aquarum & fluminum ad mare. Flumina mare quasi appetunt, naturali ruunt raptu & appetitu ad mare; debet enim esse sine fine perpetua aquarum collectio, reconjunctio, circulatio, quam gloriosus naturarum Creator imperavit aquis, eaque immutabiliter permanere debet, quousque visibilis iste stabit & durabit mundus.

20. Naturalis est raptus ignis ad ignem: minor ignis currit ad majorem ignem: omnis ignis recta ad ignium fontes astra, cum primis Solem per flammam pyramidalem, neglecta naturali sua forma rotunda, rapitur ad raptum similiū. Omnes Spiritus, cum ignes sint, exhalant, sursumque tendunt, nullusque nobiscum perennat; e. g. corporis nostri Spiritus; Spiritus Chymici & olea exspirant in aërem, ad cælum, Solem, quia aëreæ sunt naturæ, cœlestes sunt & ignei.

21. Naturalis est perpensio & motus

motus aëris ad aërem, aër lignis inclusus, navem onerariam non permittit submergi: incarceratus in terra, ibidemque dilatatus, cum impetu & violentia quærit sibi que parat exitum & tandem evadit, ut in terræ motibus apparet, reuniri enim desiderat cum universo aëre sibi simili.

22. Quæ reunitio similium per elementorum ex chao separationem in prima creatione, & re conjunctionem jussu supremi Numinis naturalibus omnibus est injecta, & per mandatum imposita, & ille ipse confluxus similium seu desiderium communiter Magnetismus dicitur, & Sympatheismus. Sicut igitur verbum benedictionis, *Crescite & multiplicamini*, hucusque efficax est, & erit ad mundi usque consummationem: ita & verbum separationis. In actu separationis, mandato Creatoris in momento confluxit omne siccum in unum globum, quem Terram nos jam dicimus:

mus : omnis ignis congregatus in unam massam seu corpus igneum , quod Solem jam vocamus. Omnis substantia frigida seu frigus in unum globum , quem Lunam vocamus. Omnis aqua coaleuit & congregata est in unum alveum seu Mare. Omne reliquum subtile in cœlum. Omne itaque creatum ab assignato suo loco remotum , suum iterum repetit debitum & cômpetentem locum. Et ille ipse amor & Philautia similitum , de quâ hactenus diximus, patet etiam ex diversis liquoribus , uni vitro commissis , qui licet agitatione confusi videantur , non tamen commiscentur , sed quivis ad suum iterum movetur simile , suumque pristinum & competentem occupat locum.

23. Naturalis est amicitia , inter eos , qui ejusdem sunt complexionis , v. g. inter sanguineos , juvenes & virgines , viros & viros , senes & senes. Naturalis fuit consensus inter natum insititium & inter bajulum ,

julum, ex quo reſectus erat: veram hanc eſſe hiftoriam recenſet Helmontius p. 752. §. 22. Campanella, Magnenus, Servius, aliiſque. Sympathiam inter ſanguinem hominis & Spiritum ejusdem ſanguinis innuit Rettray hiſce verbis. *Spiritus ſanguinis in vitro ſervatus, monſtrat ſanitatē aut morboſe ejus, à quo detractus eſt, licet longè abſentis, nam morboſo eo exiſtente turbatur diverſiſſimè, & charitatē amittit & contra* Idem autor eandem ſæpe notavit morbidi cum ſua urina in vaſe clauſo per aliquot dies ſervata ſympathiam. Urina humana deſtillationi ſubmiſſa, conſenſum, quem Spiritus ejus cum corporis, ex quo deſunta eſt, Spiritu habet, oſtendit ſenſibiliter: deſtillationis enim tempore corpus alteratur, inque morbum proclive eſt. Dygbæus ſequentem recenſet obſervationem: *Notum eſt in Anglia, ubi magni canes ſeu moloſſi aluntur, ſtatim enim ac quidam ab ejusmodi cane valde morſus*

fuert, operam dari, ut occidatur canis, quamvis non sit rabiosus, quominus demorsus futuro anno redeunte in cane rabie eodem morbo iterum corripiatur. Mirabile est, & Spirituum consensui unicè adscribendum, quod cutis capitis pilosa viro cuidam detruncata, exsiccata & asseruata, vergente ætate illius viri à vulnere perfectè curati, cū sano capite canescente & calvescente cistæ inclusapilos canos & tandem calvitiem ostenderit.

24. Magnetismus est, meo quidem iudicio, quod vesperi tenebris ingruentibus (aëre tenebrefacto, ut ita loquar, tenebrefiant quodammodo, tenebris quasi obducantur, corporis nostri Spiritus) dormituriat, dormiat homo, somnus enim est hominis & Spirituum Nox, ex obumbratione Spirituum nostrorum, per Spiritus obscuros, qui luminosis obducuntur nostris & commiscentur ex cibis recenter assumtis. Chylus enim sanguini & Spiritibus conjunctus, & unà circulator,

latus, opacus est, obnubilat, obfuscatur Spiritus lucidos, hinc Spiritibus Nox, tenebræ obveniunt, secunda enim & tertia concoctio ut plurimum perficiuntur nocte in somno, in quibus successivè purificantur, perficiuntur.

25. De die somnus meridianus, & ille qui cœnam mox sequitur molestiam affert & lassitudinem, laborem Spiritibus, quia Chylus vel Spiritus crudi in somno rapiuntur justo citius ad cor, hinc Spirituum inquinatio, non perfecta purificatio. In somno autem nocturno debito tempore cepto per aliquot horas continuato, per gradus magis magisque chylus & Spiritus rectificantur, hinc solitus corporis vigor manè peracto somno redit, peractis coctionibus, refectionibus, purificatis Spiritibus.

26. Obviæ sunt & receptissimæ curationes, magneticæ communiter dictæ, tonsoribus notæ & usitatæ. Curiosè enim & humaniter tracta-

to , deligato , inque locum temperatum deposito cruore extravenato, Spiritus circa vulnera per consensum, eandem benignam percipiunt curationem & tractationem, perinde ac si ipsa vulnera debito modo specificis suis medicamentis & remediis essent deligata , chirurgi opera & industria curata: contra vero si cruor aut etiam sanies ex vulnere manans crudeliter tractatur, aëri injurioso , igni aut foco lucido exponatur, eandem injuriam & injuriosam tractationem unà etiam sentiunt & compatiuntur vulnera, cum gravissimis doloribus aliisque symptomatibus , quæ aliter sedari non possunt , nisi supra dicto modo iterum deligentur lintea cruenta aut saniosa , inque locum temperatum reponantur.

Præterea Sympatheismus est, inter nutricem qui intercedit & infantem; inter mammas & lac, inter gemmas, amuleta & corporis nostri Spiritus, inter ☿um & aurum.

27. Partium etiam & viscerum
humani

humani corporis mutuus est & communis consensus, harmonia, magnetismus, Sympatheismus, ob Spirituum identitatem, dolente una parte condolent aliæ partes vicinæ, cum primis cor, Spirituum analysta præcipuus & rectificator, imò universum corpus. Incalescentibus unius partis spiritibus, statim cū universo Spirituum complexo communicatur intemperies, indignabundo unius partis Spiritu, indignabitur universi corporis Spiritus. Quicumque igitur sanitatem & morbos in Spiritibus unicè consistere negabit, illum convincent magnetissimi & sympatheismi, quibus cognitis, omnium morborum subjectum Spiritus esse, eosdemque sanitatis conservatores, morborumque curatores ultro fatebitur. Sympathiæ itaque qui novit causas, norit etiam antipathiæ, quæ oritur ex dissimilitudine Spirituum, de quibus uberius forsan sequenti titulo de occultis qualitatibus. Concludo itaque sympatheismum & antipatheismum

fundatum esse actu primæ creationis in mandato separationis vel divisionis & congregationis elementorum ignis, aëris, aquæ, terræ. Quæ elementa bruta hucusque habita, promptius paruerunt hætenus verbo, & religiosius observarunt Separationis, gloriosissimi Conditoris mandatum, quàm universum genus humanum promulgata lege, & Evangelio, voluntati Legislatoris & Messia.

C A P U T XXVIII.

DE QUALITATIBUS OCCULTIS ceteroquin manifestis.

1. Occultæ qualitates in quibus consistant.
2. Dantur in tribus Regnis.
3. In animalibus.
4. Venena quomodo noceant.
5. Quomodo miasmata.
6. Pestilentia quomodo fiat.
7. Ex spiritibus vindicatoribus.
8. Probat ex Sacris.
9. E cruentatione cadaveris.
10. Per remedia specifica.
11. Ex aliorum Spirituum impressa indole.
12. Pestem ex vermiculatione.
13. Confirmat Hippocratis consilium.
14. Vermiculi amant calorem & ignem.
15. Ex quibus generantur.
16. Alia pestis causa.
17. Cur meti-

meticulosi crebrius peste corripiantur
quàm animosi ? 18. Inter magnetem &
ferrum identitas est. 19. In quibus discre-
pant. 20. In quibus conveniunt. 21. Tra-
ctio quomodo fiat. 22. Magnetem ra-
diare demonstratur. 23. Aurum attrahit.

¶ *¶*ium ob similitudinem. 24. Quid lues
venerea ? 25. Elementa possunt compri-
mi & concentrari. 26. Hydrophobia qua-
lis morbus. 27. Unde aquarum metus.
28. Cura. 29. Specifica medicamenta
quomodo agant ? 30. Qualitatum occult-
tarum ratio ex duplici fonte deducitur.
31. Occultarum qualitatum fons & origo.
32. Quo nomine sint manifestæ.

PRæmissa de Magnetismo & Sym-
patheismo doctrina hætenus in-
tricatissima, occultæ jam manife-
standæ sunt qualitates, & quid ? in
quibus ? unde sint ? explicandum.

1. In præcedenti titulo sym-
patheismum & antipatheismum in
identitate seu similitudine & dissi-
militudine Spirituum consistere do-
cuimus: in identitate & dissimilitu-
dine spirituum, & manifestis qualitati-
bus occultas communiter dictas cõ-
sistere in præsentiarum monstrabimus.

2. Occultæ dicuntur qualitates

latitare in triplici Regno, animali, vegetabili, & minerali. Occultæ dicuntur esse qualitates mutuæ in animali regno, v.g. homo hominem amat, odit, juxta illud. Martialis.

Non amo te Volusi, non possum dicere, quare?

Hoc tantum possum dicere, non amo Te.

Animal persequitur animal, non occulta qualitate, nec odio, sed ut devoret, seque perennet: ita mutuæ dantur occultæ ita dictæ qualitates, odia, amicitia mutuæ vegetabilium inter se, e.g. vitis amat ulmum, odit hederam, brassicam. Inter mineralia Φ us & aurum, occultam dicuntur fovere amicitiam. Dantur etiam qualitates occultæ seu inimicitia & odia mutua inter animalia & vegetabilia, inter animalia & metalla.

3. Homo quando hominem amat, odit, dicitur esse qualitas occulta, cum tamen satis manifesta sit naturarum convenientia, identitas, raptus,

raptus, & hinc amicitia & odium, à Spirituum convenientia, disconvenientia, eadem & simili dispositione, similitudine & dissimilitudine. Ex eodem fundamento & eadem qualitate, quâ terra terrâ, ignis ignem, aqua aquam, aër aërem appetit, attrahit, in se combibit: eo nomine & homo hominem ob Spirituum convenientiam, identitatem, eandem & similem constitutionem, amat; si enim homo similes habet Spiritus homini, ratione substantiæ, qualitatum & dispositionis: ii homines ob Spirituum convenientiam conveniunt, & inter eos mutuus est amor, amicitia, sympathia & convenientia; contra si disconvenient, ratione dispositionis, odium est & antipathia: Puer naturaliter amat puerum, puella puellam, vir libenter conversatur cum viro ejusdem qui est temperamenti & constitutionis. Sanguineus cum sanguineo, cholericus cum cholericco, phlegmaticus cum phlegmatico,

co, melancholicus cum melancholico: ut ignis ignem amat, naturali raptu fertur ad ignem: ita sanguineus naturali motu fertur ad sanguineum, hoc est, sanguineus amat sanguineum. Ut aqua aquam comibit, ita Phlegmaticus phlegmatico libenter conjungitur, &c.

4. Venena Spiritibus nostris inimica sunt qualitatibus manifestis, r. quia meri sunt ignes, & ignem habent in corpore suo concentratum, causticum. Sui juris factus, aliudque ingrediens corpus sese diffundit, multiplicat, humidum pingue consumit, destruit, debilemque vitæ flammulam suffocat, fugat, extinguit.

Nonnulla venena quæ dicuntur, salia sunt corrosiva, aculeis suis non corpus solummodò Spirituum habitaculum, sed ipsos etiam Spiritus exquisitè sentientes pungentia, fugantia. Salia illa, cum terræ sint producta & filii, idcirco parentis formam retinent aculeatam, hirsutam.

5. Mi-

5. Miasma est Spiritus quispiam terrestris, sylvestris, qui vernali vel autumnali tempore in fermentatione universalis sui juris factus, in aëre fluctuat, volitat, & hinc inde oberat, è quo ab homine attrahitur & hauritur. Ille Spiritus effrenis post fermentationem pridem sui juris per rebellionem suam factus, pristinam suam fermentandi, rebellandi obtinet & sylvestrem naturam, novas in corpore, novo habitaculo turbas mover, Spiritibus nostris bellum indicit, & hinc tam acris in febribus epidemiis Spirituum collisio, pugna, in toto corpore inquietas, turbulenta constitutio. Ille Spiritus sensatus, peregrinus, alienus, effrenis more omnium Spirituum & ignium facultatem habet sese extendendi, multiplicandi, & quando pars ejusdem ex œconomia corporis alicujus ægroti ejicitur, ingreditur aliud corpus, & tunc dicitur Spiritus contagiosus, in quo corpore antiquum obtinet, denuò cor-

poris humani Spiritus corrodendi, ad orgasmum concitandi, fugandi, persequendi, consumendi, extinguendi, suffocandi, qui commodissimè per sudores ejicitur, & è Spirituum œconomia exturbatur. Et hinc innotescunt genuinæ omnium contagioforum morborum causæ, etiam ipsius Pestilentia.

6. Pestilentia communiter oriri dicitur ex aëre corrupto, cùm tamen aër, ut suo titulo monstratum, corrumpi non possit. In aëre tamen dicuntur esse corruptiones, aut aëri communicari, quatenus exhalationes è terræ cavernis, ex aquis stagnantibus, item effluvia, & Spiritus peregrini, ex putredinibus & corruptionibus cadaverum post clades occisorum inhumatorum cum aëre commiscantur; qualis fuit pestis illa atrocissima Attica, post bellum Peloponense, quæ volucres etiam in aëre volitantes trucidavit.

7. Spiritus hi ex occisis occisoribus exspirantes, occisores sunt, mor-

mortisque suæ vindicatores , quia ex occisoribus & homicidis in iracundiæ furore occisis , exhalant , emanant ; retinent itaque rancorem , iracundiæ furorem , indolem & animum se vindicandi & occidendi , militum militantium truculentiam , quam exerunt in quævis corpora , involando ea , fugant metuculosos & fugitivos Spiritus , eosdemque more suorum antorum , militum ex quibus exhalant , trucidant , atroci odio , truculentia , crudelitate , vindicta.

8. Talem vindicandi animum seu indolem retinere post intercessionem Spiritus in duello & conflictu duntaxat innocenter occisorum , loquitur , 1. ipse JEHOVAH Genes. 4. *Vox sanguinis fratris tui clamat ad me de terra.* Hic à DEO attribuitur sanguini Abelis seu Spiritibus ejus in sanguine , (sanguis enim sine Spiritibus merum cadaver est) 1. vox clamans , vociferans. 2. vox cum clamore à DEO desiderans

rans, efflagitans, extorquens vindictam. 3. sanguis spirituosus vindictam sumens à terra alioquin innocente, quòd sanguinem solummodo hauserit, sterilem eam reddendo & devastando. 4. Profugus factus dicitur Cain, vagabundus, meticulosus, tremulus, propter persecutionem & præsentiam Spirituum interfecti Abelis: Hinc propter continuam persecutionem, exagitationem, torturam, angores, quibus à Spiritibus cruciantur, torquentur, sponte judicio sese sæpè sistunt ejusmodi homicidæ, & accusant.

9. II. Occisi hominis Spiritus retinere animum vindicandi, patet ex cruentatione cadaveris, quæ accidit in præsentia homicidæ : Spiritus enim in sanguine cadaveris superstites Sentiant præsentiam Spirituum homicidæ, cum quibus pridem instituebatur complicatio & hostilis collisio in duello, idcirco vindictam meditantur, desiderant, parant, & iracundiæ motu insurgunt contra hostem,

hostem, qui motus sanguinem calefacit & fluidum reddit, non secus ac si in vivo corpore post iracundiam ex Spirituum excandescencia, effervescentia, hæ morrhagia sequitur. Talem Spirituum iaterimenti, vindicandi proclivitatem & indolem pestilentia causa esse docent.

10. III. Remedia specifica, Pestis antidota, quæ fugant, ejiciunt, protrudunt, talia miasmata, hoc est Spiritus ejusmodi occisores, vim & violentiam nobis inferentes: & desumuntur ex animalibus generosis; unicornu, cervis in orgasmo constitutis, ferocientibus, quæ armis suis & partibus suis armatis generositatem, hostibus & hostilibus sese opponendi, resistendi, impresse-
runt, non secus ac animosus gallus lapidi alectorio generositatem, quam gestatori suo etiam inspirat lapis, amuletum.

11. IV. Spiritus ex animalium corporibus evacuati aliisque infusi, suam cum iis communicant nativam

vam indolem ; v. g. homo nutritus lacte ferino ferinus fit : sanguis felis , homini aut cani infusus , canem facit feli æmulum : Spiritus canis rabidi , homini inspiratus , hominem reddit latrantem , mordentem , rabiosum , hydrophobum : tarantulæ saltatricis spiritus , hominis spiritus reddit saltantes , torpedinis torpidos : eodem etiam modo & Spiritus hominis , cum primis militum truculentorum , in iracundiæ furore interemtorum , furorem post internecionem è corpore profugi , retinent , & in quoscunque obvios , nocentes pariter & innocentes cæco impetu furibundi ruunt. Hinc illa universalis in peste strages & calamitas , præsertim post aciem quæ suboritur , quando inhumata deferuntur in libero aëre cadavera putrefacienda : ita enim Spiritibus , mortis vindicatoribus , libera permittitur evagatio & invasio : humanis autem cadaveribus coercentur , submerguuntur , ab eo com-
bibun-

bibuntur , vindictæque obliuiscuntur.

12. Suboritur non tantum pestis post acerrimas & calamitosas strages , clades , sed etiam ex aliis effluviis putridis aëri quæ communicantur , ex terra , insectorum matre. Ea effluvia ulterius putrescunt in aëre foecundante , vivifico , in ejus tranquillitate , tepiditate , fomentantur , pullificantur , & hæc ist illa in peste vermiculatio , quam primitus Physicis monstravit acutissimus Kircherus.

13. Aëris compressionem , impuritatem , abominales in eo putredines , & ex inde ortas vermiculationes , pestilentiae causam esse , evincunt divini Hippocratis consilia , curationes , & per incendia sylvarum , aëris purgationes : Ignis aërem compressum extendit , dilatat , eundem purificat , impuritates consumit , vermes comburit.

14. Vermiculi enim , ut & omnia viventia propter Spiritus , qui ignei sunt,

sunt, naturali instinctu ignem amant & lucem; tenebras autem & frigus, Spiritus necantes, fugiunt. Ista vermiculatio, in ejusmodi summi gradus (ut loquuntur Medici) putredine, multiplicabilis est in infinitum, non in aëre tantum tepido, sed etiam in calidis hypocaustis, nec cessat, donec calore fomentante cedente vel purificatur aër, vel succedat frigus, prohibens & enecans ulteriores vermium generationes.

15. Illud ipsum autem ex quo vermes generantur, ut plurimum aëri communicatur. 1. ex cadaveribus occisorum insepultis, quæ alioquin in libero cum primis aëre facile in vermes transeunt, & commutantur. 2. ex terra & terræ cavernis; terra enim ferax est vermiū, ut vidi sæpè, quando hyeme, calido repositam fervari hypocausto terram, apprehendi paulo post vermiculis eam scatuisse, & planè obductam fuisse; terra enim animalculorum ferax est, in se enim divinam habet benedictionem

ctionem & semina, non vegetabilia duntaxat, sed reptilia etiam, & volucra quoque producendi. Ejusmodi animalia facile alas sibi formant, comparantque, & volitantes in aëre oberrant. Hinc Medici ab ægrotis infectis redeuntes, igni sese & vestimenta exponunt & sistunt, permittuntque ut vermiculi ignem, quem amant, instar illius satyri deosculentur, & unà cum barba alas comburant, ut plurimum universum corpus. Ista vermiculatio fomentatur in aëre non tantum, sed etiam in ipso sanguine, lacte, caseo, aceto etiam acerrimo instituitur.

16. Causa tamen Pestis non sunt vermiculi duntaxat, sed etiam Spiritus terrestres, sylvestres, minerales, salini, corrodentes, caustici, qui quando corpora intrant humana, eandem habent facultatem corrodendi, cardialgium, vomitiones, viscerum ardores, &c. Causandi, non secus ac arsenicum, auripigmen-

mentum, aliaque mineralia alioquin venenata, nitro assumpta: hinc etiam arsenicalia dicuntur, *Ærialia*, cinnabarina, &c. Ea tamen pestis omnium atrocissima est, quæ, ut jam dictum, ex putredine in conflictu occisorum insepultorum oritur, qualis fuit Attica illa, de qua Thucidites, ex bello Peloponensi. Miasmeta illa, ut dictum, sunt Spiritus ex cadaveribus militum in ipso iracundiæ furore occisorum egressi, in aëre fluctuantes, ab aliis attracti, furorem & vindictam retinentes, exercere desiderantes, ideoque Spiritus occisores à nobis dicti: Isti animum, indolem, vindictam, & occidendi furorem exerunt in corpora recepta:

17. Et ea ipsa forsitan causa est, quòd meticulosi ex terrore & metu crebrius corripiantur peste, quàm animosi. Spiritus enim truculenti, ferocientes, vindicatores, persequuntur, interimunt, necant sine resistantia fugientes, meticulosos, sed

sed non ita facilè animosos, animosè resistentes : idcirco nonnulli, timorosos reddunt animosos, potu vinigenerosioris, quod Spiritibus multiplicat, & audaciores reddit & valentiores.

Ad alias nunc transibimus qualitates alioquin occultas, & quidem ad qualitatem Magnetis magneti-
cam, tractoriam. Magnetem fer-
rum, & ferrum magnetem mutuò trahere notorium est. Facultatem hanc occultam esse omnes unanimiter asserunt : ego autem qui manifestissimam magnetis & ferri, seu cum ferro, identitatem video, inde mutuum tractum oriri pronuncio.

18. Minera ferri & magnetis admodum parum inter se differunt; conveniunt potius ratione principiorum & Spirituum. Ferrum metallum est, & quidem propter
✕ rium sub malleo ductile; magnes, itidem metallum, ob ✕ r tamē ✕ um copia superans, malleo resistens. Differunt itaque ista duo, propter
inæ-

inæqualem principiorum mistionem, ductibilitate duntaxat, non secus ac plumbum differt ab antimonio, non alia ratione, quam, quòd plumbum plus habeat ϕ ii, minus ϕ ris; Γ ium plus ϕ ris, quam ϕ ii, hinc ob ϕ ii ϕ r præponderantis abundantiam, ductile, Γ ium ob ϕ r ϕ ium præponderans minus ductile, malleoque magis resistibile, omnis enim ductibilitas est à ϕ rio.

19. Ferrum itaque & magnes utrobique idem ϕ r habent, & eundem ϕ rium, principia inter se non nisi inæquali pondere discrepantia.

20. Cum primis autem magnes & ferrum conveniunt ratione identitatis Spirituum. Ferrum Spiritus de se spargit minerales seu metallicos, ejusdem generis & quidem actuosiores; copiosiores Magnes de se radiat Spiritus.

21. Spiritus hi, cum iidem sint, confluunt, non secus ac ignis ad ignem, aër ad aërem, aqua, ad aquam,

aquam, terra confluit ad terram; ut ignis figuram suam rotundam deferens, figura peregrina pyramidali, eique minus congrua rapitur ad igneum solem, à quo combibitur: eodem modo & Spiritus minerales ferri & magnetis iidem confluunt, concurrunt, combinantur, & sua post se trahunt corpora Spiritibus ejusmodi imprægnata.

21. Magnetem autem radicare & spirare de se Spiritus, monstrant
1. mechanicè moderni Philosophi.
2. mineralium fossores observant metallorum exhalationes igneas, spirituosas, quas Germani *Witterung* vocant. 3. iidem explorant diversas metallorum mineras latitantes, per virgas ♀ les diversorum lignorum, mutuam sympathiam ob Spirituum similitudines, cum mineralibus habentium: ita enim coryli virga eodem modo concinnata, quo acus magnetica venas argenteas monstrat; Virga fraxini consensum habet cum ♂te: abies

cum Ho, alnus cum Scaturiginibus.
4. patet ex ignitione magnetis, per
quam suos in igne amittit Spiritus
fugitivos antea tractivos; imò Soli
expositus, calore Solis vis tractrix,
ob Spirituum jacturam, debilita-
tur. 5. Magnetem habere Spiritus
Æreos, fœtentes, patet ex fœtore,
qui odoratu percipitur in ejusdem
ignitione. 6. Spiritus hos attracti-
vos, minerales, aliis posse copulari
mineralibus, patet ex Goclenii ob-
servatione, quam in synarthrasi
allegat; mechanica ex allegato peti
potest autore. Cum itaque universa
Natura nil aliud sit, quam simi-
lium raptus, coitio, mutuum desi-
derium, idcirco facultas magnetis
tractrix consistet etiam in identi-
tate Spirituum Æreorum ferri &
magnetis: & magnetis quidem Spi-
ritus activiores sunt, ob volatilitatē
suam, copiosiores sunt & minus li-
gati, nec sub jugo & metallica liga-
tura in carcerati, ferri autem fixio-
res

res sunt, magnetici liberiores, volatiliores, magis spirabiles & fugativi, & hinc mutuus ille tractus, raptus, desiderium, coitio; quam tota die oculis nostris in Natura inter similia, & ea, qua eadem sunt, videmus, nullaque alia est, quàm ea, quam in præcedenti titulo monstravimus, quæ est, e. g. inter aquam & aquam, terram & terram, aërem & aërem, ignem & ignem.

23. Talis tractio similium est in auro & ☿rio. ☿rum enim quando tractam⁹ in igne, v. g. in deauratione vasorum argenteorum, & aurum vel auream monetam retinemus in ore, meneta aurea albescit, & ☿rio obducitur: ☿rus enim magis spiritualisatus in igne, ob identitatem advolat ad aurum in ore artificis aut adstantis reconditum, quod ob similitudinem amicabiliter amplectitur, eique tenaciter adhæret.

24. Pergamus jam ulterius ad alias occultas, ita dictas qualitates. Inter occultarum qualitatum mor-

hos à Medicis recensetur primo quasi loco Lues Venerca, quæ morbus non magis occultus est, quam puerorum scabies. Scabiei enim species est, ex spirituosissimo & igneo, è corporibus infectis exhalante & exspirante sale, in superficie corporis in efflorescentias cum suo vehiculo excrecente, orta. Qui sal spirituosus facultatem habet sese in infinitum extendendi, multiplicandi. Omnis enim Spiritus ex bonitate Metaphysica & ex benedictione divina super res mundanas, facultatem habet sese extendendi, & in infinitam multiplicandi: unus tamen fertilior est, activior & spirituosior altero, ut patet ex venenorum catalogo, inter quæ unum magis igneum est, quam alterum, unumque altius immersum est & implicatum materiæ, quam alterum. Lues illa iisdem etiam quibus scabies tollitur & curatur remediis, consoribus etiam notis.

25. Sicut omnia quatuor elementa

menta comprimì possunt, concentrari, ligari, iterumque dilatari, extendi, expandi, manumitti & vice versa; ita & omnis multò magis Spiritus. Hinc non miror, quòd in grano Nubiæ, tanta sit calefaciendi, camburendi vis concentrata, & consumendi corporis nostri Spiritus tenuissimos, vitæ nostræ flammulam rarissimam, tenuissimam, præsertim cum Spiritus ignei, præter facultatem extendendi sese, habeant insuper vires in infinitum sese ignium instar multiplicandi.

26. Hydrophobia à Medicis etiam inter morbos refertur occultos. Hydrophobia in canibus symptoma est; morbus est febris ardentissima, ex Spirituum incendio, atrocissimis cum deliriis & furore: hinc obvios quosvis, notos & ignotos anhelanter ictu adoritur, impetit, mordet. Febris hæc, cum sit à Spirituum igneorum flagrantia, incendio seu nimia igneitate, idcirco ratione igneæ naturæ Spiritus

ignei, aquam naturaliter averfantur. Qualis igitur inter incendium & aquam disconvenientia, dissimilitudo, antipathia, metus, fuga, strepitus & collisio: eadem inter Spiritus caninos incendio laborantes, & inter aquam extremè exopposito frigidam, sicut homo in balneo calido, calefactus, aquam extremè frigidam horret: ita ob Spiritus igneos inflammatus, aquam averfatur canis rabidus & omnia liquida; Aqua ignem, ignis aquam fugit ob dissimilitudinem; DEUS enim in prima creatione voluit similia congregari, dissimilia separari: quæ congregatio & separatio perpetua lex est, erit & manebit, quamdiu visibilis hic durabilis est mundus. Aqua in cacabo igni superposita exhalat, fugit, exspirat. Ignis superflua aqua suffocatur quasi, extinguitur, aut deserit combustibile, fugit potius, & in auras exspirat ad fœum simile, quodvis enim pergit & pro-

& properat ad suum simile, fugit autem dissimile.

28. Ut autem copiosa aqua, & diluvium, ignis incendium; ita submersio canis, etiam hominis hydrophobi, Spirituum incendium, & unà ideas furibundas, caninas, mordaces, invidiosas extinguit, obliterat.

29. Membris & visceribus specifica medicamenta dicuntur agere occulta qualitate, cum tamen satis manifesta sit, quâ agunt. Spiritus cordialium eandem vel similem habent constitutionem, qualitatem, humidam & calidam, cum Spiritibus vitalibus: cephalicorum Spiritus easdem habent qualitates seu substantiæ dispositionem cum Spiritibus animalibus, e.g. majorana cephalica, Spiritus habet subtiles, similes & propter similitudinem amicabiles & sociabiles Spiritibus animalibus.

30. Omnium itaque, meo quidem iudicio, qualitatum occulta-

rum ratio manifesta dari potest ex duplici fonte, & primò quidem vel ex Spirituum indentitate seu similitudine & dissimilitudine; vel 2. ex potestate animæ & Spirituum creandi, multiplicandi res, rerumque ideas, quæ divina potestas creandi à Creatore in ipsa creatione homini inspirata est, in animam influxit, & animalium Spiritus: quam creandi potestatem hætenus fortem vocarunt phantasiæ facultatem, cùm tamen phantasia sit actus & facultas animæ & Spirituum, v. g. homo creat hominem: animal animal; vegetabile vegetabile; gravida creat in embryone cerasum, aliumve nævum: eadem in embryone creat ideam caseum abominandi, butyrum, rosas, & certa quædam animalia; in proprio corpore creat homo ideas pathematicum, rerum lætarum, tristium, terribilium, amabilem, abominabilem, &c. ut in titulo de ideis dictum.

31. Nos Christiani, quibus cognitus

gnitus est actus & historia primæ creationis, tenemur tandem in inquirendis & dandis rerum & actionum, in hac mentis caligine, nobis obstrusarum naturalium causis, in DEO & primo motore, & divinis naturæ collatis acquiescere dotibus, quas in & cum creatione naturalibus, gloriosissimus inspiravit Creator & communicavit. Scimus enim ab inexhausto illo omnis divinitatis Oceano, incomprehensibili Numine eas abundantissimè fluxisse. Et eo nomine quidem, abstrusæ rerum virtutes planè occultæ dici non possunt, cùm nos sciamus, sciantque ethnici, in Deo plures esse, ex eoque fluxisse potuisse adhuc plures, si placuisset divino Numini virtuosiores: Videmus enim ejusmodi occultas actiones nobis cum Deo esse communes, quia ab ipso fluxerunt, quod enim DEUS habet, creaturis suis, sua, quâ voluit mensura in actu creationis communicavit, nihil enim à DEO emanavit in

K 5 creatu-

creaturas , divinum quod non sit ipsum, Deumque nostrum opificem, quod non referat omnipotentem,

32. Satis tamen manifestæ sunt, cum videamus plerasq; fieri per volitionem , fortem phantasiam , desiderium , non nullas per raptum similitum , & fugam dissimilium. Ex omnia itaque partim sapiunt & æmulantur Creatorem , partim obsequiosè observant Creatoris jussa, & summi Monarchæ voluntatem. Ex divinis itaque dotibus hominē collatis & ex hoc, cujus mentionem fecimus desiderio similitum, omnis declaranda est occulta qualitas, omnisque naturalis emanat, suumq; habet fundamentum Magia. Non operæ precium esse duco, omnes rerum adducere, longo ordine enumerare & examinare qualitates occultas, cum meo quidem iudicio, ex duplici jam dicto fonte omnium ratio dari possit manifesta. Nec putandum, omnia, quæ in catalogum qualitatum occultarum à scriptoribus

ptoribus hæcenus relata sunt, occultas meritò dici qualitates, v. g. inter lupo & agnum communiter dicitur esse occulta qualitas & antipathia, cum tamen lupo nisi dietur ovibus, felis muribus, lucius piscibus, homo feris, propter sui conservationem & alimentationem: lupo ex eadem causa & alia persequitur animalia, porcos, hinnulum, cervos, equos: hyeme, extrema fame, ipsum etiam hominem aggreditur; non occulta qualitate, odii, aut Spirituum dissimilitudine, sed propter famem, sui que conservationem: eodem modo ac homo, & animalia quævis carnivora, rapacia, persequuntur, occidunt & devorant animalia vescibilia.

C A P U T XXIX.

DE FERMENTATIONE.

1. Fermentatio est actio Spirituum. 2. Promovetur. 3. Impeditur.

DE Fermentatione, cum sit actio Spirituum, agere meritò
K 6 debuiſ-

debuissimus in Medicina hac nostra Spirituum. Verùm cùm fufius & eruditiffimè de hac materia doctiffimi hætenus fcripferunt autores, labore fupfedebimus. Non exigam tamen Fermentationi lucem infert hæc nostra Spirituum doctrina.

1. Fermentatio enim actio eft Spirituum, & fit ex collifione, lucta & pugna Spirituum. Spiritus enim, quando non amplius funt, & contineri poffunt fub imperio, in libertatem fe fe vindicare fatagunt, extricant fe fenfibiliter, motu, expansione, ftrepitu.

2. Promovetur Fermentatio, fi Spiritus peregrinus acidus, inimicus fuperaddatur fermentandis, qui fe fe multiplicans aculeis fuis pungitivus eft, & irritativus, aliisque moleftus, autor aliis & fuafor in libertatem fe fe vindicandi.

Frigus fermentationem hebetat, Spiritus enim coërcet, fugat, quò minus fe fe extendant & multiplicent.

CAPUT

CAPUT XXX.

DE FASCINATIONE.

1. Quid Fascinatio ? 2. Quid infrigidatio ?
 3. Quid *ὁζυζαῖν* ? 4. Signum virginitatis.
 5. Spiritus imperant Spiritibus. 6. Fascinationes fiunt Voce. 7. Cantu. 8. Visu.
 9. Contactu. 10. Jaculatione. 11. Præstigiis. 12. Mediis naturalibus. 13. Omnes esse naturales demonstratur.

1. **P**ergimus jam ad titulum de Fascinatione. Fascinatio generale in sagarum actiones, quod cadit, vocabulum, propriè est imperium Spirituum in & super Spiritus, subjugando eos, & quasi ligando.

Talis fascinatio, ligatura Spirituum & subjugatio statim sese offert & accidit in frigidis ita communiter dictis, quibus Venerem exercendi potentia & stimulus quasi extinctus est, seu potius quorum Spiritus genitales subjugati sunt, & quasi ligati, quo minus turgescant.

2. Infrigidatio illa communiter

dicta, morbus est Spirituum genitalium, in quo Spiritus cohibentur, coërcentur, iisque imperatur, quominus intumescant, sese extendant, nedam per orgasmum in libidinem erumpant. Libidinosa enim phantasia & appetitus Venericus semper conjunctus est cum orgasmo Spirituum genitalium intumescencia, turgescencia.

3. Propriè ὀργασμὸς sumitur de anxia animalium & præcipuè fœminarum appetentia, quæ libidinis impetu concitata in Venerem ruunt, earumque corpora turgescunt.

4. Hinc sponsæ collum prima nocte Venerem expertæ solito ut plurimum crassius est, ita ut filo etiam deprehendatur excessus seu turgescencia. Tali modo Democritus puellam Hippocratis comitem, virginem primò, sequenti verò die fœminam salutavit, quòd nocturnæ deflorationis indicia forsan etiam ex hirciffatione perciperet. Spiritus itaque genitales in frigidis succum-

cumbunt, partes autem genitales non laborant, in iis enim nullus deprehenditur morbi nec defectus vestigium. Homo imperium habet ratione Spirituum in hominem, quæ tyrannis nominari potest, generosa activitas, à nonnullis dicitur vis & facultas phantasiæ, de qua superius hinc inde inferuimus.

5. Spiritus autem hominis imperare alius hominis Spiritibus, patet inde, quia, 1. secundum receptam Philosophorum sententiam & quotidianam experientiam, alius nascitur Dominus, ratione Spirituum, alius dominantium generosorum, alius naturâ nascitur servus, quia ob Spiritus serviles natura vult fervire, 2. ex increpatione, quando homo hominem increpat, unâ imperat aut imperare sibi præsumit alteri homini. Hinc anfa data est Paracelso statuere & pronunciare magnam verbis inesse virtutem. 3. Spiritus fortiores imperare super debiliores, patet ex Regibus & Principibus

cipibus, qui ratione imperantium & regionum natura Spirituum, & generosioris indolis aliis imperant.

Fittamen interdum, quod eorum Spiritus debiliores ligentur sæpè, imperentur, gubernentur & quasi fascinentur à Spiritibus ministri aut ministrorum qui abundant Spiritibus fortioribus, fortiori phantasia agentibus. Patet ex viro, qui mulieri ratione Spirituum virilium imperat: mulier interdum Spirituum masculorum ratione effœminato viro virilior est. 4. Videmus Spiritus similes similibus ligari, colligari, complicari, sibi mutuò quasi magneticè adhærere; qualis colligatio est inter fidos amicos: talis Spirituum colligatio fuit inter Davidem & Jonathancm, inter Dæmonem & Pythiam, talis Spirituum reciproca colligatio est inter conjuges.

Illud ipsum dominium, de quo jam agimus seu imperium, tyrannidis increpatio & fascinum, ut eò effica-

efficacius sit & imperiosius, requiruntur Spiritus in sua phantasia fortes, generosi, in desiderio & intentione suâ exaltati, roborati. Phantasia autem activior fit, & exaltatur, ideoque fascinationes paraguntur.

6. 1. Voce, murmure; non quòd nuda verba effectum habeant quendam: sed quatenus cum indignatione, execratione, imprecatione, forti odii, iræ, invidiæ phantasiâ, desiderio & intentione enunciantur.

7. 2. Cantu, hinc incantatio, quatenus cantu celebrantur & peraguntur, vel quatenus verba cantantur. Tales incantationes leguntur apud Virgilium in Pharmaceutria:

*Ducite ab urbe domum mea carmina,
ducite Daphnim.*

Iste versus intercalaris sæpius repetitur ab incantatrice, pro phantasia alioquin segni acuenda, roboranda, exaltanda. Idem Poëta.

*Carmina vel cælo possunt deducere
Lunam.*

Carmini-

*Carminibus Circe socios mutavit
Ulyssis.*

*Frigidus in pratis cantando rumpi-
tur anguis.*

8. 3. Visu seu intuitu forti, cum odio, iracundia, amore. Langius I. 3. epist. 36. de planetarum & gemmarum effluviis agit, in specie de visu sequentia addit: *nullum reperiri in humani corporis fabrica sensus organum, quod tanta Spirituum copia scateat, & fulgorem de se emittat, ut oculus.*

Hinc Virgilius:

*Nescio quis teneros oculus mihi fa-
scinat agnos.*

9. 4. Contactu, sagas nocere posse, docet Carrichterius in herbario suo, & Joh. Bapt. Condro-
nechius, aliique.

10. 5. Jaculatione, ut vocant, sagittatione, ictibus, tostione, percussione aliisque multis illicitis modis: quorsum pertinent maleficia, quando sagæ homines necant & animalia, iisque nocent, nec non segetibus,

ribus, vegetabilibus; qualia etiam sunt veneficia, dum venena parant, ea acunt & perniciosiora reddunt, quibus aquas, pascua, aërem aliaq; coinquant & inficiunt.

11. 6. Præstigiis, quatenus Dæmon ad instantiam sagarum imagines vel phantasmata in aëre format, & iisdem oculos fallit, tales serpentum imagines per magos Aegyptiacos Pharaoni objecit Dæmon.

12. 7. Fiunt Fascinationes, non Spirituum & fortis duntaxat phantasiæ viribus, & præstigiis, sed aliis etiam mediis & remediis, cæteroque naturalibus; v. g. mumia humana, herbis, pharmacis, animalibus, animalium partibus, mortuorum cadaveribus & ossibus, vestibus & indumentis, excretis, &c. quibus nocent.

13. Omnes autem enumeratas fascinationes naturales pronuncio, & esse inde concludo, 1. quod à creaturis perficiantur. 2. quod in & cum Natura & rebus naturalibus fiant
natu-


naturaliter. 3. quòd naturalibus remediis tollantur. Fiunt à creaturis, à Dæmone, & sagis. Dæmones, cùm sint in censu, serie & ordine creaturarum, & inter naturæ cancellos inclusi, nihil supernaturalis ipsis concessum est patrare. Quicquid igitur agit Genius in fascinationibus omnis generis, utitur vel abutitur potius naturalibus causis, mediis & remediis; ultra naturam, supra naturam, non habet, quòd agat, potestatem. Sagæ quicquid agunt, agunt vel mediis naturalibus, vel forti animæ & Spirituum phantasia, qua sibi aliisque prodesse vel obesse possunt etiam non sagæ, ut titulo de viribus Phantasiæ dictum est.


Sagis autem phantasia sopita expergilcitur, exaltatur ope, suggestionem & persuasionem Dæmonis. Utuntur vel abutuntur sagæ & Dæmon Naturæ potestate & mediis naturalibus, pro obtinenda malefica nocendi intentione, eoque nomine

mine eorundem magia, naturalis
titut sit, illicita tamen est, quippe
quâ nocendi remedia sagis à Dæ-
mone, cui animam suam oppigno-
rarunt, suggeruntur.

Ex allegatis itaque causis omnem
Magiam, etiam Dæmoniacam,
naturalem pronunciaui, cum fiat,
1. per naturam, creaturas naturæ
cancellis inclusas. 2. quia per media
naturalia peragitur; fascinationibus
enim resistimus: 1. animositate: ani-
mosi, sicut à peste immunes sunt; ita
etiam à fascino, meticulosi autem
infantes, pueri, animalia; quorum
debilis phantasia, fortiori subjugata
est, odiosâ phantasiæ actione,
facilius corripitur & subigitur mor-
bis fascini: repercussio, secundum
Helmontium naturaliter reflectit
incantamentum, in sui autorem. 2.
Combustione per ignem, ignis enim
subjecta, vehicula & media fasci-
nationum consumit & annihilat,
ligatosque Spiritus liberat. 3. per
arcana maiora, quæ omnem Spiri-
tuum

rituum exarthrosin & præternaturalem constitutionem corrigunt. 4. per vegetabilia, animalia, lapides, gemmas, mineralia & medicamenta, quæ ex iis desumuntur specificè proficua interna & externa. Ejusmodi autè remedia hinc inde ab autoribus recensentur, cum primis à Karrichtero in herbario suo germanico: Helmontio in opere suo magno p. 603.









2 vol. 3^e



